



ИСЛОМ КАРИМОВ

**ИНСОН, УНИНГ
ХУҚУҚ ВА
ЭРКИНЛИКЛАРИ —
ОЛИЙ
ҚАДРИЯТ**

14

ISBN 5-640-02961-7

Тошкент
«Ўзбекистон»
2006

66.3(5Y)
К 23

Ўзбекистон Республикаси Президенти Ислом Каримов асарларининг 14-жилдидан давлатимиз раҳбарининг 2005 йил июлидан 2006 йил августигача бўлган давр мобайнида мамлакатимиз Олий Мажлиси Сенати ва маҳаллий кенгашлар йиғилишлари, халқаро учрашувлар ва тантанали маросимлардаги маъруза, нутқ ва чиқишлари ҳамда табриклари ўрин олган.

Шу билан бирга, ушбу жилдда давлатимиз раҳбарининг хорижий мамлакатларга расмий ташрифлари муносабати билан оммавий ахборот воситалари учун берган интервьюолари эътиборингизга ҳавола этилмоқда.

ISBN 5-640-02961-7

К 0804000000 - 245
M 351(04) 2006

© «ЎЗБЕКИСТОН» НМИУ, 2006 й.

КЎҲНА САМАРҚАНДНИНГ БОҚИЙ ОВОЗИ

Муҳтарам фестиваль қатнашчилари!
Азиз меҳмонлар!
Хонимлар ва жаноблар!

Бугун дунёning энг қадимий шаҳарларидан бири бўлмиш гўзал ва бетакрор Самарқанд «Шарқ тароналари» халқаро мусиқа фестивали иштирокчилари ва унинг меҳмонларига бағрини кенг очиб бермоқда.

Барчангизни — «Шарқ тароналари» халқаро мусиқа фестивалининг муҳтарам иштирокчилари ва унинг азиз меҳмонларини чин қалбимдан нафақат Самарқанд аҳли, балки диёrimизда яшайдиган барча миллат ва элатлар номидан, бутун халқимиз номидан «Хуш келибсиз, азим Самарқандга, хуш келибсиз, Ўзбекистонга!» деб қутлашта ижозат бергайсиз.

Самарқанд деганда, кўз ўнгимизда сирли ва улуғвор Шарқ олами намоён бўлади. Бу буюк шаҳар ўзининг икки минг етти юз йиллик шонли тарихи давомида қадимий цивилизациянинг ноёб намуналари, Шарқнинг бетакрор табиати ва

ўлмас руҳини, унинг меъморлик санъати, бой маданиятини ўзида мужассам этиб, дунё аҳли-нинг эътиборини тортиб келмоқда, десак, айни ҳақиқатни айтган бўламиз.

Шунинг учун ҳам, мана, саккиз йилдирки, биз «Шарқ тароналари» деб ном олган, Шарқнинг қалби ва юрагини ифода этадиган, классик мусиқа санъатини асраб-авайлаш ва ривожлантиришдек олижаноб мақсадга хизмат қиласиган бу анжуманни айнан мана шу фусункор шаҳарда ўтказиб келмоқдамиз.

Қадим Регистон майдонининг ўзидан, бу ерда қад ростлаган муҳташам обидаларнинг мовий гумбаз пештоқларидан худдики мумтоз мусиқа овози эшитилиб тургандек ҳиссият туттилади. Бу садолар мана шу муazzзам масканга қадам қўйган ҳар қайси инсонга бамисоли тарихнинг сеҳрли саҳифаларини очиб бериб, эзгуликка, тинчлик ва осудаликка чорлаб тургандек туюлади.

Азиз дўстлар!

Бугун биз ўта таҳликали ва мураккаб бир замонда яшамоқдамиз. Ҳеч шубҳасиз, айни мана шундай нотинч бир даврда элу элатлар ўртасида ҳамкорлик ришталарини мустаҳкамлаш, уларни ўзаро яқинлаштиришга хизмат қиласиган, инсониятнинг муштарак ва бебаҳо бойлиги бўлган мусиқа санъатининг ўрни ва аҳамияти бекиёсдир.

Бу ёруғ оламда тили, дини ва урф-одати турлича бўлган юзлаб миллат ва элатлар яшайди, лекин уларнинг барчасини бирлаштирадиган қудратли бир восита борки, уни бошқа ҳеч нарса билан қиёслаб бўлмайди: бу — мусиқа, бу — оҳант, бу — тарона.

Ҳеч кимга сир эмас: дунёнинг қайси жойида яшамасин, барча халқлар ўз остонасига соз кўтариб келган одамни азиз меҳмон сифатида қабул қиласди.

Бугун биз ҳам сизларни — ўзимизнинг азиз меҳмонларимизни дунёнинг яқин ва узоқ жойларида истиқомат қилаётган халқларнинг маънавий ва маданий руҳини мусиқа воситалари орқали ифодаловчи, уларнинг саломи ва самимий тилакларини етказувчи тинчлик ва дўстлик элчилари, деб қабул қиласиз ва қадрлаймиз.

Қани эди, дунёда урушлар, портлашлар, қарама-қаршиликлар барҳам топса, кишилар ўртасидаги низо-адоватлар йўқолса ва замин узра фажат гўзал мусиқа садолари янграб, одамзодни ёмон йўлдан қайтариб, эзгуликка даъват этса!

Бундай фикр ер юзидағи соғ ниятли барча инсонлар, бутун борлигини олижаноб мақсадларга бағишлиаган сиз каби минг-минглаб санъат аҳли намояндалари қалбидаги орзу-интилишларнинг яққол ифодаси, десам, ўйлайманки, янглишмаган бўламан.

Фестиваль доирасида ҳар бир қатнашчи ўз халқининг миллий мусиқа меросини, ўзининг худо берган истеъоди ва маҳоратини намоён қилишга, ижодий беллашувларда юқори ўрин ва мукофотларни эгаллашга ҳаракат қилиши табиий, албатта.

Менга буюрса, барчангизни бағримга босиб, сизларга энг юксак, энг катта мукофотимизни — кўнгил бойлигимиз, қалб саховатимизни берган бўлардим.

Имкониятдан фойдаланиб, халқимизнинг, биз сизларни юртимизда кўришдан, ноёб санъатингиздан баҳраманд бўлишдан баҳтиёрмиз, доимо азиз меҳмонимиз бўлинг, деган самимий дил изҳорини сизларга билдиromoқчиман.

Анжуман кунларида сизлар Самарқанднинг бетакрор табиати, кўхна ва ҳамиша навқирон қиёфаси, тенгсиз меъморий ёдгорликлари билан танишар экансиз, меҳмонга қалбини очиб, меҳрини берадиган Самарқанд аҳли билан мулоқотда бўлиб, афсонавий Шарқ тимсоли бўлмиш Самарқанд бозорларини кўриб, ўхшashi йўқ бу гўзал шаҳарга, Ўзбекистон заминига мафтун бўлиб қоласиз, деб ишонаман.

Фурсатдан фойдаланиб, «Шарқ тароналари» мусиқа фестивалининг жонқуярларидан бўлган ЮНЕСКО ташкилоти ҳамда Халқаро мусиқа кенгаши раҳбарларига ушбу анжуманни ташкил этиш

борасидаги саъй-ҳаракатлари учун миннатдорлик билдираман.

Қимматли вақтини аямай, бугунги фестиваль ишида яқиндан иштирок этаётган, ЮНЕСКО Бош конференциясининг президенти Майкл Омелева жанобларига, жаҳондаги мусиқа оламида юксак ном ва обрў қозонган севимли санъаткорларимизга, шу жумладан, Франциядан Смарқандга ташриф буюрган Шарль Азнавур жанобларига алоҳида ҳурмат-эҳтиромимни изҳор этмоқчиман.

Сизларни анъанавий мусиқа анжуманининг очилиши билан яна бир бор табриклаб, барчангизга сиҳат-саломатлик, фестиваль ишига муваффақият тилайман.

Шарқ мусиқаси, Шарқнинг ҳаётбахш оҳанглари одамзодни ҳамиша эзгулик ва адолат, гўзаллик ва нафосатга чорлайверсин!

Эътиборингиз учун ташаккур.

«Шарқ тароналари» бешинчи ҳалқаро мусиқа
фестивалининг тантанали очилиши
маросимидағи нутқ,
2005 йил 27 август

ОЗОД ХАЛҚНИНГ УЛУФ БАЙРАМИ

Ассалому алайкум, муҳтарам ватандошлар!
Ҳурматли меҳмонлар!

Барчангизни Ўзбекистон тарихи ва ҳаётида энг улуғ, энг азиз айём билан, мамлакатимиз мустақиллигининг кутлуг байрами билан табриклашта, сизларга, сизлар орқали бутун халқимизга ўзимнинг ҳурмат-эҳтиромим ва меҳр-муҳаббатими ни билдиришга руҳсат бергайсиз.

Қадрли дўстларим, биродарларим!

Бундан ўн тўрт йил муқаддам мустақилликка эришиб, ўзлигини англаб, ўз тақдирини ўз қўлига олиб, мамлакатимизнинг бекиёс бойлик ва имкониятларидан фойдаланишга эга бўлган халқимиз эркин ва фаровон ҳаёт қуриш йўлидан қатъият билан илгарилаб бормоқда.

Ҳақиқатан ҳам, ўтган давр мобайнида Ўзбекистонимиз ҳар бир йили ўн-юз йилларга тенг бўлган тарихий йўлни босиб ўтди.

Бугун ҳаётимизнинг қайси жабҳа ва соҳасини олмайлик, эркинликка ва озодликка эришган,

ўз ақл-заковати, билими ва куч-кудратига ишонгандан халқимиз ўзининг амалий ишлари билан қандай буюк мэрраларга кўтарилишга қодир эканини яққол исботлаб бермоқда.

Бунинг тасдигини кундан-кунга чирой очиб бораётган юртимиз чехрасида, далаларимиз, қишлоқ ҳаётида юз бераётган туб ўзгаришларда, янги корхоналар ва ишлаб чиқариш қувватлари, муҳташам иншоотлар, шинам тураржойлар, равон йўллар ва коммуникациялар тимсолида кўриш мумкин.

Бундай ижобий жараёнлар янгича асосда барпо этилаётган юзлаб ўқув юртлари — мактаб, лицей ва коллежлар, замонавий ускуналар билан жиҳозланган тиббиёт муассасалари мисолида намоён бўлмоқда.

Эртанги кунни кўзлаб амалга ошираётган мана шундай бунёдкорлик ишларимизга куч-куват берадиган кўп қиррали маънавий ҳаётимизнинг янада юксалиши ва унинг давлат сиёсати даражасига кўтарилиши бутун ўз ҳосили ва самарасини бермоқда.

Шу борада улуғ аждодларимизнинг бебаҳо маданий ва маърифий меросини, муқаддас қадриятларимизни тиклаш ва ҳаётга қайтариш билан бирга, ҳаётимизни замоннинг энг илғор ютуқ ва мезонлари билан бойитиш, комил инсон, баркамол авлодни вояга етказиш, таълим-тар-

бия ишини мутлақо янги негизда ташкил этиш, муқаддас динимизга ҳурмат-эҳтиром — фаолиятимизнинг маъно-мазмунини белгилаб келмоқда.

Буларнинг барчаси, авваламбор, «Ёш авлодга эътибор — келажакка эътибор» деган, ўз олдимизга қўйган шиор-мақсадларимизнинг биз учун куч-кувват ва руҳий бойлик манбаи бўлиб, эртанги кунимизнинг ишончли пойдевори ва кафолатига айланиши муқаррар.

Муҳтарам дўстлар!

Бугун биз нақадар нотинч ва таҳликали замонни бошимиздан кечираётганимизга ҳаммамиз гувоҳмиз.

Бундай хатарли вазиятда бизнинг тинчлигимиз ва осуда ҳаётимизни, янги жамият куриш йўлида астойдил меҳнат қилаётганимизни кўролмайдиган, яқин ва узоқ атрофимизда ёвуз ва разил мақсадлар билан бизга кўз олайтираётган, қўпорувчи ва қабиҳ ҳаракатлардан ҳам тап тортмайдиган кучларнинг борлиги барчамиздан доимо сезгирилик ва ҳушёрлигимизни сақлаб, мустақиллигимизни янада мустаҳкамлашни талаб этмоқда.

Бугун озодлигимиз, эркинлигимиз ва эзгу мақсадларимизга эришиш, жаҳон миқёсида ўзимизга муносиб ўрин эгаллаш, Ватанимизнинг истиқлолини ҳимоялаш, авваламбор, ўзимизга, ўзимизнинг имконият ва салоҳиятимизга, азму

шижоатимизга боғлиқ эканини шу юртда яшаёт-ган ҳар қайси инсон чуқур англаб, тушуниб олиши даркор.

Шу борада сиёсий, ҳарбий, иқтисодий омиллар қаторида яна бир ўта муҳим мезон борки, унинг номи — миллий ғуур, миллий ифтихор туйғусидир.

Бу шундай буюк қудратки, тарихда бу кучга таяниб-суюниб, кўплаб ҳалқлар энг мураккаб синовлардан, давр суронларидан омон чиққан ва бошқаларнинг ҳавасини уйғотадиган эркин ва фаровон ҳаёт қуришга эришган.

Шу маънода, соҳибқирон Амир Темур бобомизнинг «Биз киммиз, қандай буюк зотларнинг авлодимиз, қандай буюк куч-кудрат соҳибимиз» деган дъяваткор сўзлари барчамизни ўз қадр-қимматимизни англашга, дунёда яккаю ягона бўлмиш Ватанимизни, бетакрор Ўзбекистонимизни севиш ва унга садоқат билан яшашга чорлайди.

Биз миллий ғуур ва ифтихор деганда, бу туйғуни нафақат бугунги муаммо ва қийинчиликларни енгишда, эзгу мақсадларга етиш йўлида суюнч сифатида англаймиз, айни пайтда ҳалқаро майдонда эл-юртимизнинг номи, обрў-эътиборини юксалтиришга, унинг шаънига доғ у ёқда турсин, ҳатто соя туширмасликка хизмат қиласидиган ҳаётбахш бир куч сифатида тушунамиз. Ва биз бу вазифани бугунги

кунда энг муҳим, энг зарур бурчимиз, деб билишимиз даркор.

Хурматли юртдошларим!

Бугун босиб ўтган йўлимизни ва эришган мараларимизни танқидий баҳолар эканмиз, аввалио, олдимиизда турган жиддий вазифалар ва мурракаб муаммоларнинг ечимини топиш масалалари эътибор марказида турганини чукур англаб олишимиз керак.

Биринчи галда эл-юртимиз хавфсизлигини таъминлаш, оқни қорадан ажратишга қурбимиз етиши, ҳаётимизда ҳали учраб келаётган лоқайдлик, бепарволик, ўзибўларчилик каби эски асоратлардан воз кечиш, кимдир четдан келиб бизни ҳимоя этади ва оғиришимизни енгил қилиб беради, деган қарашларга бутунлай барҳам беришимиз зарур.

Бугун ҳаётимизнинг барча жабҳа ва соҳаларидага кент кўламда олиб борилаётган ислоҳотлар ва эркинлаштириш сиёсатини янада чукурлаштириш, одамларимизни иш билан тўлиқ таъминлаш, кичик бизнес ва фермерлик ҳаракатига кенг имконият ва ҳукуқий кафолатлар яратиб бериш ва уларни амалга ошириш, айнан шулар ҳисобидан аҳолининг даромадини, оладиган маошлирини, пенсия, нафақа ва стипендияларни кўпайтириш — буларнинг барчаси сўзда эмас, амалда давлатимиз ва жамиятимиз ҳаётида энг долзарб масала бўлиб қолади.

Айниқса, жамиятимизда демократик тамо-йилларни жорий қилиш, фуқаролик жамияти барпо этиш мақсадида давлат бошқаруви, суд-хукуқ тизимини замон талабларига мувофиқлаштириш, матбуот ва сўз эркинлигини таъминлаш, аввало, инсон ҳуқуқи, инсон манфаатини ҳимоялашга қаратилган ижобий ишларимизни босқичма-босқич, ҳеч шубҳасиз, охирига етказамиз.

Азиз ватандошларим, қадрдонларим!

Бугун мен мана шу юксак минбардан туриб, барчангизни бағримга босиб, сизларга, сизларнинг сиймонгизда бутун халқимизга қаратса эзгу тилакларимни изҳор этмоқчиман.

Эл-юртимизнинг боши омон бўлсин!

Ватанимизни ёмон кўзлардан, ҳасад ва гаразли ниятлардан, бало-қазолардан Ўзи арасин!

Ўзбекистонимизнинг буюк келажагини кўриш баҳти барчамизга насиб этсин!

Мустақиллигимиз абадий бўлсин!

*Ўзбекистон Республикаси мустақиллигининг
14 йиллигига бағишлиланган тантанали
маросимдаги сўз,
2005 йил 31 август*

ЎЗБЕКИСТОН ПАХТАКОРЛАРИ ВА БАРЧА МЕҲНАТКАШЛАРИГА

Қадрли дўстлар!

Авваламбор, сиз, азизларни — деҳқон ва фермерлар, ширкат хўжаликлари аъзоларини, теримчи ва механизаторлар, мутахассис ва мутасаддиларни, ҳосил тақдирни ҳал бўладиган масъулиятли дамларда ўз ўрнини далада деб билган барча инсонларни эришган катта меҳнат ғалабангиз — З миллион 600 минг тонналик улкан хирмон барпо этиб, пахта тайёрлаш бўйича шартнома мажбуриятини муваффақиятли адо этганингиз билан чин қалбимдан самимий муборакбод этишдан баҳтиёрман.

Ҳеч шубҳасиз, Ўзбекистон пахтачилиги тарихида том маънода янги, ёрқин саҳифа бўлмиши бу ажойиб ғалаба, яъни октябрь ойининг биринчи ярмида белгиланган юксак маррани эгаллаб, ҳосилни юз фоиз юқори сифат билан топширишта зришилгани замирида кўп-кўп омил ва мезонлар мужассам.

Бу ҳақда гапирганда, аввало, шу муқаддас диёримизда яшаётган одамларнинг дунёқараши,

онгу тафаккури юксалиб, ҳәётимизда рўй берадётган бекиёс ўзгаришларга ўзини бевосита дахлдор деб ҳис қилиш, бу – менинг юртим, бу – менинг Ватаним ва унинг ютуқлари – менинг ютуғим, деган фикр билан яшаш ҳисси, фуқаролик туйгуси кучайиб бораётганини бугун кўлга киритаётган марраларимизнинг пойдевори деб қабул қилишимиз даркор.

Бундай муваффақиятларни кўлга киритишда юртимизда янги ҳаёт, демократик жамият қуриш, бозор иқтисодиёти тамойилларини жорий этиш борасида, жумладан, биз учун етакчи соҳа бўлмиш қишлоқ хўжалигида, пахтачиликда амалга оширилаётган, олдин тасаввур қилиш ҳам қийин бўлган туб ислоҳот ва янгиланишлар ҳал қилувчи аҳамият касб этмоқда, десак, айни ҳақиқат бўлади.

Одамларнинг ўз ишига, ҳаётга муносабати ўзгариб, ерга, мулкка эгалик ҳиссиёти кучайиб бораётгани, заҳматкаш деҳқон меҳнатини ҳар томонлама рағбатлантиришга қаратилган амалий тадбирлар, қишлоқда асосий куч бўлмиш фермерлик ҳаракатига кенг йўл очиб берилаётгани, шунинг ҳисобидан етиштирилган ҳосилнинг 70 фоизи айнан фермер хўжаликлари томонидан тайёрлангани бу фикрнинг яққол тасдиғидир.

Шу билан бирга, мавжуд имкониятлар, аввалимбор, ер ва сувдан, моддий ресурслар, техни-

ка воситаларидан оқилона ва самарали фойдаланиш, мўл ҳосил гарови бўлган ирригация ва мелиорация масалалари, қишлоқ хўжалиги корхоналарини минерал ўғит, ёнилғи-мойлаш материаллари билан таъминлаш ишлари тўғри йўлга кўйилгани ҳам бугунги катта ютуқни кўлга киритишда мустаҳкам замин бўлганини айтиш ўринли, деб биламан.

Айни вақтда соҳанинг истиқболини ўйлаб, олимлар ва мутахассисларимиз томонидан замонавий илм-фан ютуқларини пахтачиликка татбиқ қилиш, серҳосил ва эртапишар навлар яратиш, зараркундаларга қарши биологик усуллар билан курашиш, ғўзага ишлов бериш, ўз вақтида сифатли дефолиация ўтказишдаги ибратли янгилик ва тажрибалар, умуман, пахтачиликда юксак агротехника талаб ва усулларини жорий этиш эътиборга моликдир.

Албатта, бундай юксак мэрраларни эгаллаш учун, аввало, дала меҳнаткашларига тегишли шартшароит яратиб бериш, уларнинг даромади, ҳаёт даражаси, турмуш фаровонлигини ошириш, қишлоқ инфратузилмасини ҳар томонлама ривожлантириш, мухтасар айтганда, одамларнинг оғирини енгил қилиш учун қатъият билан доимий иш олиб бориш зарурлитини барчамиз яхши англаймиз.

Шу нуқтаи назардан қараганда, ҳозирги вақтда қишлоқ хўжалигига нафақат ишлаб чиқариш

муносабатлари, балки қишлоқ ҳаётининг ўзи ҳам тубдан ўзгариб бораётгани, кўп йиллардан бери счилмаган долзарб ижтимоий муаммоларни ҳал қилиш йўлида салмоқли натижалар қўлга киритилаёттанини мамнуният билан эътироф этсак, арзийди.

Кейинги йилларда юртимизда, энг аввало, қишлоқ жойларда кенг кўламда бунёдкорлик ва ободончилик ишлари амалга оширилаётгани, жумладан, аҳолини ичимлик суви билан таъминлаш даражаси мамлакатимиз бўйича 83 фоизга, табиий газ билан таъминлаш даражаси 81 фоизга ўсгани, қатор вилоятларда эса бу кўрсаткичлар 90—95 фоизга етгани, барпо этилаётган янги уйлар, маданий-маиший иншоотлар, боф-роғлар, замонавий лицей ва коллеклар қишлоқларимиз қиёфасини тубдан ўзгартириб юборгани бугун барчамизни қувонтиради.

Айниқса, умумтаълим мактабларини ривожлантириш бўйича қабул қилинган дастуримизга асосан биргина шу йилнинг ўзида 105 миллиард сўм маблағ сарфланиб, 53 та янги мактаб бунёд этилиб ишга туширилгани, 1044 та мактаб эса капитал ва жорий таъмирдан чиқарилганини шу йўлдаги дастлабки, аммо ғоят муҳим қадам сифатида баҳолашимиз лозим.

Шу борада сўнгги пайтда мамлакатимизда янги-янги шифо масканлари қаторида кўплаб қишлоқ

врачлик пунктлари барпо этилаётгани, бу эзгу мақсад учун жорий йилнинг ўзида давлат бюджетидан 5,5 миллиард сўм маблағ сарфлангани қишлоқ аҳлининг саломатлигини мустаҳкамлашга хизмат қилиши, уларнинг ҳаёти ва кайфиятига ижобий таъсир кўрсатиши шубҳасиз, албатта.

Табиийки, мана шундай ютуқларимиз кўпайиб, иқтисодиётимиз бакувват бўлиб боргани сари халқимизнинг турмуш шароитини янада яхшилаш, фаровонлигини ошириш учун имкониятларимиз ҳам кенгайиб бораверади.

Мен, фурсатдан фойдаланиб, бугунги улкан ғалабага муносиб ҳисса қўшган барча юртдошларимизга, бошқа экинларга нисбатан энг қиёйин ва кўп меҳнат талаб қиласиган, ўта мураккаб пахтачилик соҳасининг оғир юкини ўз елкасида кўтариб келаётган уста пахтакорларимиз, фидойи бободеҳқонларимизга хурмат-эҳтиромим, қалб меҳримни изҳор этиб, чин дилдан таъзим қилини ўзимнинг инсоний бурчим деб биламан.

Мана шу муборак рамазон кунларида бутун Ўзбекистон аҳлини эришилган юксак марра билан яна бир бор табриклар эканман, эл-юртимизга ўз марҳаматини кўрсатиб, йўлимизни очиб беряётгани учун Аллоҳ таолога шукроналар айтишимиз, биздан доимо мурувватини дариф тутмаслигини сўрашимиз ҳам қарз, ҳам фарз, деб ўйлайман.

Азиз пахтакорлар, барчангизга сийхат-саломатлик, баҳту саодат, хонадонларингизга файзу барака тилайман.

Ҳамиша омадингизни берсин, ҳалол меҳнатингизнинг роҳатини кўринг, ҳеч қачон кам бўлманг, қадрдонларим!

*Ислом КАРИМОВ,
Ўзбекистон Республикаси Президенти*

МАВЖУД САЛОҲИЯТ ВА ИМКОНИЯТЛАРДАН ОҚИЛОНА ФОЙДАЛАНИШ – МУВАФФАҚИЯТ ГАРОВИ

Ассалому алайкум, қадрли депутатлар!
Муҳтарам юртдошлар!

Авваламбор, бугун сиз, азизлар билан дийдор кўришиб турганимдан хурсанд эканимни билдириб, сизларга, сизлар орқали бутун вилоят аҳлига ўзимнинг самимий ҳурмат-эҳтиромим ва эзгу тилакларимни изҳор этишга ижозат бергайсиз.

Сиз, ҳалқ ноиблари, вилоят ва туман раҳбарлари, жамоатчилик вакиллари билан бўладиган ҳар қандай учрашув, суҳбат ва мулоқотлар, фикр алмашишлар бугунги долзарб ва муҳим муаммоларнинг ечимини топиш, тегишли режалар тузиш учун замин түғдиради, керакли хулосалар чиқаришга асос бўлиб хизмат қиласади.

Шу маънода, бундай учрашувларни мен ўзим учун доимо катта бир масъулият деб қабул қиласман.

Бугунги учрашувимиз ҳам тасодифий эмаслигини, бунга муайян сабаблар борлигини, албатта, ҳаммангиз яхши биласиз, деб ўйлайман. Ўз-

ўзидан равшанки, вилоят олдида турган ғов-тўсикларни бартараф этиш, ечимини кутаётган қатор муаммоларни ҳал қилиш зарурати шу мажлисни ўтказишни тақозо этмоқда.

Шунинг учун ҳам ушбу сессия кун тартибига кўйилган масаланинг Тошкент вилояти ҳаёти, эртанги кунига бевосита дахлдор эканини чукур англаган ҳолда, мажлисда қатнашаётган депутатлар бўладими, вилоят фаоллари бўладими, барчамиз бу масалага масъулият билан ёндашамиз, деб ишонаман.

Биз бундан салкам икки йил аввал мана шундай мақсад ва ниятлар билан шу залда йиғилиб, Тошкент вилоятидаги ижтимоий-иқтисодий аҳвол, вужудга келган жиддий муаммоларни ечиш йўллари ҳақида атрофлича гаплашиб олганимизни ҳаммамиз яхши эслаймиз.

Ўша пайтдаги ўзаро самимий рух, очиқ ва амалий фикр алмашувлар, танқидий мулоҳазалар ва айни пайтда сизлар билан катта-катта режаларни белгилаб олганимиз ҳам, ўйлайманки, ёдимизда.

Лекин, минг афсуски, бугун ана шу масалалар тўғрисида яна куюниб гапиришга тўғри келмоқда. Ва бунинг албатта аниқ сабаблари борлигини, холисона қарагандা, барчамиз яхши тушунамиз.

Келинг, азиз дўстлар, биродарлар, бу ҳақда сўз юритишдан аввал Тошкент вилоятининг са-

лоҳият ва имкониятлари ҳақида батафсил гаплашиб олайлик.

Вилоятда қайси соҳани — қишлоқ хўжалиги ёки саноатни оласизми, қурилиш, хизмат кўрсатиш, ижтимоий соҳа ёки интеллектуал бойликларни оласизми, энг муҳими, кўпни кўрган, юқори малакали қадрларни оласизми — бу ердаги имкониятлар ҳақиқатан ҳам улкан эканига ишонч ҳосил қилиш мумкин.

Лўнда қилиб айтганда, табиий шароит ёки тупроқ унумдорлиги, сув ва моддий ресурслар нуқтаи назаридан бошқа ҳудуд ва минтақалар билан солиштиргандা Тошкент вилоятига кўпроқ имконият ато этган, десак, ҳеч қандай хато бўлмайди.

Айниқса, вилоят деҳқонларининг миришкорлиги ва омилкорлигини ортиқча таърифлаб ўтиришнинг, ўйлайманки, ҳожати йўқ.

Бугунги кунда юртимиздаги энг йирик, номи нафақат Ўзбекистонда, балки чет элларда ҳам машҳур корхоналар қаерда — Тошкент вилоядида. Уларда меҳнат қилаётган минглаб ишчи, муҳандис ва мутахассислар ўзининг ноёб малака ва тажрибаси билан ажralиб туради.

Бу ердаги мавжуд моддий-техник база, замонавий йўллар, ривожланган коммуникация тармоқлари, табиий газ, сув билан таъминлаш масалалари бўйича ҳам вилоятнинг имкониятларига ҳавас қилса арзийди.

Бутун юртимизда бўлгани каби сўнгги йилларда Тошкент вилоятида ҳам кўпгина соҳа ва тармоқларда, аксарият туман ва шаҳарларда, иккиланмасдан айтиш мумкинки, маълум ижобий ўзгаришлар кўзга ташланмоқда.

Айниқса, “Олмалиқ кон-металлургия”, “Ўзбекистон металлургияси”, “Ўтта чидамли ва қишин эрийдиган металлар” комбинатлари, “Аммофос”, “Электрокимёсаноат”, “Оҳангаронцемент”, “Лаззат” акциядорлик жамиятлари, Ангрен кўмир конлари каби йирик ишлаб чиқариш қувватлари нафақат вилоят, балки мамлакатимиз иктисадий тараққиётига ҳам салмоқли ҳисса қўшмоқда.

Шу борада Олмалиқ кон-металлургия комбинатида 2004 йилда барча асосий кўрсаткичлар бўйича режалар бажарилиб, 642 миллион сўмлик истеъмол товарлари тайёрлашга эришилганини, жами маҳсулотнинг 65,5 фоизи экспорт қилингани, маҳаллийлаштириш дастурига асосан кўргошин ва ферромарганец ишлаб чиқариш лойиҳалари тўлиқ ўзлаштирилганини алоҳида таъкидлаш лозим.

Бундай ижобий ўзгаришларни қишлоқ хўжалигига, хусусан, унинг етакчи тармоғи бўлмиш пахтачилик ва ғаллачиликда ҳам кўриш мумкин.

Бундай ютуқларга эришишда Чиноз, Бекобод, Куйи Чирчик ва Оққўргон, Юқори Чирчик ва

Бўка, Ўрта Чирчиқ туманлари меҳнаткашлари муносиб ҳисса қўшганини айтиб ўтиш керак.

Вилоятда зарар кўриб ишлаётган паст рентабелли ширкат хўжаликларини фермер хўжаликларига айлантириш борасида ҳам бирмунча ишлар қилинмоқда. Масалан, Бекобод туманидаги “Бекобод” ширкат хўжалигига 2003 йили 1 минг 766 тонна пахта ҳом ашёси тайёрланиб, шартнома режаси 61 фоизда қолиб кетган эди.

Жорий йилда ана шу ширкат негизида ташкил этилган фермер хўжаликлари томонидан жами 3217 тонна пахта ҳосили етиштирилиб, ҳосилдорлик икки баробарга ошгани фермерлик ҳаракатининг нақадар истиқболли эканини тасдиқлаб турибди.

Ёки Чиноз туманидаги Муқим Эрхўжаев бошлиқ қилаётган Муқимий номидаги фермер хўжалиги пахта ҳосилдорлигини 47,7 центнерга етказиб, шартнома мажбуриятини 190,6 фоизга бажарган. Шунинг ҳисобидан бу йилги даромади 119 миллион сўмни ташкил этган.

Бундай мисоллар фермерларнинг ўз меҳнатидан манфаатдорлиги тобора ортиб бораётгани ишда ҳал қилувчи омил бўлаётганини кўрсатади.

Кейинги йилларда вилоят бўйича қурилиш ва ободончилик соҳасида 21 миллиард сўмлик иш бажарилганини айтиб ўтиш ўринли.

Шу йилнинг 1 ноябригача 5 та янги мактаб қуриб фойдаланишга топширилгани, 39 та мактаб капитал реконструкция қилингани, 37 таси капитал, 11 таси эса жорий таъмирдан чиқарилгани, бу борада Бўстонлиқ, Чиноз, Паркент, Зангиота туманларида, Янгийўл ва Ангрен шаҳарларида ибратли ишлар амалга оширилгани эътиборга сазовор, албатта.

Бугунги кунда вилоятда жойлашган йирик саноат шаҳарлари бўлмиш Бекобод, Янгийўл ва Ангрен шаҳарлари ҳамда Бўка, Чиноз, Тошкент туманларининг марказларида ҳам ҳомийлар иштирокида ҳашар йўли билан бажарилган ободончилик ва кўкаламзорлаштириш ишлари натижасида уларнинг қиёфаси ўзгариб бормоқда.

Айниқса, Чирчиқ шаҳрида “Баркамол авлод” спорт мусобақаларига тайёргарлик кўриш жараёнида Тошкент — Чирчиқ йўналишида 17 километрлик автомобиль йўли капитал таъмирлангани, Чирчиқ дарёси устидан 234 метр узунликдаги кўприк қуриб битказилгани аҳолинингузғини яқин этишга хизмат қиласиди.

Айни пайтда Чирчиқ Олимпия захиралари коллежида 13,5 минг кишига мўлжалланган стадион, очиқ ва ёпиқ замонавий сузиш ҳавзалари, 3 минг томошибинга мўлжалланган спорт манежи қурилгани ана шундай ижобий ишлар жумласидандир.

Бундай кенг кўламли ишларни амалга оширишда “ТошГРЭСқурилиш” ва “ЧорвоқГЭС қурилиш”, “Бунёдкор” қурилиш фирмаси, “Ўзбекшахтақурилиш” каби ташкилотларнинг улуши айниқса салмоқли бўлаётганини қайд этиш жоиз.

Вилоят аҳли эришаётган бундай натижалар мисолида аввало мамлакатимизда олиб борилаётган ислоҳотлар самарасини, яъни одамларнинг ерга, мулкка, ҳаётга муносабати ўзгариб, ўз меҳнатидан манфаатдорлик туйғуси, эгалик ҳиссиёти ортиб бораётганини кўриш мумкин.

Бир сўз билан айтганда, вилоятда одамлар астойдил ишляяпти, қанча-қанча жамоалар таҳсинга сазовор ишларни амалга оширяпти.

Лекин, шу билан бирга, Тошкент вилоятида мавжуд бўлган, юқорида зикр этилган катта салоҳият ва имкониятлар тўлиқ ишга солиняптими, деган саволга, минг афсуски, ижобий жавоб бериш қийин.

Бу ҳақда гапирав эканмиз, бундай улкан салоҳиятдан оқилона фойдаланиб, уни тўғри ишлатганда, одамларнинг қалбига йўл топиб, бугун замон талаб қилаётган самарали бошқарув усулларини жорий этган тақдирда, ҳеч шубҳасиз, Тошкент вилоятининг ҳисоботи кўриладиган мана шундай йигилишларда фақат ғурур ва ифтихор билан гапириш ўринли бўлар эди.

Бироқ, вилоятнинг кейинги йилларда эришган натижалариغا баҳо берадиган, уларни мамлакатимизнинг умумий иқтисодий ривожланиши, бошқа вилоят ва минтақалар билан таққослайдиган бўлсак, очиқ айтиш керак, мавжуд ҳолат кўпчиликни, авваламбор, шу ерда яшайдиган инсонларни қониқтирмаслиги муқаррар.

Таассуфки, биз ҳавас қиласидиган мэрраларни кўлга киритишда Тошкент вилояти ҳамон ожиз бўлиб қолмоқда. Энг афсусли томони шундаки, биз бу ҳақда биринчи марта гапираётганимиз йўқ.

Ҳозирги кунда вилоят ҳаётида, унинг ривожида кўпгина хато-камчиликларга йўл қўйилаётгани, биринчи галда, одамларнинг норозилигини уйғотаётган салбий ҳолатлар, вилоят ва туман раҳбарлари, мутасаддилар фаолиятидаги лоқайдлик ва ўзибўларчилик кайфияти ҳеч кимни бепарво қолдирмаслиги табиий.

Бундай нохуш ҳолатларни вилоят иқтисодиётининг бир қатор соҳа ва тармоқларида кузатиш мумкин.

Саноат соҳасини олайлик. Вилоят бўйича ишлаб чиқариладиган ялпи ҳудудий маҳсулотнинг қарийб 30 фоизи айнан шу соҳага тўғри келади.

Аммо ҳозиргача аксарият саноат корхоналари бозор иқтисодиётининг кескин талабларига ҳалибери мослаша олмаётганини таассуф билан айтишга мажбурмиз.

Мавжуд 102 та корхонадан 37 таси ёки 36 фоизида ишлаб чиқариш ҳажми пасайишига йўл кўйилгани ва бунинг оқибатида салкам 77 миллиард сўмлик маҳсулот кам ишлаб чиқарилгани, бошқача айтганда, щунча бойлиқ қўлдан чиқарилгани, одамни бепарво қолдириши мумкинми?

Қанча маблағ ва ҳаракатлар эвазига барпо этилган “Медиз”, “Ўзмедкоттон”, “Чиноз тўқимачи” сингари кўшма корхоналар, “Болалар таомлари” ва “Паллада Восток” корхоналари айланма маблағлар ҳамда хом ашё этишмаслиги туфайли тўла қувват билан ишламаяпти.

Умуман, вилоятда хорижий сармоядорлар иштирокида ташкил этилган 225 та корхонадан 43 таси фаолият кўрсатмаётгани ҳам жиддий муаммо бўлиб турибди.

Давлатимиз, хукуматимиз томонидан кичик бизнес ва хусусий тадбиркорлик соҳасига кенг йўл очиб берилаётганига қарамасдан, вилоятда бу масалада ҳам сезиларли силжиш кўзга ташланмаяпти.

Вилоятда кичик бизнес субъектларининг худудий ички маҳсулот ҳажмидаги улуши 31,6 фоизни ташкил этади. Аммо уларнинг саноат маҳсулотлари ишлаб чиқаришдаги ҳиссаси жуда кам — атиги 8 фоиз, экспорт бўйича 7 фоиз даражасида қолмоқда.

Бу эса тадбиркорлик тузилмаларининг аксарияти ишлаб чиқариш билан эмас, кўпроқ олдисотди ва тижорат билан шуғулланаётганидан да-лолат беради.

Тошкент вилоятида шу йилнинг 9 ойи давомида ташқи савдо айланмасининг ўсиш суръати 120,9 фоизни, экспорт 110 фоизни ташкил этгани ҳолда, импорт ҳажми 143 фоизга кўтарилиб кетгани бизнинг иқтисодиёт соҳасидаги мақсадларимизга албатта жавоб бермайди.

Вилоятга четдан олиб келинаётган товарлар таркибида текстиль маҳсулотлари, цемент, гипс, алебастр, совун ва кир ювиш воситалари, ўсимлик ёғи, чинни ва сантехника буюмларининг улушки юқори экани бу ҳақда жиддий ўйлаб кўришга унрайди.

Беихтиёр савол туғилади: нима, бу товарларни ўз корхоналаримизда ишлаб чиқаришни йўлга кўйиш қийинми? Масалан, Тошкент воҳасида техника воситалари учун эҳтиёт қисмлар ишлаб чиқаришга мослашган “Резина техника”, “Интермаш”, “Чирчиқ металл конструкция заводи”, “Ангрен газмаш” ва “Трансформатор” каби корхоналар бўлгани ҳолда, бундай маҳсулотлар ҳам четдан келтирилмоқда.

Агар бундай ҳолат давом этаверадиган бўлса, биз ўзимизнинг эмас, чет эл корхоналарини ри-

вожлантирган бўламиз, ўзимизда эмас, хорижий мамлакатларда иш ўринларини кўпайтирган бўламиз.

Энг ёмони, не-не мاشаққатлар билан топган валюта маблағларимизнинг четта чиқиб кетишига йўл қўйган бўламиз. Ваҳоланки, бутун дунёда ҳар қайси давлат, ҳар қайси мамлакат, аввало, ўзидағи маҳаллий ишлаб чиқарувчиларни ҳар томонлама қўллаб-куватлайди, уларнинг йўлини очиб беришга ҳаракат қиласди.

Албатта, бу масалада мен сизларга қандайдир янгилик очиб бераётганим йўқ, бу ҳақда илгари ҳам кўп гапирганмиз. Мана шу оддий ҳақиқатни билатуриб, кўпгина жойларда, жумладан, Тошкент вилоятида ҳам бу борада ўзгариш бўлмаётгани ачинарлидир.

Қадрли халқ ноиблари!

Бу йил мамлакатимизнинг қишлоқ хўжалигига эришган тарихий ютуқлари ҳақида гапирганда, бир муҳим мезонга эътибор қаратиш ўринли, деб ўйлайман.

Яъни, қўлга киритилган юксак натижаларнинг сабаб ва омиллари кўп, лекин мен уларнинг асосий манбай — барчамизни боқадиган ерга бўлган муносабатнинг тубдан ўзгариб бораётганида, деган бўлардим.

Мухтасар айтганда, бугунги кунда деҳқон ва фермерларимиз, сен ерни боқсанг, ер сени бо-

қади, деган азалий ҳикматни ўз фидокорона мөхнати билан исботламоқда.

Бир манзарани ўзимизга тасаввур қиласайлик. Эрта баҳорда эндиғина қори кетган далаларнинг қоп-қора шудгор бўлиб ётганини ҳаммамиз кўрганмиз.

Лекин, орадан бир неча ой ўтиб, мана шу қоп-қора дала ўрнида олтинранг буғдойзор ёки кўм-кўк пахтазор пайдо бўлишига, шип-шийдам боғлар уйғониб, хилма-хил, ширин-шакар меваларнинг оғирлигидан дараҳтларнинг шоҳлари эгилиб кетишига одамнинг ишонгиси келмайди.

Шу маънода, дехқончилик — мўъжиза яратиш билан баробар, десак, асло муболага бўлмайди. Бу мўъжиза ҳар йил кўз ўнгимизда такрор бўлади. Биз бунга ўрганиб қолганмиз. Шунинг учун бундай мўъжизаларни яратадиган инсонлар мөхнатини ҳар қанча улуғласак арзиди, албатта.

Шу фурсатдан фойдаланиб, қўли қадоқ, бағрикенг, кўнгли очик, мана шу ерни гуллатиб-яшнатадиган заҳматкаш дехқонларимизга барчамизнинг номимиздан чуқур миннатдорлик билдиришга ижозат бергайсиз.

Азиз дўстлар!

Бугунги кунда қишлоқ хўжалигида амалга оширилаётган ислоҳотларнинг асосий мазмунини ташкил этадиган фермерлик ҳаракатини ри-

вожлантириш борасида ҳам вилоятда муайян ишлар қилинмоқда.

Бу ерда 8 минг 377 та фермер хўжалиги мавжуд бўлиб, уларга жами 173 минг гектар ер майдони ажратилган.

Лекин, ҳозирги кунда фермерларнинг ялни ҳосилни етиштиришдаги улуши республика миқёсида пахтачиликда ҳам, ғаллачиликда ҳам ўртacha 70 фоизни ташкил этаётган бир вақтда Тошкент вилоятида бу кўрсаткич пахтачиликда 43 фоиз, ғаллачиликда эса 40 фоиз даражасида қолаёттани бу соҳадаги оқсоқликни кўрсатади.

Бунинг сабаблари ҳақида гапирганда, аввало, ерни ўз эгасига, ҳақиқий деҳқонга беришда расмиятчилик, керак бўлса, таъмагирлик ҳолатларига йўл қўйилаётгани, самарадорлиги паст ширкатлар ўрнида фермер хўжаликлари ташкил этиш масаласига бир қанча туманларда етарли эътибор берилмаётганини айтиш даркор.

Мисол учун, Юқори Чирчиқ туманидаги “Туркестон” ва Яссавий номидаги, Ўрта Чирчиқ туманидаги “Ўзбекистон” ва Навоий номидаги иқтисодий начор хўжаликларнинг ҳанузгача фермер хўжаликларига айлантирилмаганини фақат шундай изоҳлаш мумкин.

Деҳқонларимизда яхши уруғ — мўл ҳосил гарови, деган чукур маъноли гап бор. Шу нуқтаи назардан қараганда, Тошкент воҳасида маҳаллий

шароитга мос, эртапишар, серҳосил тўза навларини яратиш ишларини қониқарли деб бўлмайди. Оқибатда вилоятда пахта ҳосили кеч етилиб, уни йиғиб-териб олиш муддати чўзилиб кетмоқда.

Бу эса ўз навбатида тайёрланган пахта хом ашёсининг сифатига салбий таъсир этишини тушуниш қийин эмас.

Ҳолбуки, вилоят ҳудудида қишлоқ хўжалиигига ихтисослашган етакчи илмий-тадқиқот муассасалари фаолият олиб боради, аммо уларнинг илмий салоҳиятидан фойдаланиш масаласи тўғри йўлга кўйилмаган.

Мана, Қорақалпоғистон ва Хоразм, Бухора ва Қашқадарё вилоятлари билан Тошкент вилояти ерларининг унумдорлиги, мелиоратив ҳолати ўртасида қандай катта фарқ борлигини ҳаммангиз яхши биласиз.

Бутун бу вилоятларнинг дехқонлари шўрланган ерларда, сув камчил бўлган оғир табиий шароитда ҳам мўл ҳосил олиш мумкинлигини ўз меҳнати билан исботлаяпти.

Хўш, Тошкент вилоятининг улардан кам жойи борми?

Албаттага, вилоятнинг бу йилги пахта тайёрлаш режасини бажарганидан сизлар қатори мен ҳам мамнунман. Аммо пойтахт вилояти бу маррага охиргилар сафида етиб келганини — сизлар бу масалага қандай муносабат билдиришингизни

билмадим-у, лекин мен бундай ҳолат Тошкент вилояти учун сира ярашмайди, деб ҳисоблайман.

Вилоятда яна бир нохуш ҳолат мавжудки, у ҳам бўлса, ризқ-рўзимиз манбаи бўлган ер ресурсларини талон-торож қилиш билан боғлиқ.

Энг ёмони, бундай bemаза ишларнинг маъсул лавозимда ўтирган одамлар томонидан содир этилиши, ҳосилдор ва сувли ерларни қариндош-урӯчилик ва ошна-оғайнитарчилик асосида ажратиб бериш ҳолатларига ҳануз чек қўйилмаяпти.

Ўтказилган текширишлар натижасида мансабдор шахслардан 17 нафари, жумладан, 5 нафар ҳокимлик идоралари ходими, икки нафар ширкат хўжалиги раиси ва 10 нафар бошқа мутасаддилар томонидан 822 гектардан зиёд ер майдонлари қонунга зид равишда уларнинг ўз яқинлари ва таниш-билишларига берилгани аникланди.

Жумладан, Янгийўл туманидаги А.Ортиков номидаги ширкат хўжалиги бошқаруви раиси М.Мирбобоев сохта хужжатлар асосида ўз отаси номига 112 гектар ер ажратган.

Пискент туманидаги “Пискент” ширкат хўжалиги раиси И.Мираҳмедов эса 44 гектар экин майдонини туманда яшамайдиган ва хўжалик аъзоси бўлмаган фуқаро Ир Сенга пиёз экиш учун қонунга хилоф тарзда ажратиб берган. Ёки Қиброй туманидаги “Жомий” акциядорлик жамияти

раиси Файзуллаев фуқаро Раҳмоновдан 4 гектар ср ажратиб бериш учун 1 миллион 200 минг сўм пора олаётганида ушланган.

Раҳбарларнинг ерга муносабати шундай бўлгач, ўзингиз айтинг, қишлоқ хўжалигида ижобий натижага эришиб бўладими?

Ердан самарасиз фойдалангани, унинг мелиоратив ҳолати ёмонлашувига, бу борадаги қонунчиликнинг бузилишига йўл қўйгани, кейинги йилларда сурункасига шартнома режасини бажармагани учун 11 та ширкат ва 85 та фермер хўжалигидан 4 минг 84 гектар ер қайтариб олингани ҳам бу масалада жиддий камчиликлар борлигини кўрсатади.

Маълумки, ер ва моддий ресурсларни талонторож қилиш, улардан қонунга зид тарзда фойдаланиш билан боғлиқ ҳолатлар юзасидан прокуратура идоралари бундан уч-тўрт йил муқаддам назоратни кучайтирган эди.

Лекин, афсуски, кейинги пайтда бу ишлар бирмунча сусайиб қолганига гувоҳ бўляпмиз. Нима, прокуратура ходимларининг бундай нопок кимсалар олдида муттаҳамчилиги ёки тили қисиқ жойи борми?

Вилоятда қишлоқ хўжалигининг муҳим тармоғи ҳисобланган чорвачиликда ҳам оқсоқлик аломатларини кўриш мумкин. Айниқса, наслчилик ишларининг тўғри йўлга қўйилмагани, чор-

ва молларини сотиб олиш учун микрокредитлар ажратищдаги сансалорлик, тайёрлов ва қайта ишлаш корхоналари фаолиятидаги нұқсанлар бунга сабаб бўлмоқда.

Жорий йилда қишлоқ хўжалиги корхоналарида қорамоллар сони ўтган йилга нисбатан 2,5 мингтага камайтгани ҳам шундан далолат беради.

Вилоятдаги молиявий аҳволга танқидий нұқтаси назардан қарайдиган бўлсак, маҳаллий бюджетга қўшимча даромад манбалари яратиш имкониятига эга бўлган Оққўрғон ва Бекобод, Бўстонлиқ ва Бўка, Паркент, Куйи Чирчиқ ва Пискент туманлари ҳамон дотациядан чиқолмаётгани, албатта, ташвишли ҳолдир.

Бюджетдан қарздорлик йилдан-йилга ортиб, бутунги кунда бу кўрсаткич вилоят бўйича 11 миллиард сўмдан зиёдни ташкил этмоқда. “Зангриота”, “Техтаъминот”, “Бинокор”, 1-темирбетон маҳсулотлари ишлаб чиқариш акциядорлик жамиятларида боқиманда қарздорлик кескин ўсиб кетган.

Бундай мисолларни кўплаб келтириш мумкин. Масалан, нақд пул тушумини ўз вақтида банкка топширмаган хўжалик субъектларига нисбатан ҳокимликларга киритилган 142 та тақдимнома юзасидан тегишли чора кўрилмаганига қандай баҳо берса бўлади?

Вилоятда яна бир муҳим соҳа — хусусийлаштириш жараёни ҳам суст бормоқда. Бу борадаги дастурда белгиланган жорий йил топшириғи атиги 52 фоизга бажарилгани, хусусийлаштирилган корхоналарнинг молиявий-хўжалик фаолияти таҳлил этилиб, уларни молиявий соғломлаштириш чора-тадбирлари ишлаб чиқилмагани шундай хулоса чиқаришга асос беради.

Ҳурматли депутатлар!

Тошкент вилоятида ижтимоий соҳадаги ишларнинг аҳволига назар ташлайдиган бўлсак, кейинги икки йилда бу борада бирмунҷча ишлар қилинганини инкор этиб бўлмайди. Жумладан, шу йилнинг 9 ойи мобайнида 316 километр табиий газ, 116 километрдан зиёд ичимлик сув тармоғи ва 310 минг квадрат метрдан ортиқ уйжой фойдаланишга топширилганини ижобий кўрсаткич сифатида қайд этиш лозим.

Вилоятда телекоммуникация тармоғини ривожлантириш мақсадида 20 та шаҳар ва туманда 34 мингдан зиёд абонент рақамига эга бўлган коммутацион станциялар ишга туширилгани аҳолига қулайлик яратишда катта қадамдир.

Биз учун устувор масала бўлган соғлиқни сақлаш соҳасини оладиган бўлсак, жорий йилда 7 та қишлоқ врачлик пункти ва 8 та соғлиқни сақлаш обьекти капитал таъмирланганини айтиш жоиз.

Шу билан бирга, бу борада қатор муаммолар мавжудлигидан ҳам кўз юмиб бўлмайди. Масалан, Янгийўл тумани марказий касалхонасининг туғуруқхона бўлими капитал таъмирга муҳтож, Юқори Чирчиқ тумани марказий касалхонаси-нинг биноси эса яроқсиз ҳолга келиб қолган.

Ана шундай нуқсонлар туфайли вилоятда аҳоли, хусусан, оналар ва болалар соғлигини муҳофаза қилишда жиддий камчиликлар кўзга ташланмоқда. Жорий йилнинг 9 ойи давомида ўтган йилнинг шу даврига нисбатан ўткир юқумли касалликларга чалинган bemорлар сони сези-ларли даражада ошгани тегишли мутасаддиларни ташвишга солиши керак.

Албатта, кўп касалликларнинг сабаби ичим-лик сувининг сифати билан боғлиқ. Қарийб икки ярим миллион аҳоли яшайдиган ушбу вилоят ҳудудида қишлоқ жойлардаги водопровод тар-моқларининг 43 фоизи санитария талабларига жа-воб бермаслигини қандай изоҳлаш мумкин?

Вилоятда коммунал хизмат қўрсатиш соҳаси-даги жиддий нуқсон ва камчиликлар аҳолида ҳақли эътиroz уйғотмоқда.

Бунинг асосий сабаби — маҳаллий ҳокимлик-лар томонидан тегишли хизмат қўрсатиш ташки-лотларига, уй-жой мулкдорлари ширкатларига расмиятчилик билан қарашиболатлари давом этётгани, ҳисоб-китоб ишлари тўғри йўлга қўйил-

магани, маҳаллалар билан ҳамкорликда иш олиб борилмаётгани билан боғлиқ.

Бунинг оқибатида аҳолининг коммунал хизматлар бўйича дебитор қарздорлиги 16,2 миллиард сўмни ташкил қилиб, йил бошига нисбатан 4 миллиард сўмга ёки 1,3 марта ошган.

Биргина Ангрен шаҳрини оладиган бўлсак, бу ерда аҳолининг иссиқлик энергияси бўйича қарзи 2,4 миллиард сўмга, электр энергияси бўйича 1,5 миллиард сўмга, сув бўйича 24,2 миллион сўмга, эксплуатация тўловлари бўйича эса 31,5 миллион сўмга етгани бу ишларнинг ўз ҳолига ташлаб қўйилганини тасдиқлайди.

Ҳурматли дўстлар!

Бугун вилоятнинг иқтисодий-ижтимоий ҳаётини таҳлил қиласр эканмиз, кўпгина аччик, танқидий гапларни айтишга тўғри келмоқда. Бу гаплардан мақсад — мавжуд вазиятни холис баҳолаш ва уни ўнглаш юзасидан керакли хуносалар чиқариш, зарур чоралар кўришдан иборат эканини, ўйлайманки, ҳаммангиз яхши тушунасиз.

Бир ҳақиқат барчамизга аён бўлиши даркор: биз ўз олдимизга юртимизда эркин ва фаровон ҳаёт барпо этишдек юксак мақсадларни қўйган эканмиз, аввало, ўзини раҳбар деган, шу юрт фарзанди деган ҳар бир инсон келажакни, элулус манфаати ва равнақини ўйлаб яшashi керак.

Бу шунчаки баландпарвоз гап эмас, ҳаётнинг ўзи ўртага қўяётган кескин талаб. Негаки, бутун мамлакатда бўлгани каби, Тошкент вилоятида ҳам аҳоли сони йил сайин кўпаймоқда.

Модомики, шундай экан, фарзандларимизни бугун қандай боқамиз, эртага қандай ўқитамиз ва тарбия қиласиз, балоғат ёшига етганида иш билан қандай таъминлаймиз? Бу саволларга бу-гуннинг ўзида жавоб топиш ва келажак пойдево-рини ҳозирдан бошлиб барпо этиш керак эмасми?

Худога шукр, бу йил об-ҳаво қулай келиб, пахтакорларимизнинг омадини берди. Лекин, дех-қонларнинг таъбири билан айтганда, йил йилга ўхшамайди. Шунинг учун биз ҳар қандай ҳолат-ларга ҳам тайёр туришимиз, доимий, барқарор даромад манбаларини излаб топиш ва ишга со-лиш ҳақида бош қотиришимиз зарур.

Мана, мисол учун, Тошкент вилоятида қишлоқ хўжалиги маҳсулотларини қайта ишлаш, хизмат кўрсатиш шоҳобчалари, кичик корхона ва микрофирмалар очиш, тоғли ва чўл худудларида чорвачиликни ривожлантириш соҳасида қанча-қанча имкониятлар мавжуд, лекин, афсуски, улар ҳамон эътибордан четда қолмоқда.

Умуман, вилоятда вужудга келган иқтисодий ва ижтимоий муаммолар ҳақида узоқ гапириш мумкин. Лекин юқорида келтирилган факт ва

рақамларнинг ўзиёқ аҳволнинг қандай эканини англаш учун қифоя қиласи, деб ўйтайман.

Бундай ҳолатларнинг сабабини, биринчи навбатда, вилоят ва туман раҳбарларининг ишга бўлган муносабатидан, уларнинг ўз вазифаси ва бурчини қай даражада масъулият билан адо этаётганидан излаш ўринлидир.

Ҳақиқий раҳбар мана шу ер — меники, мана шу юрт — ўзимники, уни обод ва фаровон қилиш — менинг нафақат вазифам, балки муқаддас бурчим, деган эътиқод билан яшashi ва ишлаши зарур. Шундагина ташаббускор ва изланувчан, тиним билмайдиган раҳбар ҳар қандай муаммонинг ҳам ечимини топа олади.

Биз сизлар билан бирга бундан икки йил муқаддам вилоят ҳокими Козим Тўлагановнинг билим ва тажрибасига катта ишонч билдириб, уни мана шу масъулияти лавозимга муносиб кўрган эдик.

Албатта, у ўз иш фаолияти давомида вилоядаги вазиятни ижобий томонга ўзгартириш учун бирмунча ҳаракат қилганини эътироф этиш жоиз.

Аммо бугун Тошкент вилоятининг ўтган йилги ва бу йилги ривожланиш якунларини танқидий баҳолар эканмиз, айтиш мумкинки, узоқ ва давомли, эзгу мақсадларимиздан келиб чиқиб, вилоят олдига қўйилган муҳим вазифалар бажарилмади, белгиланган марраларга эришилмади.

Вилоят ҳаётида йўл қўйилган, юқорида зикр этилган катта камчилик ва нуқсонлар учун масъулиятни, табиийки, биринчى галда вилоят ҳокими ўз зиммасига олиши керак.

Шу ўринда бир ҳақиқатни такрор ва такрор айтишга тўғри келади. Раҳбарлик, етакчилик — у кичик жамоа, корхона ёки ташкилот бўладими, туман, шаҳар ёки вилоят бўладими — бундан қатъи назар, эл-юртнинг бошини қовуштириб, бирлаштиришни, уларни юксак марра ва мақсадлар сари сафарбар этишни, кимнингдир пешонасини силаб, кимгадир яхши гапириб, одамларнинг руҳини кўтаришни тақозо этади.

Шу билан бирга, раҳбар дегани кимгадир кескин талаб қўя олиши, керак бўлса, қаттиққўллик кўрсатиб, қатъият билан иш олиб бориши, ўзини ҳам, бошқаларни ҳам аямасдан, қўпчиликни ўз ибрати билан ортидан эргаштириши, одамларда эртанги кунга ишонч уйғота олиши лозим.

Бунинг учун раҳбарнинг, аввало, ўзи ҳалол ва холис бўлиб, адолат билан иш юритиши керак.

Лекин сен менга тегма, мен сенга тегмайман, деган кайфият билан яшайдиган, бироннинг мушугини пишт дея олмайдиган раҳбарни бунгунги замон мутлақо қабул қилмайди.

Ўзини ҳақиқий етакчи деб ҳисоблайдиган инсон бу хусусиятлар билан бирга, яна қандай фазилатга эга бўлиши керак, деса, мен, аввало,

фидойилик соҳиби бўлиши керак, деб айтган бўлардим.

Албатта, барча касб ва хунарларни эгаллаган, ҳамма соҳанинг сир-асорини пухта биладиган раҳбарни ҳаётда топиш ўзи қийин.

Лекин, бошта туштани кўз кўрар, деганларидек, вилоят раҳбари вазифасида ўтирган одам ўзи етакчи бўлган ҳудуд олдида турган муаммоларни ҳар томонлама чукур англаши, уларни ечиш, кўзланган мэрраларга эришиш учун илгари ўзига нотаниш бўлган соҳаларни ҳам — у қандай соҳа ва тармоқ бўлишидан қатъи назар — ўзлаштириб олишта қаттиқ интилиши, керак бўлса, шу йўлда бутун куч-ғайрати ва борлигини сафарбар қилиши зарур эмасми?

Шу кўз билан қарайдиган бўлсак, К.Тўлагановнинг, мен қишлоқ хўжалигидан узоқман, деган фикрда бўлганини у шу лавозимда иш бошланган дастлабки пайтда балки тушуниш мумкин эди.

Бироқ ўз зиммасига пойтахт вилоятига биринчи раҳбар бўлишдек катта масъулиятни олганидан сўнг, ҳоким деҳқончилик сир-асорини, унинг негизини ўзлаштиришни ўзи учун асосий мақсад қилиб қўйиши, шунга эришиш учун кечаю кундуз тиним билмай ҳаракат қилиши лозим эди.

Бир сўз билан айтганда, К.Тўлаганов шу икки йил давомида вилоят қишлоқ хўжалигини атроф-

лича ўрганиши, ўзини дәхқон, фермер, агроном ўрнига қўйиб, уларнинг ҳаёти, қувонч-ташвишларини яқиндан билиши, мавсум пайтида ҳали қуёш чиқмасидан далада бўлиши, ер билан тиллаша олиши, умуман, дәхқон меҳнатининг нақадар машаққатли, оғир ва мураккаб эканини юрагидан ўтказиб яшashi керак эди.

Минг афсуски, вилоят ҳокимининг иш фаолиятида ана шундай ҳиссиёт ва интилиш сезилмаганини бугун очиқ айтишга мажбурмиз.

К.Тўлаганов мана шу ҳолатларни тушуниб, ўз фаолиятида йўл қўйган хато ва камчиликларни тан олиб, Тошкент вилояти ҳокими вазифасидан озод этиш ҳақида ариза билан мурожаат қилди.

Шу масала бўйича, яъни К.Тўлагановни Тошкент вилояти ҳокими вазифасидан озод этиш бўйича сиз, хурматли депутатлардан ўз муносабатингизни билдиришингизни сўрайман.

Хурматли халқ ноиблари!

Бугунги ўта мураккаб замонда ҳар қандай раҳбар лавозимига муносиб номзод топиш нақадар оғир вазифа эканини сиз, шу залда ўтирган, кўпни кўрган муҳтарам депутатлар ва халқ вакиллари ўз ҳаётий тажрибангиздан чукур англа-моқдасиз.

Вилоят ҳокими вазифасига номзод ҳақида сўз юритар эканмиз — бу лавозим фоят масъулият-

ли экани ҳақида гапириш ортиқча, деб ўйлайман.

Бугунги мажлисимиизга тўпланишдан олдин шу масала бўйича чуқур ўйладик, сиз, ҳурматли депутатлар ва фаоллар, тажрибали оқсоқоллар ва кайвонилар билан бамаслаҳат фикрлашдик.

Ва барча билдирилган таклиф-мулоҳазаларни эътиборга олган ҳолда, ҳозирги вақтда Бекобод тумани ҳокими вазифасида ишлаб келаётган Мирзамашрап Рассоқович Куччиев номзодини Тошкент вилояти ҳокими лавозимига тавсия этишни маъқул топдик.

Мирзамашрап Куччиев Тошкент вилояти ҳаётини яхши билади. Охирги йиллар давомида Тошкент вилоятининг Қибрай, Паркент ва Бекобод туманларида ҳоким вазифасини бажариб келган.

Бу раҳбар илгари меҳнат қилиган жойларида ҳам ишчанлиги, мавжуд муаммоларни ҳал этишда аҳоли билан тил топа билиши, билим ва дунёқараши, тажрибаси ва инсонийлик хусусиятлари билан ўзини ижобий томондан кўрсатган.

Ўйлайманки, агарки бу инсон билан бирга ишлаган одамларнинг фикрлари, у ҳақдаги ижобий таассуротларни инобатга олган ҳолда, уни шу масъулиятли лавозимга тавсия этсак, номзодимиз унга билдирилган ишончимизни оқлайди, деб айтишга асосимиз бор.

Бу масалада қаршилик ёки бошқа номзодлар бўлмаса, Мирзамашрап Куччиев номзодини овозга қўйишни таклиф қиласман.

Муҳтарам депутатлар!

Бутун биз бошимиздан кечираётган мураккаб давр, ҳаётнинг ўзи ҳар қайсимииздан белни янада маҳкамроқ боғлаб, мана шу муқаддас юрт учун, унинг бугунги ва эртанги тараққиёти учун сидқидилдан меҳнат қилишни, ёниб яшащни талаб этмоқда.

Бу йўлда шу азиз Ватан — барчамизники, унинг қудратини ошириш, ёруғ истиқболини таъминлаш — ўз қўлимизда, деган эзгу шиор диёrimизда яшаётган ҳар бир инсоннинг қалбидан доимо акс садо беришини истардим.

Мен бағри очик, меҳнаткаш, кўпмиллатли Тошкент вилояти аҳли ҳам ана шундай мақсад ва интилишни ўз фаолиятининг асосий мезонига айлантиради, бу заминнинг азалий шухратини қайта тиклашга, унинг пойтахт вилояти деган юксак номга ҳар томонлама муносиб бўлишига ҳисса қўшади, деб ишонаман.

Шу йўлда барчангизга сиҳат-саломатлик, баҳт ва омад тилайман.

*Халқ депутатлари Тошкент вилояти
кенгашининг навбатдан ташқари
сессиясидаги нутқ,
2005 йил 7 ноябрь*

СПОРТ – БАРКАМОЛ АВЛОДНИ ТАРБИЯЛАШНИНГ МУҲИМ ВОСИТАСИ

2005 йил 8 ноябрь куни Оқсаройда Президент Ислом Каримов раислигида Ўзбекистон Болалар спортини ривожлантириш жамғармаси Ҳомийлик кенгашининг навбатдаги йиғилиши бўлиб ўтди.

Мамлакатимиз раҳбари мазкур йиғилишдан мақсад Ўзбекистон Болалар спортини ривожлантириш жамғармаси томонидан 2004 йил август ойидан буён ўтган вақт мобайнида мамлакатимизда, айниқса, қишлоқ жойларда спорт инфратузилмасини барпо этиш ҳамда болаларни спортга оммавий жалб қилиш борасида амалга оширилган ишлар сарҳисоби, шунингдек, Жамғарманинг 2005 йилги бюджети бажарилиши ва 2006 йилги тушумлар, харажатлар прогнози, болалар спорти иншоотларини зарур жиҳоз ва анжомлар билан таъминлаш, уларни республика измизда ишлаб чиқаришни йўлга қўйиш ҳамда қишлоқ жойларда болалар спортини ривожлантиришда маҳаллий ҳокимлик органларининг роли ва масъулиятини оширишга доир масалаларни

атрофлича таҳлил этишдан иборат эканини тъкидлади.

Жамғарма энди тузилган кезларда унинг ҳаёти-мизда тутажак катта ўрнига унчалик ишонмаганлар ҳам бўлган эди, деди Президентимиз. Лекин ўтган вақт мобайнида Жамғарма ўз олдига қўйган мақсад ва вазифаларнинг аҳамиятини нафақат жойларда спортни ривожлантириш тимсолида, балки муайян ижтимоий муаммоларни ҳал этиш, ёш авлодни комил инсонлар этиб тарбиялаш, фарзандларимизнинг имон-иродасини мустаҳкамлаш, мустақил дунёқарашини шакллантириш, уларнинг онгу шуурида Ватанга садоқат ва эл-юрга меҳр-муҳаббат туйгуларини қарор топтиришдек юксак мақсадларимизни рӯёбга чиқаришда кўмаклашиш билан ҳам исботлаб турибди.

Спорт фарзандларимизнинг характеристини тобблайди, қалбида ўз халқи, юрти билан фахрланиш туйгуларини шакллантиради. Зоро, гуур, фахру ифтихор инсон учун ўз мақсадларига эришища мадад бўлади.

Жорий йилда мамлакатимизда болалар спорти иншоотларини барпо этиш борасида режалашибтирилган 155 иншоотдан 153 таси фойдаланишга топширилди. 2004—2005 йилларда янги қурилган 101 болалар спорти иншооти бир миллиард 22 миллион сўмлик спорт ащёлари билан жиҳозланди. Ўтган йили болалар спорти иншоотлари-

ни жиҳозлаш учун 47 хил анжом хориждан келтирилган бўлса, бу йил шундан 31 тасини мамлакатимиз корхоналарида ишлаб чиқариш йўлга қўйилди. Келгуси йил дастурида 162 болалар спорти иншоотида қурилиш ишлари олиб бориш режалаштирилган.

Шу билан бирга, Болалар спортини ривожлантириш дастурини бажаришда муайян камчиликлар ҳам мавжуд. Спорт иншоотларини қуриш бўйича тендер савдоларини ўтказишида пудратчи ташкилотларнинг моддий-техника таъминоти, молиявий ҳолатига етарлича эътибор берилмаяпти. Айрим вилоятлардаги ягона буюртмачи қурилиш ташкилотлари спорт иншоотларини топшириш муддатини асоссиз чўзиб, сифатини қониқарсиз бажармоқда. Баъзи ҳолларда янги спорт масканлари тўла қувват билан ишламаяпти ва спорт жиҳозларидан самарали фойдаланилмаяпти. Оммавий спорт турлари учун зарур жиҳозларни, айниқса, футбол ва волейбол тўпларини, шунингдек, югуриш йўлаклари ва спорт майдонлари сунъий қопламаларини ўзимизда ишлаб чиқариш ҳалигача тўла йўлга қўйилмаган.

Бугунги кунда замонавий корхоналаримизда сифатли болалар спорти жиҳозларини кенг кўламда ишлаб чиқариш имкониятларини ўрганиш даркор, деди Ислом Каримов. Бунинг учун, биринчи

навбатда, янги болалар спорти иншоотларини жиҳозлаш учун тавсия этиладиган спортнинг ҳар қайси тури бўйича энг қулай ва мақбул жиҳозлар каталогини яратиш мақсадга мувофиқдир.

Энг муҳими, болалар спорти иншоотларини жиҳозлашда ҳар бир спорт масканининг асл мақсад ва йўналишидан келиб чиқиб иш кўриш лозим. Яъни, профессионал спортчи ёшлиарни тайёрлайдиган спорт залларида профессионал маҳоратни оширадиган спорт анжомлари ўрнатилиши зарур. Умумий ўрта таълим мактаблари спорт масканларини эса болаларга мос спорт анжомлари билан жиҳозлаш лозим.

Болалар спортини ривожлантириш жамғармасини тузишдан асосий мақсад — истиқлолнинг илк йилларидаёқ белгилаб олинган буюк мақсад-муддаоларимизга, кураётган жамиятимизга муносиб, ҳам жисмонан, ҳам маънан соғлом, ҳеч кимдан кам бўлмаган авлодни тарбиялашдир, деб таъкидлади Юртбошимиз.

Ҳар томонлама ҳавастга лойиқ комил авлодни тарбияламай туриб, эзгу ниятларимизни амалга оширишимиз қийин. Мазкур Жамғарма орқали, аввало, соғлом турмуш тарзини шакллантириш, фарзандларимизни турли салбий таъсирлардан асраш, спортни оммавий, умумхалқ ҳаракатига айлантириш даркор. Масаланинг моҳиятини ана шу тарзда чукур англаш учун, даставвал, бутунги

вазиятта, бугунги аҳволга тўғри, холис баҳо бериш лозим.

Юртбошимиз қишлоқ мактабларида спортни ривожлантириш, қизларнинг спорт билан шуғуланиши учун тегишли шарт-шароитлар яратиш, болалар спорти мураббийларини, хусусан, хотин-қиз мураббийларни тайёрлаш каби долзарб масалаларга ҳам алоҳида эътибор қаратди. Бу масалаларни самарали ҳал этиш борасида мутасадди раҳбарлар болалар спортини ривожлантириш наинки ижтимоий, балки давлат аҳамиятига молик сиёсий масала эканини теран англаб олмоғи даркор.

Ҳар бир раҳбарнинг асосий вазифаси — мамлакатимизда олиб борилаётган сиёsatни, унинг устувор йўналишларини, стратегик мақсадларимизни тўғри тушуниш, одамларимизнинг, хусусан, ёшларимизнинг эртанги кунини ўйлаш, бунинг учун муносиб шарт-шароит яратиб беришдан иборат.

Болалар спортини ривожлантириш борасида бошлаган ишларимиз ўзини оқлади, деди Президентимиз. Биз ҳеч кимдан кам бўлмаган авлодни вояга етказиш мақсадида бу ишга қўл урганимиз. Ўтган қисқа даврда бу борада муайян ютуқларга эришдик. Бу ташаббусимиз, хайрли ишимиз ўз мевасини бермоқда. Зеро, бугун жойларда спортта қизиқиш изчил кучайиб бормоқда.

ТОШКЕНТ АХБОРОТ ТЕХНОЛОГИЯЛАРИ УНИВЕРСИТЕТИНИНГ ПРОФЕССОР- ЎҚИТУВЧИЛАРИ ВА ТАЛАБАЛАРИГА, БУТУН ЖАМОАСИГА

Қадрли дўстлар!

Авваламбор, сиз, азизларни мамлакатимиздаги етакчи олий ўқув юртларидан бири бўлмиш Тошкент ахборот технологиялари университетининг ташкил топганига 50 йил тўлиши муносабати билан чин қалбимдан самимий муборакбод этаман.

Ҳозирги пайтда қайси замонавий соҳа ёки тармоқни олмайлик — бу саноат ёки қишлоқ хўжалиги, курилиш, хизмат кўрсатиш тизими бўладими, хавфсизликни таъминлаш, ижтимоий масалалар ёки фан-техника, маданият ривожи бўладими — буларни барчасининг тараққиёти негизида авваламбор телекоммуникация ва ахборот технологиялари турганини энг илғор давлатлар ва умуман, дунё тажрибаси мисолида кўриш ва англаш қийин эмас.

Бундай ўта муҳим ва стратегик соҳани жаҳон андозалари ва талабларига мос равишда тезкор суръатлар билан ривожлантиришда бугунги кун-

да юқори малакали кадр ва мутахассислар тайёрлаш масаласи биз учун ҳеч нарса билан қиёслаб бўлмайдиган фоят долзарб вазифага айланмоқда.

Буни барчамиз — энг юқори вазифадан тортиб қуий бўгинда ўтирган раҳбарларгача, олиму мутахассислардан тортиб оддий фуқароларимизгача яхши англаб олишимиз зарур, деб ўйлайман.

Бундай мураккаб ва фоят масъулиятли вазифани ҳал этишда Тошкент ахборот технологиялари университетининг бу соҳадаги таянч олий ўқув юрти сифатида ўрни ва аҳамияти улкан, албатта.

Шу боис Ватанимиз мустақилликка эришганидан сўнг биз телекоммуникация ва ахборот технологиялари соҳасига, жумладан, мазкур олий ўқув юрти ривожига нақадар жиддий эътибор бериб келаётганимиз, ўйлайманки, барчангизга яхши маълум.

Айниқса, университет фаолиятини давр талаблари асосида такомиллаштириш, унинг илмий-педагогик салоҳияти, моддий-техник базасини мустаҳкамлаш, Нукус, Самарқанд, Фарғона, Қарши ва Урганч шаҳарларида филиалларини ташкил этиш бўйича амалга оширган салмоқли ишларимиз бугун ўз ижобий натижасини бераётгани эътиборга молик.

Айни пайтда жаҳон миқёсида ахборотлаштириш жараёнлари тобора глобаллашиб, бу бора-

даги рақобат кучайиб бораётган, ахборот наинки товар, балки кучли мафкуравий қуролга айланадётган ҳозирги шиддатли замонда ҳаётнинг ўзи, Ўзбекистоннинг миллий манфаатларини ҳисобга олган ҳолда, бу йўналишда янги-янги вазифаларни олдимизга кескин қилиб қўймоқда.

Шу борада биз иқтисодиётимизнинг негизини белгилаб берадиган машинасозлик, электроника, самолётсозлик, енгил саноат, телевидение-радио алоқа, коммуникация, банк-молия тармоқлари учун, бир сўз билан айтганда, ҳаётимизнинг барча жабҳалари учун зарур бўлган юксак технологиялар, илмий ишланмалар яратиш, малакали мутахассислар тайёрлаш, жаҳон ахборот технологиялари бозорида муносаб ўрин эгаллаш масаласига устувор аҳамиятта эга вазифа сифатида қарашимиз даркор.

Шулар қаторида бугун ҳаётимизга чукур кириб бораётган Интернет тизимини кенг жорий этиш, ёшларимизни Ўзбекистоннинг қадимий ва бой тарихи, эзгу қадриятларимиз, юксак ахлоқий фазилатлар руҳида тарбиялашга хизмат қиласиган миллий ахборот ресурсларини шакллантириш ва ривожлантириш, бу борада ўзбек тилининг имкониятларидан самарали фойдаланиш масаласи доимо эътиборимиз марказида туриши лозим.

Ана шундай муҳим ва долзарб вазифаларни адо этишда университетнинг кўп миллатли ўқитув-

чи ва профессорлар жамоаси, изланувчан тала-
балари ўзларининг билим, истеъдод ва тажриба-
ларини аямасдан меҳнат қиласидилар, деб ишона-
ман.

Сиз, азизларни бугунги қутлуг байрамингиз
билин яна бир бор табриклар эканман, барчан-
гизга сиҳат-саломатлик, баҳт ва омад тилайман.

*Ислом КАРИМОВ,
Узбекистон Республикаси Президенти*

ЎЗБЕКИСТОН ВА РОССИЯ – ИТТИФОҚЧИ ДАВЛАТЛАР

Ўзбекистон Республикаси Президенти Ислом Каримов 2005 йил 14 ноябрь куни расмий ташриф билан Россия Федерациясига жўнаб кетди. Давлатимиз раҳбари сафар олдидан оммавий ахборот воситалари мухбирларининг саволларига жавоб берди. Президентимиз бу ташрифдан куттилаётган натижалар ва уларнинг аҳамияти ҳақида тўхталиб, жумладан, қўйидаги фикрларни билдиреди.

— Бизнинг Россия Федерациясига, унинг пойтахти бўлмиш Москва шаҳрига бу галги расмий ташрифимиз, ўйлайманки, икки давлат алоқаларининг янги тарихида алоҳида ўрин эгаллади.

Бу ташриф доирасида бир қатор муҳим хужжатлар имзоланиши кўзда тутилган. Айниқса, Ўзбекистон Республикаси билан Россия Федерацияси ўртасида иттифоқчилик муносабатлари тўғрисидаги шартномани имзолаш мўлжаллана-

ётгани ўзаро алоқаларимизни янги босқичга олиб чиқишига хизмат қиласиди.

Бу шартномани тайёрлаш юзасидан ҳаракатлар бундан бир неча йил олдин бошланган эди. Маълумки, 2004 йил июнь ойида Ўзбекистон Республикаси билан Россия Федерацияси ўртасида Стратегик шериклик тўғрисидаги шартнома имзоланган эди. Бу шартнома бугун биз расмийлаштирумокчи бўлаётган иттифоқчилик муносабатлари йўлида муҳим қадам бўлган эди, десак, хато бўлмайди, деди мамлакатимиз раҳбари ўз фикрини давом эттириб.

Ўзбекистон билан Россия муносабатларини иттифоқчилик даражасига кўтаришга оид шартнома нималарни кўзда тутади?

Аввало, бу шартнома ўта муҳим ва масъулиятли масала — икки томонлама ҳарбий, ҳарбий-техникавий алоқаларни юқори ва ишончли асосда янада ривожлантиришни, Куролли Кучларни барпо этиш, уларни қуроллантиришда ўзаро кўмак ва ёрдам беришни назарда тутади.

Ўзингизга бир тасаввур қилинг: бу шартнома кучга кириши билан Ўзбекистонга қарши қаратилган ҳар қандай ғаразли ва ёвуз ҳамла, бизнинг ҳудудимизга бостириб киришга бўлган уринишлар ўз-ўзидан Россияга қарши қўл кўтариш бўлиб ҳисобланади ва, табиийки, дунёдаги энг кудратли давлатлардан бири бўлмиш бу мамла-

катни бефарқ қолдирмайди. Ва борди-ю, шундай ҳолатлар содир бўлса, икки давлат раҳбарияти бамаслаҳат тегишли қарор қабул қилиш ва зарур чоралар кўриш имконига эга бўлади, деб таъкидлади Ислом Каримов.

Кейинги йилларда бизнинг мамлакатимиз қандай хавф-хатарлар остида қолгани, бизга, бизнинг тинч ва осойишта ҳаётимизга қарши қандай хуружлар бўлгани барчамизга яхши маълум.

Бизни кўролмайдиган, аввало мустақил сиёсатимизни, осойишта ва барқарор ҳаётимизни барбод қилиш мақсадида уюштирилган қанчадан-қанча мудҳиши ва ёвуз ҳаракатлар, албатта, биздан тегишли чораларни кўришни талаб қиласди.

Андижондаги фожиали воқеаларни уюштирган ёвуз кучлар ва уларнинг ҳомийлари бугун ҳам тинчимасдан, халқаро майдонда бизнинг шаънимизга қанчадан-қанча бўғтон ва тухмат гаплар ёғдиришдан, қўпорувчилик ҳаракатларидан чарчамаётгани — буларнинг барчаси доимо сезгир ва ҳушёр бўлишимизни тақозо этади.

Шу билан бирга, бугунги ўта таҳликали, айрим сиёсий кучлар зўравонлик билан ўз сўзини ўтказмоқчи бўлаётган замон биздан ҳар томонлама ишончли давлатларга суюниш ва таянишишимизни талаб қилмоқда.

Лекин ҳаммамиз бир ҳақиқатни чуқур англаобилишимизни истардим: хавфсизлик масаласини

фақат ҳарбий томондан мустаҳкамлаш мумкин, деб ўйлайдиган бўлсак, очиқ айтишимиз керак, бу бирёқлама қараш бўлади. Биз ўз хавфсизлигимизни ҳам иқтисодий, ҳам молиявий, ҳам маънавий томондан мустаҳкамлашимиз даркор.

Шунинг учун Ўзбекистон билан Россиянинг иттифоқчилик муносабатлари ҳақида гапирав эканмиз, ўзаро иқтисодий-молиявий муносабатлар, транспорт, савдо-сотик алоқаларимиз ҳажмини кенгайтириш, бу соҳаларда икки давлат тадбиркорлари, фирма ва компанияларига янги имтиёзлар бериш, ўзаро борди-келдиларимиэ йўлидаги мавжуд тўсиқларни олиб ташлаш ҳақида фикр юритиш ўринли бўлади.

Ўйлайманки, бу йўналишларда Россиянинг улкан ва бекиёс бозори, имконият ва салоҳияти ҳақида ортиқча гапиришнинг ҳожати йўқ. Икки давлат ўртасида маданий алоқаларни, таълим, илм-фан соҳаларини, биз учун жуда муҳим саналган соғлиқни сақлаш, тиббиёт муассасаларини ривожлантириш борасида ҳам ўзаро катта имкониятлар очилишини ўзимизга тасаввур қилишимиз қийин эмас.

Баъзи одамлар, бундай алоқалар эртага яна эски ҳолатга, яъни «катта ва кичик оға»лар ўртасидаги муносабатларга олиб келмасмикан, деган савол бериши мумкин. Шуни ҳеч қачон унутмаслик керакки, бугун, энг аввало, замон ўзгарди.

Бугунги Ўзбекистон ва бугунги Россия кечаги ҳолатдаги давлатлар эмас.

Ҳозирги пайтда ҳар қайси давлат — Ўзбекистон ҳам, Россия ҳам ўзининг узоқ ва давомли стратегик манфаатларини чуқур англаб, таҳлил қилиб, тенг ҳукуқли алоқаларни ўрнатишни маъкул топмоқда.

Бугун ҳеч ким эски замонга қайтишни хоҳладайди. Биз ўн беш йилдан буён мустақиллик шароитида яшаб келмоқдамиз. Ва халқимизнинг буюк ютуғи бўлмиш истиқдолимиздан ҳеч қачон воз кечмаймиз. Эркинлик ҳавосидан тўйиб нафас олган одамлар қарамлик ҳолатига қайтишни асло истамайди. Бундан халқимизнинг кўнгли тўқ бўлиши керак.

Шу борада бир ҳақиқатни барчамиз яхши англаб олишимиз зарур. Фақат ўзини ҳимоя қилишга қодир, бунга имкон топган давлатнингтина келажаги ёруғ бўлади.

ИНСОН, УНИНГ ҲУҚУҚ ВА ЭРКИНЛИКЛАРИ ҲАМДА МАНФААТЛАРИ – ЭНГ ОЛИЙ КАДРИЯТ

Ассалому алайкум, муҳтарам ватандошлар!

Авваламбор, сиз, азизларни Конституциямизнинг ўн уч йиллик байрами билан чин қалбимдан самимий муборакбод этиб, сизларга, сиз орқали бутун халқимизга ўзимнинг чуқур ҳурмат ва эҳтиромимни изҳор этишга ижозат бергайсиз.

Қадрли дўстлар!

Ҳақиқатан ҳам, 8 декабрь — Конституциямиз қабул қилинган қунни катта ижтимоий-сиёсий аҳамиятта молик воқеа сифатида кенг нишонлаш ҳаётимизга тобора чуқур кириб бормоқда.

Ушбу қутлуғ сана умумхалқ байрамларимиз қаторидан муносиб жой олиб, юртимизда яшаётган ҳар қайси фуқаро, ҳар қайси оила тақдирида, уларнинг бугунги ҳаёти, эртанги келажагини, инсон ҳуқуқ ва эркинликларини таъминлашда Конституциянинг бекёёс ўрни, аҳамияти ва таъсирини яна бир бор эслаш ва тасаввур қилишга ундейди.

Мана, ўн уч йилдирки, биз эски тузум асоратларидан, миллий табиатимизга ёт ва бегона

бўлган мафкуравий қарашлардан воз кечиб, ўзимиз кўзлаган янги ҳаёт, янги жамият қуриш, унинг конституциявий асослари ва тамойилларини белгилаб олишда Асосий қонунимизга таяниб ва суюниб иш олиб бормоқдамиз.

Ана шу ўтган давр мобайнида халқимиз сиёсий тафаккури, ақди-заковатининг кўзгуси бўлмиш Конституциямизнинг ҳаётий негизи нақадар мустаҳкам эканига, у бизнинг миллий қадриятларимиз ва айни пайтда умуминсоний талабларга ҳар томонлама мос келишига такрор ва такрор ишонч ҳосил қилдик.

Биз мустақил тараққиёт йилларида босиб ўтган ғоят мураккаб ва масъулиятли, мashaққатли ривожланиш йўли давомида қандай жараёнларга дуч келмайлик, қандай оғир синовларни бошимиздан кечирмайлик, Конституциямиз ҳамиша юртимизни, халқимизни турли бало-қазолардан асраш, ўта таҳликали вазиятларда яккаю ягона тўғри йўлни топиш ва келажакка ишонч билан қарашда асос бўлиб хизмат қилмоқда, десак, ҳеч қандай хато бўлмайди.

Бугун Конституция тўғрисида, унинг маъно-мазмуни ва устувор тамойиллари ҳақида гапирав эканмиз, Асосий қонунимизда биринчи навбатда шахс манфаатининг давлат манфаатидан устун этиб белгилангани, инсон, унинг ҳукуқ ва эркинликлари ҳамда манфаатлари энг

олий қадрият сифатида мұхрлаб қўйилганини яна бир марта таъкидлаб ўтиш ўринли, деб биламан.

Айнан ана шу қатъий талабни нафакат қонуларимиз ва ҳуқуқий меъёрларимизда белгилаб бериш, балки бу устувор принципни ҳаётимизга татбиқ қилиш ўта мұхим аҳамиятта эгадир.

Бунинг учун барча фуқароларимиз ўз ҳуқуқ ва бурчларини чукур анграб олиши ва сиёсий савиясини ошириши лозим. Айниқса, ушбу конституцион тамойилга биринчи галда мансаб ва амалий вазифаларда ўтирганлар, ҳуқуқ-тартиббот идоралари ходимлари ўзининг кундалик фамилиятида оғишмай риоя қилиши зарурлигини бутунги кунда энг долзарб масала сифатида ўртага қўйсак, ўйлайманки, ҳар томонлама тўғри бўлади.

Шу ўринда давлат қурилиши ва унинг тараққиёти, жамиятимизнинг демократик янгиланиши, иқтисодиётимизни ривожлантириш ва эркинлаштириш, маънавий-маърифий ишлар билан боғлиқ бўлган, қисқача айтганда, олдимиизда турган барча муаммо ва вазифаларни ечишда “**Ислоҳот ислоҳот учун эмас, аввало инсон учун, инсон маффаатларини таъминлаш учун**” деган теран маъноли фикрни асло унутмаслигимиз керак.

Содда қилиб айтганда, бугун қайси соҳани олмайлик – бу пахта ёки ғалла етиштириш бўла-

дими, ижтимоий ҳаётимиз ёки янги-янги қурилишлар, шаҳар ва қишлоқларимизни ободонлаштириш бўладими — нимаики иш қилмасак, уларнинг ҳаммаси охир-оқибатда инсон учун, шу юртда яшаётган одамлар учун қилинаётганини кўриш қийин эмас.

Барчамиз холисона тан олишимиз керак — кўпинча кундалик ҳаёт ташвишлари билан банд бўлиб, мана шу оддий ҳақиқатни, афсуски, эсимиздан чиқариб қўямиз.

Шу борада яна бир муҳим масалага тўхталиб ўтиш жоиз, деб ўйлайман.

Бугун юртимизда демократик давлат, эркин ва фаровон ҳаёт қуриш йўлида амалга оширилаётган катта-катта ўзгаришларни нафақат ҳаётимизни четдан кузатадиган одамлар, ҳатто ғанимларимиз ҳам инкор этолмайди.

Лекин, таассуф билан таъкидлаш лозимки, ана шу тараққиётга етишиш, олдимизга қўйган марраларга эришиш йўлидаги муаммолар, қийинчилик ва етишмовчиликлар, жойларда йўл қўйилаётган хато ва нуқсонлар, учраётган тўсиқ ва говлар, содир бўлаётган жиноятлар ҳақида ошкора гапириш, бу тўғрида одамларга ҳаққоний ва холис ахборот етказишда биз ҳамон заиф бўлиб келмоқдамиз.

Очигини айтганда, собиқ тузумга хос қолдиқ ва асоратлар, барчамизнинг онгимизда ҳали-бери

сақланиб қолаётган эскича ёндашув ва қараашлар бунга асосий сабаб бўлмоқда.

Барака топкурлар, агар биз эришган ютуқларимизни эътироф этиш билан бирга, мавжуд камчиликлар, йўл кўяётган хатоларимизни аввало ўзимиз танқидий кўз билан баҳолаб, аччиқ ҳақиқатни биринчи галда ўзимизга айтадиган бўлсак, ҳеч қачон кам бўлмаймиз, аксинча, ҳаётимиздаги мана шундай нуқсонларни ўз вақтида бартараф этиш имконига эга бўламиз.

Бу ҳақда гапирганда, мен учта муҳим масала-га алоҳида урғу бериб ўтмоқчиман.

Биринчидан, барчамиз ҳаётимизда ҳанузгача учраб келаётган лоқайдлик ва бепарволик асоратларидан бутунлай халос бўлишимиз зарур.

Минг афсуски, биз бу масалада ҳамон заиф бўлиб қоляпмиз ва бундан ғанимларимиз жуда усталик билан фойдаланяпти. Мана, масалан, Андижон воқеаларини олайлик. Бу жиноятларнинг ортида кимлар тургани ва уларни қандай мақсадларни кўзлаб амалга оширгани ҳозирги кунда суд жараёнлари орқали аён бўляпти, далиллар асосида исботланяпти.

Хотирамизда умрбод яра бўлиб қоладиган Андижон воқеалари содир бўлган қунлардан бошлаб ҳозиргача душманларимиз бу фожиа ҳақида бутун дунёга турли бўхтон ва уйдирмаларни овоза қилиб юрибди. Бу масалада миллий матбуоти-

миз, радио ва телевидениемиз, жонкуяр журналистлар, юртпарвар тарғиботчиларимиз халқимизга асл ҳақиқатни тушунтириб бериши зарур.

Чунки чекка вилоятлардаги одамлар Андижон воқеалари содир бўлган пайтда, уларнинг тафсилотларини яхши билмасдан, хавотирга тушганини тасаввур қилиш қийин эмас. Бу бизнинг шу борадаги заифлигимизни кўрсатади. Шу маънода, узоқ-узоқ жойларда — бу Қорақалпоғистон ёки Сурхондарё бўладими, Фарғона водийсидағи чекка қишлоқлар бўладими — одамларимизнинг бундан бехабар бўлиб қолишига авваламбор биз ўзимиз сабабчимиз.

Мана, кўряпсизлар, ҳозирги пайтда дунё зўравонлар дунёси бўлиб қоляпти. Кимнинг қўлида кучли матбуот, ахборот воситалари бўлса, таъсир ўтказиш имкони бўлса, ким информация майдонида устунлик қиласа, замон кимники бўлади — аввало ўшаларники бўлади.

Биз бу масалада қандай хатоларга йўл қўяётганимиз, нима учун бепарволикдан қутулолмаёттанимиз ҳақида очиқ айтишимиз керак. Ҳар бир фуқаро, бу — менинг Ватаним, менинг тупротим, аждодларимиз хоки ётган шу муқаддас замин тақдири учун мен ҳам жавобгарман, деган эътиқод билан яшаса, четдан туриб уюштирилган бундай бузғунчиликлар одамларимизга ўз таъсирини ўтказмас эди.

Иккинчидан, мамлакатимиз ва унинг атрофида содир бўлаётган воқеа-ҳодисаларга доимий дахлдорлик ҳисси билан яшашимиз даркор.

Токи шу юртда яшайдиган ҳар қайси инсон ана шу мураккаб ижтимоий жараёнлардан ҳар томонлама хабардор бўлиб, уларга нисбатан ўз фикри ва муносабатига эга бўлсин, нима ҳақиқату нима бўхтон ва уйдирма эканини англаб ета олсин.

Учинчидан, ҳар бир фуқаро ўзининг, оиласининг тақдири ва эртанги куни учун ривожланиш йўлимизда ғов бўлиб турган тўсиқларга қарши қатъий кураш олиб бориши керак.

Бугун ҳаётга мана шундай ёндашувни замонининг ўзи тақозо этмоқда ва бу кескин талаблардан бош тортиб бўлмайди.

Бу ўринда гап қандайдир тарғибот-ташвиқот ҳақида эмас, балки одамларнинг кўзини очиб бериш, уларнинг қалби ва онгида мустақил фикр уйғотиш ҳақида бормоқда.

Чунки ҳозирги даврда, халқаро майдонда турли сиёсий манфаатлар тўқнашаётган мураккаб бир шароитда фақат ўз фикри, ўз ҳаётий позициясига эга бўлган халқ ва жамиятгина енгилмас кучга айланиб, ўз келажагини ўз қўли ва ақл-заковати билан куришга қодир бўлади.

Бугун инсон ҳукуқлари ва манфаатлари, уларни ҳар томонлама ҳимоялаш ва таъминлаш, жамиятни демократлаштириш ва эркинлаштириш

йўллари ҳақида гапирад эканмиз, бу мавзу дунёда ҳар доим, айниқса, сўнгти пайтларда энг ўткир ва долзарб масалага айланиб бораётганини яққол кузатиш мумкин ва буни табиий ҳол, деб қабул қилишимиз керак.

Шу фурсатдан фойдаланиб, Ўзбекистонимизнинг демократик янгиланиш ва янги жамият қуриш йўлида асос қилиб олинган пойдевор ва тамоийиллари ҳақида муҳтасар қилиб, қисқа тарзда эслатиб ўтмоқчиман.

Биринчидан, бугунги замонда асосий демократик тамоийилларни рад этадиган бирон-бир давлатни ер юзида учратиш ўзи қийин, деб ўйлайман. Лекин демократияга эришиш, унинг асосларини яратиш учун аксарият давлатларга ўн-юз йиллаб ваqt керак бўлган бўлса, кўлгина давлатлар энди-энди бу жараёнга киришмоқда.

Иккинчидан, барча мамлакатлар учун, уларга хос хусусият ва аломатларни ҳисобга олган ҳолда, бирдек мос келадиган яккаю ягона — универсал демократия модели йўқ ва бўлиши мумкин эмас.

Ҳозирги пайтда дунёда 200 дан зиёд давлат, 6 мингга яқин миллат ва элат бор. Қани, айтинглар, уларнинг ҳаммасини бир сафга, бир хил йўлга бошлиш мумкинми? Айтайлик, бир давлат, жаҳонда ўзини энг кучли, ҳар томонлама қудратли деб ҳисоблаган ҳолда, демократия соҳасида ўз моделини бошқа мамлакатларга ҳам

зўрлаб тиқишириши ва бу борада катта-катта маблағ ва куч ишлатиши, ўйлайманки, қалтабинликдан бошқа нарса эмас.

Демократияни экспорт қилиш ва уни четдан туриб зўравонлик билан жорий қилишнинг ўзи айнан демократия табиатига зид нарса.

Демократия асли эркинлик дегани бўлса, эркинликни қандай қилиб зўравонлик билан жорий этиш мумкин? Демократияни куч билан ўрнатишга уринаётганлар ҳар қайси мамлакат ва халқнинг минг йиллар давомида шаклланган ўз миллий қадрият ва урф-одатлари, қарашлари борлигини ҳисобга олиши, уларнинг тавсиялари бошқаларга маъкул келадими-йўқми — буни олдин шу юртда яшаётган одамлардан сўраб, кейин бирон-бир тавсия ёки кўмак бериши керак эмасми? Бундай кучларга қаратса, бизнинг юртимизда ўтмиши улуғ бўлган буюк халқ яшайди, бизнинг аждодларимиз дунёдаги қадимий ва бой цивилизацияни яратган пайтларда сизлар қаерда эдингиз, деган савонни бериш ўринли, деб биламан.

Демократияни зўравонлик билан экспорт қилиш, бошқа мамлакатга четдан жорий этиш тажрибаси нотўғрилигини бугун дунё миқёсидағи кўп-кўп ҳаётий мисоллар тасдиқлаяпти. Ўйлайманки, ҳаётнинг ўзи бундай зўравонлик усул-услублари ва ҳаракатларини вақти келиб албатта жой-жойига қўяди.

Демократияни ташқаридан, ҳар қайси давлат ва халқقا хос бўлган замин ва хусусиятларни ҳисобга олмасдан ўрнатишга қаратилган ҳаракатлар бир вақтлар коммунизм тизимини экспорт қилиш каби аянчли, хунук оқибатларга олиб келиши муқаррар.

Бундай мудҳиш тажрибалар туфайли инсоният қанчадан-қанча қурбонлар бергани бугун ҳаммага маълум. Шу нуқтаи назардан қарагандай, демократик жараёнларни ҳам кўр-кўронада, сунъий равишда тезлатиш аянчли оқибатларга олиб келиши мумкинлигини тарих албатта кўрсатади.

Учинчидан, Ўзбекистон ўзи учун демократик ривожланиш ва фуқаролик жамияти қуриш йўлини аниқ-равшан белгилаб олган ва бу мақсад Конституциямизда муҳрлаб қўйилган.

Бу йўл демократия ва эркинликнинг умум-эътироф этилган ва асосий принципларига таянади. Айни пайтда мамлакатимизнинг тарихий, миллий ва диний хусусиятларига ва халқимизнинг дунёқарашига асосланади.

Биз демократик жамият барпо этиш мақсади сари қадамларимизни кимгадир яхши кўриниш, кимгадир ҳисобот бериш ва сохта обрў топиш учун эмас, аввало халқимизнинг хоҳиш-иродаси билан танлаб олган, миллий манфаатларимизга жавоб берадиган манзилга босқичма-босқич ри-

вожланиш йўли билан етиб бориш учун кўймоқдамиз. Ва ана шу йўлимиздан асло қайтмаймиз.

Шу билан бирга, очиқ айтиш керак, Ўзбекистонни олиб бораётган мустақил сиёсатдан қайтариш, кимгадир қарам қилиш мақсадида четдан туриб ички ишимизга аралашиш, турли ниқоблар остида бизга қарши тазийк ва зўравонлик ўтказиш сиёсатини мутлақо қабул қилмаймиз. Бундай уринишлар чиппакка чиқиши муқаррар ва бу масала бўйича лўттибозликни йиғиштириб кўйиш керак.

Азиз дўстлар!

Вақтнинг шиддат билан ўтишини қарангки, юртимизда “Сиҳат-саломатлик йили” деб эълон қилинган 2005 йил ҳам, мана, ўз ниҳоясига етиб бормоқда.

Асосий маъно-мазмуни ва фалсафаси «Соғлом халқ, соғлом миллатгина буюк ишларга қодир бўлади» деган шиоримизда мужассам бўлган ушбу йилда амалга оширилган кенг кўламли ишлар, эришилган катта ижобий натижаларни бугун мамнуният билан таъкидлашга барча асосларимиз бор.

Мен бутунги фурсатдан фойдаланиб, якунига етиб бораётган, «Сиҳат-саломатлик йили» деб ном олган жорий йилимизда амалга татбиқ этган дастур ва тадбирлар аввало тиббий соҳани янги босқичга кўтаришга, одамларимиз, халқимиз ҳаёти-

га қандай ижобий таъсир кўрсатгани ҳақида қис-
қача тўхталиб ўтмоқчиман.

Ўтган давр мобайнида республикамиздаги 38
та шифохона ва сиҳатгоҳ янгитдан барпо этилга-
ни, тўлиқ капитал таъмирлангани ва реконст-
рукция қилингани, 93 та даволаш-профилактика
муассасаси замонавий тиббий ускуналар билан
жиҳозлангани, ўйлайманки, бу борадаги ишлар
кўламидан етарлича далолат беради.

Шунингдек, бир сменада 10 минг 500 бе-
морни қабул қила оладиган амбулатория-по-
ликлиника муассасалари, жумладан, 210 та
қишлоқ врачлик пункти ишга туширилгани
қанча-қанча одамларнинг шифо топишига, ка-
салликларнинг олдини олишга хизмат қилиши
шубҳасиз.

Айниқса, қишлоқ врачлик пунктларини ка-
питал таъмирлаш ва реконструкция қилиш на-
тижасида 800 минг нафар юртдошимиз сифатли
тиббий хизматдан фойдалантгани ва қўшимча
равишда 2 миллион кишига хизмат кўрсатиш
имконияти яратилганини бу йўлдаги муҳим қадам
сифатида баҳолаш керак.

Шуни алоҳида таъкидлаш лозимки, бундай
ибратли ишлар нафақат пойтахтда, балки барча
вилоят ва туманларимизда ҳам амалга оширил-
моқда. Жумладан, Бухоро вилоятининг Когон
шахрида, Хоразм вилоятининг Янгибозор тума-

нида янги шифохона, Бофот туманида эса янги туғруқхона мажмуи барпо этилди.

Қорақалпогистон Республикаси Қораўзак тумани марказий касалхонасида катта ҳажмдаги қурилиш-таямирлаш ишлари бажарилди, Андижон, Жиззах, Самарқанд, Сирдарё ва Наманган вилоятларидағи қатор туманларда эса марказий касалхоналар зарур асбоб-ускуналар билан жиҳозланди. Бу ишларга 1,5 миллиард сўмдан зиёд маблағ сарфланди.

Шу билан бирга, Қарши шаҳрида кардиология ва ихтисослаштирилган урология марказлари, Самарқанд вилояти тез тиббий ёрдам марказининг Оқдарё филиали, Жиззах вилоятининг Фаллаорол туманида уруш ва меҳнат фаҳрийлари санаторийси, Фарғона вилоятидаги “Чимён” санаторийсида янги корпус, Фарғона шаҳрида болалар аквапарки каби тиббиёт ва ижтимоий инфратузилма иншоотлари барпо этилди.

Шулар қаторида Республика шошилинч тиббий хизматининг марказий ва жойлардаги шифохоналари 127 та маҳсус автотранспорт ҳамда замонавий алоқа воситалари билан таъминланиши мазкур тизимнинг самараадорлигини оширишга албатта ҳисса қўшади.

Тиббий хизмат соҳасида замон талабларига жавоб берадиган малакали кадрлар тайёрлаш мақсадида пойтахтимиздаги иккита медицина

олий ўқув юрти негизида Тошкент тиббиёт академияси ташкил этилди.

Ҳозирги пайтда академия қошида ўқитувчилар малакасини ошириш маркази ҳам иш бошлади. Бундан ташқари, 3 та янги медицина коллежи барпо этилиб, уларда минг нафар талаба таҳсил олаётгани ҳам тиббий кадрлар тайёрлаш ишини яхшилашта хизмат қиласиди.

«Сиҳат-саломатлик йили»да биз учун ўта муҳим бўлган оналик ва болалик, репродуктив саломатликни ҳимоя қилиш, тиббий маданиятни ошириш, оилани соғломлаштириш борасида ҳам жиддий натижалар қўлга киритилгани барчамизга мамнуният бағишлайди.

Оналар ва болалар скрининг тизимининг такомиллашуви, никоҳдан олдин тиббий кўрикдан ўтказиш, 1 ёшгача бўлган болаларнинг патронажлик ва эмлаш ишларининг миқёси кенгайиши ва бошқа муҳим тадбирлар туфайли чақалоқлар ўлими билан боғлиқ ҳолатлар ўтган йилга нисбатан 7,4 фоизга, оналар ўлими билан боғлиқ ҳолатлар эса 6,8 фоизга камайгани айниқса эътиборга молик.

Эътибор беринг, биз қилган ишларимиз ҳақида гапирганда, кўпинча уларни рақамлар ва фоиз ҳисобида ифодалаймиз. Ўзингиз ўйланг, агар оналар ўлими қарийб 7 фоизга камайган бўлса, биз юртимиз бўйича қанча она, қанча инсон-

нинг ҳаётини сақлаб қолган, қанча оилани баҳтли қылган, қанча болани етимликдан асраб қолган бўламиз.

Бир қарашда оддий кўринган рақамлар негизида мана шундай муҳим ҳаётий масалалар ётибди. Шу боис улар оддий рақамлар эмас. Ҳар қайси рақам ортида тирик жон, инсон тақдири, юртимиз аҳолисининг ҳаёти билан боғлиқ масалалар бор. Бу ҳақиқатни ҳеч қачон унутмаслигимиз керак.

Менга қолса, қани энди, оналар ўлимини ҳар куни бир фоиз-бир фоиздан камайтириб бориб, унга бутунлай барҳам берсак.

Жорий йил давомида юртимизда фаолият кўрсатаётган 9 та скрининг маркази қаторига яна иккита — Урганч ва Навоий шаҳарларида ташкил этилган ана шундай замонавий тиббиёт марказлари ҳам кўшилди.

Очиқ тан олишимиз керак, ҳозирги кунда пойтахтимиз ёки бошқа катта шаҳарларга бориб, малакали шифокорлар кўригидан ўтиш, керакли тиббий муолажа ва тавсиялар олишга ҳамманинг ҳам имконияти етарли эмас. Айниқса, олис ва чекка жойларда яшайдиган аҳоли учун бу жиддий муаммо эканини яхши тушунамиз.

Шуни инобатга олган ҳолда, жорий йилнинг март-сентябрь ойларида табиий шароити мураккаб бўлган Қорақалпоғистон Республикаси,

Хоразм, Бухоро ва Навоий вилоятларига “Саломатлик” тиббий-санитар ёрдам поезді юборилиб, 20 мингдан ортиқ киши тиббий кўрикдан ўтказилгани кўпчиликнинг кўнглидаги иш бўлди.

Шулар қаторида ёзги таътил мавсуми давомида Халқ таълими вазирлиги ва Республика касаба уюшмалари федерацияси томонидан 247 минг мактаб ўқувчиси оромгоҳларда соғломлаштирганини ҳам айтиб ўтиш ўринли, албатта.

Ўтган давр мобайнида аҳоли саломатлигини мустаҳкамлаш учун яна бир ибратли тажриба жорий этилиб, камқонликка қарши темир моддаси билан бойитилган маҳсус ун ишлаб чиқариш йўлга кўйилди. Шунингдек, йод танқислиги бўйича ҳам алоҳида дастур ишлаб чиқилиб, амалиётга татбиқ қилинмоқда.

Бугунги кунда дунёning турли жойларида қандай хавфли юкумли касалликлар тарқалаётганидан, ўйлайманки, ҳаммангиз хабардорсиз.

Бу масала барчамиздан, биринчи галда, медицина ходимларидан доимий сезгирилик ва хушёрликни талаб қиласи. Ўз вақтида кўрилаётган чора-тадбирлар ва тиббиёт идораларининг саъй-ҳаракатлари натижасида бундай хавфли касалликлар бизнинг худудимизга, юртимизга четдан кириб келишининг олдини олишга эришилганини катта мамнуният билан қайд этиш лозим. Мана шундай бало-қазоларни оstonamizga йўлат-

масликка ҳисса қўшган тиббиёт ходимларига алоҳида миннатдорлик билдиришимиз зарур, деб ўйлайман.

2005 йилда ёлғиз кексалар ва ногиронлар, ёрдамга муҳтоҷ инсонлар саломатлигини асраш бўйича амалга ошириб келаётган ишларимизни давом эттирганимиз бу масала биз учун устувор аҳамиятта эга эканини кўрсатади.

Мисол учун, хорижлик мутахассислар билан биргаликда Қашқадарё, Самарқанд, Жиззах, Сирдарё, Тошкент вилоятлари ва Тошкент шаҳридаги кам таъминланган оиласаларга мансуб 2500 дан зиёд бола атрофлича тиббий кўрикдан ўтказилгани, «Соғлом авлод учун» жамғармаси билан ҳамкорликда 280 нафар ногирон бола пластик операция қилинганини айтиш мумкин.

Профессионал маҳорат ва катта маблағ талаб қиласидиган бундай тадбирлар туфайли юзлаб отоналарнинг дарду ташвиши енгиллашгани, энг муҳими, бу болаларнинг ўзи ҳаётга янгича кўз, умид ва ишонч билан қарай бошлаганини тасаввур қилиш қийин эмас, албатта.

«Нуроний» шифохонаси негизида 150 ўринли Республика геронтология маркази ташкил этилиб, унда тўрт минг нафар уруш ва меҳнат фахрийси, ногиронлар ўз саломатлигини яхшилаш имконига эга бўлгани ҳам шундай савобли ишлар жумласига киради.

Мамлакатимизнинг ихтисослашган тиббиёт марказларида эса шу тоифадаги bemорлардан 15 минг 570 нафари даволангани, бу кўрсаткич ўтган йилга нисбатан 2500 нафарга ортгани эътиборга сазовор.

Хусусан, республикамизнинг урология, хирургия, кўз хирургияси ва кардиология марказларида 2300 дан ортиқ bemорга тиббий хизмат кўрсатилди ва бу мақсадларга давлат бюджетидан бир ярим миллиардан зиёд маблағ сарфланди.

Бундай мисолларни кўпилаб келтириш мумкин.

Жорий йилда мамлакатимиз соғлиқни сақлаш тизими ning қонуний-хукуқий негизини мустаҳкамлаш борасида ҳам муайян ишлар қилинди.

Жумладан, «Тиббиёт фаолияти тўғрисида»ги қонун лойиҳаси ишлаб чиқилиб, ҳозирги пайтда тегишли муҳокамалардан ўтказилмоқда. Шунингдек, «Фуқароларнинг саломатлигини асраш тўғрисида»ги, «Дори воситалари ва фармацевтик фаолият тўғрисида»ги қонунларга кўшимча ва ўзгартиришлар киритиш масаласи ҳам қўриб чиқилмоқда.

«Сиҳат-саломатлик йили» дастурида кўзда тутилган яна бир долзарб масала — аҳолининг тиббий маданиятини ошириш, соғлом турмуш тарзи билан боғлиқ ҳаётий қарааш ва ёндашувларни шакллантириш бўйича кенг кўламда тарғиботташвиқот ишлари олиб борилмоқда.

Бу борада республика миқёсида турли мавзуу ва йўналишларда 80 мингдан зиёд тадбир ўтказилиб, уларда 2 миллиондан ортиқ киши иштирок этганини айтиб ўтиш жоиз.

Хусусан, икки жилдан иборат «Софлом турмуш тарзи асослари» китоби чоп этилиб, марказий ва минтақавий теле-радио каналлари орқали 1200 дан зиёд кўрсатув ва эшиттиришлар, жумладан, Ўзбекистон телевидениесида “Тўрт карра йўқ!” номли телемарафон ташкил қилинди.

Бу борада “Сиҳат-саломатлик йили: мазмун ва моҳият” деган ном остида нашр этилган методик тавсиялар ва мультимедиа дастурлари ҳам аҳолининг тиббий маданиятини оширишга хизмат қилиши шубҳасиз.

Ўқувчи ва талабалар ўртасида соғлом турмуш тарзини тарғиб этиш, гиёҳвандлик ва СПИД каби иллатларнинг олдини олиш мақсадида замонавий ахборот ресурслари, хусусан, Интернет тизимидан кенг фойдаланиш йўлга қўйилди.

Айни пайтда қишлоқ жойлардаги кўплаб маҳаллаларда аёлларнинг репродуктив саломатлиги, соғлом оила тарғиботига бағишланган учрашув ва суҳбатлар ўтказилди.

Айниқса, жисмоний тарбия ва спорт билан шуғулланишни ҳаётимиз қоидасига айлантириш бўйича қилинаётган ишларга алоҳида тўхталиб ўтишни зарур, деб биламан.

Йил давомида маҳаллалар, корхона ва муасасаларда турли мусобақалар, спорт ўйинлари нинг ўтказилганини биринчи галда юртимизда спортни оммалаштиришга берилаётган катта эътибор самараси, деб қабул қилиш лозим.

Бу борада хотин-қизларнинг иштироқи ортиб, ўтказилган кўплаб спорт тадбирларида қарийб уч ярим миллион қизларимиз қатнашгани таҳсинга лойиқ, албатта.

Мана шу спорт мусобақаларида қатнашаётган уч ярим миллион нафар ёш қизларимиз эртага қандай соғлом ҳаёт кечириши, юртимизда соғлом авлодни вояга етказишга қандай катта ҳисса қўшиши мумкинлигини бир тасаввур қилиб кўринг! Бунинг тагида чуқур маъно бор. Нима учун мен доимо, қизларимизни спортга кўпроқ жалб қилинглар, майли, улардан чемпион чиқмасин, лекин улар соғлом бўлиб вояга етсин, деб куюниб гапираман? Чунки миллат соғлом бўлиши учун, албатта, эркак ҳам сорлом бўлиши керак, лекин биринчи навбатда аёл соғлом бўлиши лозим.

Шу нуқтаи назардан қараганда, бу масалага ҳар куни, ҳар доим алоҳида эътибор беришимиз керак. Биз ўз аждодларимиз билан нафақат фахрланишимиз, балки келажак авлодимиз улардан кўра кучли ва қудратли бўлиши учун ҳаракат қилишимиз зарур. Биз 2005 йилни юртимизда

«Сиҳат-саломатлик йили» деб эълон қилганимиз замирида ҳам ана шу маъно ва мақсад мужассам. Буни ҳаммамиз яхши тушунишимиз керак.

Ҳозирги кунда мамлакатимиз бўйича спорт секцияларига 2 миллион ўқувчи жалб қилинган бўлиб, уларнинг қарийб 40 фоизини қизлар ташкил қиласди. Умуман, кейинги пайтда спорт билан шугулланаётган ўқувчи ёшлар сони 20 фоизга ортгани қувонарли ҳолдир.

2005 йил мобайнида ўтказилган «Баркамол авлод» спорт ўйинлари, аёллар спартакиадаси, бадиий гимнастика бўйича “Шарқ гўзали” халқаро беллашувлари, яқинда бўлиб ўтган ўзбек кураши бўйича жаҳон чемпионати ва бошқа нуфузли мусобақалар ҳам республикамиз спорт ҳаётида муҳим воқеа сифатида эътироф этилди.

Мухтасар қилиб айтганда, “Сиҳат-саломатлик йили” дастурининг ижросини таъминлаш бўйича шу йилнинг 1 ноябригача жами 165 миллиард 800 миллион сўм маблаг сарфлангани бу йўналишда бажарилган ишларнинг ҳажми ва кўламини яққол кўрсатиб турибди.

Фурсатдан фойдаланиб, ушбу дастурни амалга оширишда фаол иштирок этган давлат идоралари ва нодавлат ташкилотлар, Жаҳон соғлиқни сақлаш ташкилоти ва унинг минтақавий бўлимларига, халқаро хайрия тузилмаларига, саховатли ҳомийлар, умуман, шу олижаноб ишга ҳисса

кўшган эзгу ниятли барча инсонларга ўз номидан, бутун халқимиз номидан миннатдорлик билдиришга ижозат бергайсиз.

Бугун «Сиҳат-саломатлик йили»нинг дастлабки якунларини сарҳисоб қиласр эканмиз, албатта, бу йилга шундай ном берганимиз ва шунинг хисобидан катта ишларни бажаришга эришганимиз ҳақида ҳар қанча мамнуният билан гапирсак, арзийди. Биргина юқорида зикр этилган рақам ва мисолларнинг ўзиёқ кўп нарсани англатади.

Имкониятдан фойдаланиб, кўнглимдаги яна бир гапни айтишни жоиз, деб биламан. Агарки «Сиҳат-саломатлик йили» бўйича қилган барча саъй-ҳаракатларимиз лоақал битта боланинг ҳаётини асрраб қолишга, лоақал битта беморнинг шифо топишига хизмат қилган тақдирда ҳам, биз 2005 йилга шундай ном беришимиз зарур, шарт эди, десам, ўйлайманки, сизлар ҳам бу фикрга кўшиласиз.

Қадрли юртдошлар!

Шу ўринда бир савол туғилади: кириб келаётган ҳар қайси янги йилга эзгу ният билан маълум бир ном беришда биз қандай асосий мақсадларни кўзда тутамиз?

Аввало, шуни айтиш керакки, бошқа кўп ишларимиз қатори, ҳар қайси йилга ном беришда ҳам биз инсон ва унинг манфаатларини таъ-

минлашни, жамиятимизда тинчлик ва осойишталиқ, меҳр-оқибат, инсонпарварлик мұхитини мустаҳкамлашни, күпчиликни ўйлантираётган долзарб муаммоларни ҳал қилишни ўзимиз учун устувор вазифа деб белгилаб оламиз.

Шунинг учун ҳам ҳар сафар халқимизнинг бу масалата муносабатини атрофлича ўрганиб, кент таҳлиллар ўтказамиз, шу тўғрида жиддий бош қотирамиз.

Нега деганда, янги йилга ном бериш ва шу асосда маҳсус дастур қабул қилиб, уни амалга ошириш шу юртда яшайдиган барча инсонлар учун ҳам ижтимоий, ҳам иқтисодий, ҳам маънавий, қолаверса, сиёсий аҳамиятга эга бўлган мұхим масаладир.

Албатта, ана шу йўналишдаги вазифа ва муаммоларни бир йилда тўла ҳал қилиб бўлмаслигини ҳаммамиз яхши тушунамиз. Лекин, бутун эътиборимиз, моддий куч ва имкониятларимизни бирлаштириб, дастурда белгиланган мақсад сари сафарбар этиш ўз олдимизга кўйган юксак мэрраларга етиб боришда мұхим омил бўлиши шубҳасиз.

Айни вақтда биз ана шу устувор вазифаларни амалга оширишнинг молиявий манбаларини аввал-бошдан аниқ белгилаб олишимиз даркор.

Бу ҳақда гапирганда, марказий бюджет маблағлари билан бирга, жойлардаги ҳокимият идо-

ралари, нодавлат ташкилотлар, биринчи галда, фуқаролик институтлари, ўзини ўзи бошқариш органлари, жумладан, маҳаллалар, қўлидан амалий иш, амалий кўмак бериш келадиган инсонларни ҳам шу эзгу ишга жалб этиш муҳим аҳамиятта эга.

Шу борада тегишли чора-тадбирларни режалаштириш, жамоатчилик фикрини шакллантириш, тушунтириш, тарғибот-ташвиқот ишларини кенг йўлга қўйиш ҳам алоҳида ўрин тутади.

Муайян ижтимоий йўналишга қаратилган дастурни амалга оширишда, энг аввало, унинг қонуний-хукуқий асосини атрофлича ўрганиш, яна қандай янги қонун ва меъёрий хужжатлар қабул қилиш зарурлигини аниқлаш, бу йўлдағов бўлиб турган тўсиқларни олиб ташлаш, керак бўлса, давлат томонидан тегишли имтиёз ва қўшимча имкониятлар яратиб бериш биринчи даражали аҳамият касб этади.

Албатта, бизнинг эзгу ниятларимиз, орзу-ҳавасларимиз катта бўлиши ва шунга мос равища янги йилга қандайдир чиройли номлар ҳам бериш мумкин.

Лекин, ота-бобомиздан қолган “Ишқ — бошқа, ҳавас — бошқа» деган чуқур маъноли бир нақл бор. Шу нуқтаи назардан қараганда, бизнинг орзу-ҳавасларимиз катта, лекин ҳаммасини тарозига қўйиб, бир ўйлаб кўришимиз керак:

буғунги куннинг энг долзарб масаласи нима? Бизнинг асосий мақсадимиз нима ва уни нима ҳисобидан амалга оширамиз, бунинг учун қанча маблағ керак? Бу масалани кун тартибига асосий вазифа қилиб қўйишга халқимиз розими? Келгуси йил учун биз танлайдиган ном одамларга маъқул бўладими, йўқми? Авваламбор, масаланинг ана шу жиҳатларини ҳар томонлама пухта ўйлаб, кейин аниқ бир қарорга келишимиз зарур.

Бинобарин, ўз олдимизга қўйган мақсадларимиз одамларнинг эътиборини жалб қилган, уларнинг кўнглидан чукур жой олиб, шу ишга муносиб ҳисса қўшишга даъват этган тақдирдагина кутилган натижани бериши муқаррар.

Муҳтарам ватандошлар!

Юқорида зикр этилган эзгу мақсад ва интилишларимиз қай тариқа амалга оширилаётганини яна бир бор ўзимизга аниқ тасаввур қилиш учун ўтган йилларга қандай ном берганимизни эслаб ўтиш жоиз, деб биламан.

Барчангизга маълумки, 1997 йил юртимизда “Инсон манфаатлари йили”, 1998 йил — “Оила йили”, 1999 йил — “Аёллар йили”, 2000 йил — “Соғлом авлод йили” деб эълон қилинган эди.

Шунингдек, 2001 йил — “Оналар ва болалар йили”, 2002 йил — “Қарияларни қадрлаш йили”, 2003 йил — “Обод маҳалла йили”, 2004 йил —

“Меҳр ва муруват йили”, жорий йил эса “Сиҳат-саломатлик йили” сифатида истиқлолимиз тарихидан муносиб ўрин эгаллади.

Кўриниб турибдики, бу йилларнинг барчаси ўзининг чуқур инсоний маъни ва фалсафаси, ижтимоий йўналиши билан ўзаро узвий боғлиқ.

Шу ҳолатларнинг ҳаммасини инобатга олиб ҳамда ҳаётни яхши биладиган одамлар билан атрофлича маслаҳатлашиб, фикр алмашиб, бир хулосага келдик.

Ўтган йилларда амалга оширган ишларимизни изчил давом эттириш ва янги босқичга кўтариш мақсадида мен кириб келаётган янги — 2006 йилни юртимиизда “Хомийлар ва шифокорлар йили” деб эълон қилишни таклиф этмоқчиман.

Балки, шу муҳташам залда ўтирган сиз, азизлар, ҳомийлик ва шифокорлик тушунчалари бирбири билан қандай боғлиқ, деб савол қўйишингиз мумкин. Мен буни қисқача тушунтириб, изоҳлаб беришга ҳаракат қиласман.

Шу ҳакда гапирганда, авваламбор, бир фикрга эътиборингизни жалб қилмоқчиман. Ҳомийликни шифокорлик билан қиёслаш, одамга шифобериш билан тенг қўйиш табиий ҳол.

Ҳомий, ҳомийлик деганда биз нимани тушунамиз? Ҳомий дегани — бу авваламбор саховатли бўлиш, беғараз ёрдам бериш дегани.

Менинг фикримча, ҳомийлик ва саховат деган тушунчаларни бир-биридан ажратиб бўлмайди. Шу муносабат билан муборак ҳадисларда айтилган “**Аллоҳ таоло сахийдир, сахийликни севади. Яхшилик қилувчиидир, яхшиликни яхши кўради**” деган ҳикматни яна бир бор эслаб ўтмоқчиман.

Ҳомийлик фақат ўз бойлигидан бир қисмини хайр-эҳсон учун ажратиш эмас. Бу закот ҳам эмас, садақа бериш ҳам эмас. Шунга эътиборингизни яна ва яна бир бор қаратмоқчиман.

Ҳомийликни биз инсон қалби ва юрагидаги энг эзгу туйгуларнинг амалий ифодаси деб биламиз. Яъни, ҳомий деганда, ён-атрофдаги бева-бечораларга, етим-есир, муҳтож кишиларга кўмак ва ёрдам беришга, одамларнинг дардига ҳамдард бўлишга, қадрдон қишлоғи ёки шаҳрини обод қилишга интиладиган, бир сўз билан айтганда, савоб иш қилиб яшайдиган инсонларни ўзимизга тасаввур этамиз.

Муқаддас Куръони каримда зикр этилган “Хайрли, савобли ишларда бир-бирингиздан ўзишга шошилинг” деган ҳикматли сўзларда қандай чукур маъно борлигини, ўйлаймаңки, барчамиз яхши англаймиз.

Биз 2006 йилни нима учун «Ҳомийлар ва шифокорлар йили» деб эълон қиляпмиз? Биз, ал-ҳамдуиллоҳ, мусулмонмиз, яхшилик ва муруватпарварлик эса мусулмончиликнинг асосий

қадриятларидан биридир. Бунга халқимиз азалдан катта эътибор бериб келган.

Шу нуқтаси назардан қараганда, биз ўз ижтимоий-сиёсий тараққиётимизни ривожлантиришга қаратилған қандай янги дастурлар түзсак, авваламбор шу масалага алоҳида эътибор бериб келяпмиз. Бундан кейинги режа ва тадбирларимизни ҳам айнан ана шу қадриятларга асосланған ҳолда ишлаб чиқишимиз ва бу биз учун асосий мезонлардан бири бўлиши шарт.

Мен баъзан қўп жойларда саховатли, олиҳиммат юртдошларимиз, ҳеч кимга овоза ва ошкор қилмасдан, болалар уйларига, муҳтоҷ оиласарга ёрдам бериб, ногиронлар ва ёлғиз кексаларга мурувват кўрсатиб юрганини эшигандан, беихтиёр қойил қоламан.

Бундай савобли ишлар, очиғи, ҳамманинг ҳам қўлидан келавермайди. Бунинг учун одам қандай юксак фазилатлар соҳиби бўлиши керак.

Шундан келиб чиқадиган бўлсак, саховатли ва беғараз ҳомийларнинг қиласиган олижаноб ишлари инсон дардига малҳам бўлиб, шерик бўлиб, одамни хасталикдан озод қилишга интилиб яшайдиган фидойи шифокорлар фаолияти билан ҳар томонлама ҳамоҳанг ва узвий боғланиб кетганини тасаввур қилиш қийин эмас, деб ўйлайман.

Энг катта бойлиги жондан азиз боласи, жигарбанди бўлган бечора бир аёл, муштипар она-

ни кўз олдимизга келтирайлик. У қўзининг оқу қораси бўлмиш фарзандига шифо тилаб, керак бўлса, нажот сўраб шифокорнинг олдига кела-ди.

Шифокор эса ўз бурчини бажариб, шу болани даволар экан, ўзининг бегараз ва самимий хизмати, фидойлиги билан нафақат ўша мурғак гўдакка, балки онанинг безовта қалбига ҳам шифо беради. Ва шу тариқа дунёда ҳеч нарса билан ўлчаб, баҳолаб бўлмайдиган олижаноблик ва инсонийлик фазилатларини намоён этади.

Ҳеч шубҳасиз, юраги ва қалби тоза, ўзгалар учун фидо бўлиб яшашни ўзининг ҳаётий эътиқодига айлантирган одамгина бундай савобли ишларга қодир бўлади.

Бугунги кунда орамизда ана шундай эътиқод билан яшаётган минг-минглаб жонкуяр шифокорлар — етук жарроҳлар, моҳир кардиологлар, терапевт ва педиаторлар, заҳматкаш ҳамширалар меҳнат қилмоқда.

Кундалик ҳаётимизда, барчамизниң соғ-саломат бўлиб юришимизда айнан шундай ўз касбига садоқатли, профессионал тиббиёт ходимларининг ўрни ва аҳамияти бекиёс эканини ҳаммамиз яхши тушунамиз.

Лекин, ўзингиз айтинг, азиз дўстлар, биродарлар, шундай фидойи одамларни қадрлаш, уларнинг машақкатли, оғир ва мастьулиятли меҳ-

натини ҳам моддий, ҳам маънавий жиҳатдан муносиб баҳолаш ва рағбатлантиришга биз етарли эътибор беряпмизми?

Мана, биз уста паҳтакор, ғаллакор, ишчи ёки қурувчиларимиз меҳнатини улуғлаб, уларга қаҳрамонлик унвонларини берамиз, керак бўлса, ҳайкаллар ўрнатамиз. Бу инсонлар шундай юксак иззат-хурматга арзиди, албатта.

Аммо мاشаққатли меҳнати бошқа соҳа вакиллариникидан асло кам бўлмаган шифокорларга — Ибн Сино бобомизни ҳисобга олмагандан — бирорта ҳайкал қўйилганини эслай оламизми?

Бинобарин, нафақат давлатимиз ва жамиятимиз, балки барчамиз тиббиёт ходимлари олдида ҳали қарздор эканимизни унутмаслигимизни истардим.

Азиз дўстлар!

Кириб келаётган йилни “Ҳомийлар ва шифокорлар йили” деб эълон қиласр әканмиз, биз биринчи галда ҳомийлик ҳаракати, ҳомийларнинг мавқеи ва мақомини кучайтириш, бу масаланинг қонуний базасини яратишни, бундай беғараз ва олижаноб интилишлар жамиятимизда муносиб ўрин олиши учун кенг жамоатчилик фикрини шакллантиришни кўзда тутамиз.

Шу мақсадда ҳомийлар бундай хайрли ишларни ўз ҳаётининг узвий бир қисми деб ҳис

қилиши учун уларга давлатимиз томонидан ҳуқуқий кафолат ва имтиёзлар яратиб бериш билан бирга, уларни ҳар томонлама рағбатлантириш учун ҳомийлик фаолияти түгрисидаги низомни қабул қилишимиз зарур, деб ўйлайман.

Бир ўйлаб кўрайлик, ҳомий одам ўз даромадидан, бола-чақасидан орттириб бошқаларга ёрдам беради. Орамизда битта эмас, икки-учта машина минадиган, ҳатто ҳар йили машинасини алмаштирадиганлар ҳам бор. Лекин шундай инсофли одамлар ҳам кўпки, улар фақат ўзини эмас, бошқаларни ҳам ўйлайди. Нега деганда, биладики, Аллоҳ яхшилик қўлсанг, албатта қайтади, деб буюрган.

Мана шундай саховатли инсонларга раҳмат айтиш керак. Уларнинг охиратни ўйлаб қилаётган хайрли ишларини биз тўғри тушунишимиз зарур. Мен шахсан Президент бўлиб, уларнинг беғараз ишлари учун имконият яратиш, шу борада баязи бир соликларини камайтириш бўйича имтиёзлар беришга ҳам тайёрман.

Айни пайтда бутун халқимиз, авваламбор, ёшларимиз онги ва тафаккурида меҳр-мурувват, саховат фазилатларини мустаҳкамлаш, миллий қадриятимиз бўлмиш бу ҳаракатни янада кучайтириш масаласи ҳам эътиборимиз марказида бўлиши даркор.

Сир эмас — бугунги бозор муносабатлари шароитида кимдир ўзининг худо берган ақл-за-

ковати, куч-қувватини ишга солиб, астойдил меңнат қилиб яхши яшапти, кимdir эса ҳали мана шундай мураккаб шароитга тўла мослашиб ололгани йўқ.

Бизда ҳам шундай одамлар бор, буни тан олишимиз керак. Биз адолатли жамият қурмоқчимиз. Доим айтадиган гапимни бутун яна бир бор так-рорлашни жоиз деб биламан. Ўзбекистонда ўта бой ҳам, ўта камбағал ҳам бўлмаслиги керак. Биз мана шундай жамият қурмоқдамиз.

Албатта, биз ўзбеклар гуур, ор-номус туйғусини ҳамма нарсадан баланд кўямиз. Бундай фазилатларни ҳамма миллатга ҳам бермаган. Шу маънода, биз халқимизнинг ор-номусини аяшимиз керак. Сен – камбағал, сен – қашшоқ, деб одамларни ажратмаслик, ҳеч қачон таъна қиласлики керак.

Агар муҳтоҷ одамга сидқидилдан, беғараз кўмак берилса, бундай ёрдам худонинг даргоҳида ҳам қабул бўлади.

Ногиронлар, етим-есирларга, ёлғиз қарияларга, муҳтоҷ кимсаларга кўрсатиладиган ёрдамни кўз-кўз этмасдан, чин дилдан қилишимиз керак. Бугун давлатимиз мана шу ишларни амалга оширяпти, шу йўлда ҳаракат қилияпти, шу мақсадлар учун катта-катта маблағ ажратяпти, муҳтоҷ инсонлар ва оиласаларга маҳаллалар орқали мунтазам ёрдам беряпти.

Албатта, маҳаллалар орқали берилаётган маблағ етарли эмас. Мен Президент сифатида буни тан олиб, очиқ айтишим керак. Шунинг учун ҳам биз ҳомийлик фаолияти тўғрисида низом қабул қилиб, бу борада тегишли имтиёзлар берамиз, шунинг ҳисобидан ҳам муҳтоҷ одамларга ёрдам кўрсатиш йўлини топамиз.

Давлат ва халқ бирлиги айнан ана шундай ишлар орқали мустаҳкамланади. Биз турли ижтимоий дастур ва тадбирларни ишлаб чиқишида шу омилга алоҳида эътибор беришимиз зарур.

Шифокорлар ҳақида гапирав эканмиз, биз бу борада бошлаган ишларимизни изчил давом эттириб, соғлиқни сақлаш тизимининг моддий-техник базасини янада мустаҳкамлаш, тиббиёт ходимлари учун муносиб меҳнат ва турмуш шароитини яратиш, уларнинг меҳнатини рағбатлантириш масалаларига биринчи даражали аҳамият беришимиз даркор.

Куни кеча шу борада телевидение ва матбуотимизда “Тиббиёт ходимлари меҳнатига ҳақ тўлаш тизимини такомиллаштириш тўғрисида” қабул қилинган қарор эълон қилинди.

Бу қарорга биноан 2006 йилнинг январь ойидан бошлаб тиббиёт ходимларининг ойлик тариф сеткасини такомиллаштириш, уларга малакаси, бажарадиган ишининг мураккаблиги, билими ва тажрибаси ҳамда ўз касбини адо этишда,

одамларни даволашда кўшаётган ҳиссасини иnobатга олган ҳолда маош белгилаш ва рағбатлантириш тизимини жорий этиш, шундай мезон асосида уларнинг иш ҳақи миқдорини 30 фоизгача ошириш кўзда тутилмоқда.

Энди барчамизнинг энг муҳим вазифамиз – қабул қилинган ана шу қарор олдимизга қўйган мақсадларни жойларда ҳаётга тўлиқ татбиқ этишдан иборат. Токи тиббиёт соҳасида меҳнат қилаётган барча инсонлар – юқори малакали шифокорлардан бошлаб, оддий ҳамшира ва медицина хизматчиларигача бу қарорнинг амалий таъсирини ўз ҳаётида кўрсин.

Қадрли юртдошлар!

Ҳозирги пайтда давримиз муаммолари чиндан ҳам ўта кескин эканини сезиш, англаш қийин эмас. Мамлакатимизга нисбатан четдан бўлаётган жуда оғир, асосиз тазиикларни бошимиздан кечиряпмиз. Ён-атрофимизда нималар бўлаётганини кўряпсизлар.

Ана шундай вазиятни инобатга олиб, эртанги кунимиз, келгуси режаларимиз ҳақида ҳам ҳар томонлама ўйлашимиз, тегишли чоралар кўришимиз керак. Бир сўз билан айтганда, ўзимизни ҳар томонлама мустаҳкам ва бақувват қилиб олишимиз, доимо сезгир, ҳушёр бўлиб яшашимиз зарур.

Нега деганда, ўзимиз ҳақида ўзимиз ўйламасак, четдан келиб бизга ҳеч ким ёрдам бермайди.

Билиб қўйинглар, дунёда беғараз ёрдам берадиган давлатнинг ўзи йўқ.

Ҳозирги вақтда турли ниқоблар остида мамлакатимизни “демократлаштириш” мақсадида ҳар хил нодавлат ташкилотларини кўпайтириш ва ривожлантириш учун беғараз ёрдам берамиз, деб жар солаётганлар сони кўпайиб бормоқда. Русларда «Текин пишлоқ фақат қопқонда бўлади» деган гап бор.

Биринчидан, нодавлат ташкилотлари ҳақида, уларни четдан туриб молиялаштириш, уларга маблағ ажратиш тўғрисида гап борадиган бўлса, бунинг тагида айрим қудратли давлатларнинг юртимизга нисбатан узоқ ва давомли стратегик мақсадлари ётганини сезиш қийин эмас.

Бугун ҳаётнинг ўзи шуни яққол кўрсатмоқдаки, ташқаридан маблағ оладиган ва четдан бошқариладиган нодавлат ташкилотлари ҳозирги пайтда ана шундай давлатлар ташқи сиёсатининг восита ва куролига айланиб бормоқда.

Иккинчидан, агарда кимда-ким бизга ҳақиқатан ҳам беғараз ёрдам бермоқчи бўлса, бундай ёрдам биринчи навбатда сарф қилинадиган соҳалар кўп.

Бундай кўмакни авваламбор муҳтоҷ табақаларга, маҳаллаларга бериш мумкин. Маҳаллалар кимга қандай ёрдам кераклигини яхши билади. Нима учун қуриб бораётган, ўз атрофида яшаёт-

ган одамларнинг ҳаётига зомин бўлаётган Орол дengизига четдан ҳеч ким ёрдам бермаяпти? Нега Қорақалпогистонда, Хоразмда, Бухорода оғир ва мураккаб экологик шароитда яшаётган одамларга ҳеч ким ёрдам бермаяпти?

Амалда нима бўляпти? Биттаси боради — айланиб келади, иккинчиси боради — айланиб келади, яна биттаси семинар ўtkазади, ҳа, аҳвол оғир, ёрдам бериш керак, дейди. Ўн беш йилдан бери шу гапни эшитамиз.

Шу нуқтаи назардан қараганда, такрор-такрор айтаман, биз авваламбор одамларимизни рози қилишимиз керак. Биз қачон кучли ва қудратли бўламиз — қачонки одамлар бугунги тизимдан, бугунги ҳаётдан рози бўлса. Шундагина бу халқни ҳеч ким енга олмайди.

Хурматли дўстлар, азизлар!

Кириб келаётган янги йилга «Ҳомийлар ва шифокорлар йили» деб ном беришимиз халқимизнинг эзгу фазилатларига уйгун бўлиб, айни вақтда «Сиҳат-саломатлик йили»нинг мантиқий ва узвий давоми бўлади, деб айтишга барча асосларимиз бор.

Албатта, ҳар йилги тажрибамиздан келиб чиқсан ҳолда, биз янги йил бўйича ҳам алоҳида дастур ишлаб чиқиб, уни амалга ошириш юзасидан зарур чора-тадбирларни белгилаб оламиз.

Мен бу борада ҳокимият идоралари, вазирликлар, нодавлат, ноҳукумат ташкилотлар билан бирга, жамоатчилик вакиллари, умуман, шу эзгу ишга ҳисса қўшишни истайдиган ҳар бир киши ўзининг амалий таклиф ва фикр-мулоҳазалари билан фаол иштирок этади, деб умид билдираман.

Агарки, шу муқаддас заминда яшаётган барча инсонлар – миллати, тили ва динидан қатъи назар, Ўзбекистон – менинг ягона Ватаним, деб яшайдиган, белини маҳкам боғлаб астойдил меҳнат қиласиган бўлса, билиб қўйинглар, бизни ҳеч қандай куч енга олмайди, юртимиз ва халқимиз ҳеч қачон ҳеч кимга қарам бўлмайди.

Ишончим комилки, ўзининг мустақил тараққиёт йўли давомида улкан довонларни босиб ўтган, ҳар қандай синов ва машаққатларни енгишга қодир бўлган халқимизнинг буюк иродаси, азму шиҷоатига таяниб, биз ўз олдимизга қўйган янги ва юксак мэрраларга албатта етамиз.

Сизларни Конституциямиз байрами билан яна бир бор кутлаб, барчангизга сиҳат-саломатлик, баҳт ва омад, хонадонларингизга файзу барака тилайман.

*Ўзбекистон Республикаси Конституциясининг
13 йиллигига бағишланган тантанали
маросимдаги маъруза,
2005 йил 7 декабрь*

ЁШЛАРГА ИШОНЧ БИЛДИРИШ, УЛАРНИНГ ТАШАББУС ВА САЛОҲИЯТИНИ РЎЁБГА ЧИҚАРИШ – БУГУНГИ КУННИНГ УСТУВОР ВАЗИФАСИДИР

2005 йилнинг 28 декабрь куни Ўзбекистон Республикаси Президенти Ислом Каримов, анъанага кўра, янги йил арафасида пойтахтимиз Тошкент шаҳридаги янги қурилишлар, ободончилик ишлари билан танишиди. Давлатимиз раҳбари, жуммадан, «Ёшлик» талабалар шаҳарчасида ҳам бўлиб, бу ерда янгитдан қурилган ва тубдан реконструкция қилинган ижтимоий объектларни кўздан кечирди.

Шаҳарчада бунёд этилган муҳташам «Маънавият ва маърифат» марказида мутасадди раҳбарлар ва бир гурӯҳ талабалар билан бўлиб ўтган амалий мулоқот ва самимий сухбат чоғида ёшлиқримизнинг бугунги ҳаёти, уларнинг замонавий таълим ва тарбия олиши учун зарур имкониятлар яратиш, ёшларнинг қалби ва онгида миллий истиқлол ғоясини янада кучайтириш билан боғлиқ муҳим масалалар ҳақида сўз борди.

Мамлакатимиз раҳбари талабалар шаҳарчасида амалга оширилган ишларнинг аҳамияти ва мөҳияти ҳақида фикр юритар экан, айниқса янги,

гўзал қиёфа касб этган ётоқхоналардаги шартшароитларга алоҳида эътибор қаратди.

Бу шаҳарчада эртага бизнинг таянчимиз ва суюнчимиз бўлиб ҳаётга кирадиган ёшлар яшайди ва билим олади, деб таъкидлади Президентимиз. Лекин, афсуски, илгари, собиқ тузум даврида бу ётоқхоналарга 50—60 минг талаба жойлаштирилган-у, уларнинг тўлақонли яшаши учун тегишли инфратузилма яратилмаган, очигини айтганда, бу ҳақда етарлича бош қотирilmagan.

Бугун биз ўтмишдан қолган оғир меросни, ўша пайтда йўл қўйилган хато-камчиликларни босқичма-босқич тузатиб боряпмиз. Қилаётган бу ишларимизнинг амалий намоёнини ёшларга яратилаётган шароитлар, янгитдан қурилаётган ва таъмирланаётган объектлар мисолида яққол кўриш мумкин.

Лекин беихтиёр шундай савол туғилади, деб ўз фикрини давом эттириди Ислом Каримов: нима учун бу ердаги аҳвол кечагина тамоман бошқача эди? Нима учун биз шундай аҳволга чидаб келдик? Нима учун аксарият олий ўкув юртларининг раҳбарлари ўз вазифасини фақат аудиториялардаги ишдан иборат деб билади?

Ахир, талабалар бор-йўғи тўрт-беш соат вақтини аудиторияда ўtkazadi. Қолган вақтини-чи, қаерда ўtkazadi? Улар шу вақт ичида қаерга боради, ким билан ошна бўлади? Бир сўз билан

айтганды, вақтини қандай фойдали ёки заарали ишларга сарфлайды?

Дарсдан кейин нима қилишини билмай юрадиган талабага, табиийки, кимдир ўз таъсирини ўтказишга уринади. Бироқ ўйлаб кўрайлик — бу доимо ҳам соғлом таъсир бўладими?

Албатта, 18—19 ёшга кирган йигит-қиз ҳаётда ўз йўлини танлаб олишга қодир бўлади. Лекин бунинг учун нима керак — аввало шарт-шароит керак. Яъни, талабаларнинг замонавий билим олиши, соғлом турмуш кечириши учун тегишли имконият бўлиши зарур. Уларга шундай шароит яратиб берилса, ҳаётда ўз йўлини ҳам, ўз ўрнини ҳам адашмай топиб олади. Чунки уларнинг ақлхуши етарли, қайси томонга бориш, ким билан дўст бўлиш, кимдан ўрнак-намуна олиш зарур — бу ёғини ўзи ҳал қиласди.

Бу борада домлалар жамоасининг — ўқитувчи ёки профессор бўладими, декан ёки ректор бўладими — умуман, ўзини шу соҳага бағишилаган одамларнинг, қолаверса, барчамизнинг асосий вазифамиз — ёшларимизнинг мустақил фикри ва дунёқарashi шаклланишига кўмаклашиш, ҳаётда ўз позицияси ва ёндашувини қатъий белгилаб олишига ёрдамлашиш, уларни онгли ва билимли қилиб тарбиялаш, ён-атрофдаги воқеаларга бепарво бўлмаслик, дахлдорлик туйғуси билан яшашга ўргатишдан иборат, деди Президент.

Бугунги кунда эски шўро давридаги каби қуруқ ташвиқот билан бирор натижага эришиб бўлмайди. Ёшларда аввало ҳаётга қизиқиш, қизиқиш ва яна бир бор қизиқиш уйготиш керак ва бу маънавий-маърифий ишларимизнинг негизини ташкил этиши лозим.

Аслида одамга қачон ва қандай шароитда таъсир ўтказиш, онги ва шуурига бирон гояни сингдириш мумкин? Қачонки, унда ўша гояга қизиқиш уйғонса. Одамнинг ўзида қизиқиш бўлмаса, табиийки, унинг миясига зўравонлик билан ҳеч нарсани сингдириб бўлмайди.

Давлатимиз раҳбари Талабалар шаҳарчасининг ўзига хос меъморий қиёфаси бўлиши лозимлигига эътиборни қаратди. Бу ерда қуриладиган ҳар бир иншоот алоҳида ёндашув билан бунёд этилиши зарур. Бу ишлар кимнинг номидан қилиняпти? Албатта, ота-оналар номидан, давлат ва ҳукумат, Президент номидан. Шунчаки у ёқ-бу ёгини бўяб, хўжакўрсинга қилинадиган ишлар, табиийки, ёшларда яхши таассурот қолдирмайди.

Айниқса, талабаларни спортга кенг жалб этиш мақсадида амалга ошириладиган қурилишларга алоҳида эътибор бериш лозим. Мисол учун, бу ерда барпо этиш мўлжалланаётган спорт бассейни масаласини олайлик. Аввало, бу иншоотни дунё андозаларига мос ҳолда қуришимиз керак.

Бироқ шуни рўйиҳа қилиб, унинг нархини осмонга кўтариб юбориш ҳам ярамайди. Токи эртага бу ерга кириш, ундан фойдаланиш учун ҳамма талабаларнинг имконияти бўлсин.

Умуман, талабалар яшайдиган жойда ҳамма масала адолатли ҳал этилиши даркор. Чунки ёшлилар таъсирчан бўлади, адолат бузилишини ҳаммадан ҳам кўп айнан ёшлар юрагига яқин қабул қиласди.

Яна бир масала — талаба қизларимизнинг спорт билан оммавий равишда шуғулланиши учун ҳар томонлама имконият туғдирни бериш керак. Боулинг, стол тенниси, бадий гимнастика каби спорт турларини қизларимиз учун энг ёқимли, керак бўлса, давр талаб қиласидиган спорт ўйинлари, десак, тўғри бўлади.

Мана, бизда қизларимиз орасида стол тенниси бўйича Намангандан, Навоийдан чиқсан жаҳон чемпионлари бор. Уларнинг ютуқларини кўриб, эшишиб, одам ҳайратда қоладики, энди гина 16—18 ёшга кирган ўзбек қизлари Ватанимиз номини бутун дунёга тараннум этяпти.

Кисқача айтганда, талабаларнинг бўш вақтини фойдали машғулотларга жалб этиш учун бор имкониятларнинг ҳаммасини ишга солишимиз лозим.

Президент Ислом Каримов Мирзо Улугбекномидаги Ўзбекистон Миллий университетига қараш-

ли тураржойларни жиҳозлашда, аввало, ёшлар эркин нафас оладиган, уларнинг мустақил фикри ва эътиқодини мустаҳкамлайдиган, муҳими, ўзи ва атрофдагиларга бўлган ишонч, ҳурмат ҳиссини кучайтирадиган ижтимоий-маънавий мухит яратиш зарурлигига эътиборни қаратди.

Масалан, талабалар тураржойига кираверишда ўрнатилган, замонавий технологиялар билан жиҳозланган турникетлар хавфсизлик ва тартиб-интизомни таъминлашни кўзда тутади, деди Юргашимиз. Тартиб-интизом керак, албатта, лекин масалага бир томонлама ёндашиб, шахс эркинлигини қандайдир чеклаб қўйиш ярамайди.

Аслида бу биноларнинг эгаси ёшлар эканини унутмаслик, бинобарин, уларни ҳар қадамда тергаш эмас, ҳар бир йигит-қизда ўз тураржойига нисбатан меҳр уйғотиш ҳақида кўпроқ ўйлаш лозим. Токи улар ана шу жойларни ўз хонадонларидек асрраб-авайлашни талабалик бурчи сифатида англайдиган бўлсин.

Замонавий мебеллар, зарур жиҳоз ва техника воситалари, майший ускуналар билан таъминланган компьютер ва спорт заллари, ювениш хоналари, кутубхона ҳамда ошхоналар билан танишар экан, Президентимиз бу шароит ва имкониятлардан оқилона фойдаланиш ёшларимизнинг маданий савиясини оширишга хизмат қиласи ва айни пайтда уларнинг билим ва тафаккури, дунё-

қарашига ҳам ижобий таъсир кўрсатади, деб таъкидлади.

Абу Райхон Беруний номидаги Тошкент техника университетига қарашли талабалар туаржойларида ёшларнинг яшаш шароити, дам олиб ҳордиқ чиқариши учун намунали шароит яратилгани барчамизни мамнун этади, деб ўз сўзи ни давом эттириди Ислом Каримов. Бундай имкониятларни Қорақалпоғистон Республикаси ва барча вилоятлардаги талабалар туаржойларида ҳам вужудга келтириш даркор.

Шундан сўнг Президентимиз бир гурӯҳ талабалар билан суҳбатлашди, уларнинг ўй-фикрлари, орзу-интилишлари ва келажакдаги режалари билан қизиқди.

Ислом Каримов. Менинг биринчи саволим шуки, сизлар қаердансиз, қайси олий ўкув юртларида ўқийсиз?

Нодира Алиохунова. Мен Тошкент давлат техника университетининг энергетика факультети, 2-курс талабасиман, асли фаргоналиkmан.

Ислом Каримов. Нима учун айнан энергетика факультетига кирдингиз?

Нодира Алиохунова. Бугунги кунда дунёда энергетика соҳасига талаб жуда кучли. Худо хоҳласа, мен шу танлаган қасбимнинг етук мутахассиси бўлиб, Ватанимнинг янада тараққий этишига ўз ҳиссамни қўшмоқчиман.

Ислом Каримов. Албатта, энергетика кела-жакда янада муҳим роль ўйнайдиган тармоқ. Лекин энергетика масаласини ҳозир дунёда кўтчилик бошқача тушуняпти. Яъни, кимда-ким нефть ва газ захираларига хукмронлик қилса, дунёга хукмрон бўлиши мумкин, деган қарашлар кучайиб бормоқда. Ва аксинча — кимдаки шундай ресурслар бўлмаса, нефть-газ, умуман, углеводород хом ашёсига эга бошқа давлатларга нисбатан турли хилдаги хуружга ўхшаб кетадиган ҳаракатлар ҳам содир бўляпти. Чунки қудратли давлатлар яхши биладики, мана шундай бойлик кимнинг қўлида бўлса, у бошқаларни ўз таъсирига олишнинг калити, воситаси бўлиб хизмат қиласи.

Шу йилнинг 14 май куни Андижон воқеалари муносабати билан ўтказилган матбуот анжуманида мен хорижий мухбирларга, нима учун океан ортидаги айрим катта давлатлар ўзининг демократия моделини олға силжитиш масаласида асосий эътиборни факат углеводород захирасига бой худудларга қаратади, деган савол билан мурожаат қилган эдим, бирортаси ҳам жавоб бера олмади.

Чунки бунинг тагида бошқа нарса бор. Нима учун бундай давлатлар Яқин Шарқ миңтақасида демократия ўрнатмоқчи? Нима учун бундай ҳаракатлар Каспий дентизи атрофидаги мамлакатлар-

да, Марказий Осиё минтақасида айниқса кучайиб боряпти?

Боиси — бу ҳудудлар, жумладан, бизнинг заминимиз табиий ресурсларга бой. Энергетика — тараққиётнинг қалити, керак бўлса, манбаи. Бугунги кунда энергетика соҳаси тараққий этмаса, бирон-бир соҳа ёки тармоқ ривож топмайди. Нафакат ишлаб чиқариш соҳаси, балки одамзотнинг кўпгина қундалик эҳтиёжларини қондириш масалалари ҳам ҳар жиҳатдан энергетикага бориб тақалишини, шу сабабли бу масала ҳозирги вақтда муҳим геополитик масалага айланниб бораётганини, ўйлайманки, сизлар яхши тушунасиз. Шунинг учун сиз таълаган касб албатта керак.

Хуршида Рапиева. Мен Сурхондарё вилоятининг Олтинсой туманидан келганман. Ҳозирда Мирзо Улугбек номидаги Ўзбекистон Миллий университети тарих факультетининг 1-курсида давлат гранти асосида таҳсил оляпман.

Ислом Каримов. Жуда яхши, сизнинг интилиш ва орзу-ниятларингиз, ўйлайманки, нафакат мени, балки бугунги ёшларни ҳам қизиқтирса керак. Тарихни ўрганишнинг аҳамияти ҳақида гапирганда бир иборани ишлатсак, ҳаммаси аён бўлади. Яъни, тарихни билмаган авлоднинг келажаги йўқ.

Шу биргина иборада ҳамма нарса айтилган. Тарихни билмаган, тарихдан сабоқ олмаган ин-

сон нафақат олис ва яқин аждодлари қандай яшагани, ўзи мансуб бўлган миллат қандай шаклланганини, балки келажагини ҳам тасаввур қилолмайди.

Ўзингиз ўйланг, агарда биз Амир Темур бобомиз фаолиятини, у яшаган даврни, умуман, бутун дунё тан олган бой тарихимизни билмасак, шу заминдан етишиб чиққан буюк мутафаккирларимизнинг мероси билан таниш бўлмасак, келажаги буюк давлат қуришимиз мумкинми? Шунинг учун ҳам бир ҳақиқатни доимо ёдда тутишингизни истардим: бизнинг келажагимиз, эртанги кунимиз тарих билан, кечаги ҳаёт билан узвий боғлиқ. Шу маънода, табиий савол туғилади: инсонда ғуур қачон пайдо бўлади?

Дилрабо Жўраева, Тошкент давлат техника университети иқтисодиёт-менежмент факультетининг З-курс талабаси. Ғуур-ифтихор туйғуси — Ватан тарихини билган, ўзини англаб етган инсондагина пайдо бўлади. Инсон қачонки ўзининг она юрт фарзанди эканини англаса, аждодлари амалга оширган, мерос қолдирган ишларни кўриб, тушуниб, қадрига етса, буларнинг барчаси унда ғуур уйғотади.

Мисол учун, биз бугун ўзимиз яшайдиган Талабалар шаҳарчасида яратилган мана шундай кулай шароитларни кўриб, қалбимизда ғуур

ҳислари пайдо бўлмоқда. Масалан, мен шундай шароитларда ўқиб, билим олишга мусассар бўлганимдан фахрланаман.

Мен иқтисодчи бўлмоқчиман, келгусида Олмалиқ кон-металлургия комбинатининг иқтисодиётини қўтариш, уни янада ривожлантириш, қазиб олинаётган хом ашёнинг сифатини ошириб, стратегик аҳамиятга эга бўлган захирани давлатимиз равнақи учун хизмат қилдиришта ҳисса қўшишни ният қилганман.

Ислом Каримов. Раҳмат. Ифтихор ҳақида гап кетганда, рухсат берсангиз, бу масала бўйича мен ҳам ўз фикримни билдирсам. Биласизми, ғурур-ифтихор одамда қачон пайдо бўлади? Авваламбор, инсон салоҳиятга эга бўлган тақдирда. Бундай одамда табиий ғурур пайдо бўлади ва у, мен кимнинг авлодиман, қандай катта куч ва имкониятга эгаман, деган ифтихор туйғуси билан яшайди. Такрор айтаман, ғурур дегани — бу салоҳият дегани.

Шу билан бирга, фахру ғурур соҳиби бўлиш учун инсон интеллектуал бойликка эга бўлиши керак. Одам қанча чуқур билимга эга бўлса, дунёни яхци билса, ён-атрофда бўлаётган воқеаларни фалсафий жиҳатдан тўғри англай олса, шундан кейингина унда ғурур-ифтихор бўлади. Шундагина жуда мураккаб, таҳликали дамларда ҳам кўпчилик унга мурожаат қилиб, маслаҳатла-

шади. Маслаҳат кимдан сўралади — авваламбор, салоҳиятли одамдан, катта фалсафий билим ва интеллектуал бойликка эга бўлган кишидан.

Шунинг учун бу ҳақда гапирганда биз нафақат Мусо Хоразмий, Абу Райҳон Беруний, Ибн Сино, Мирзо Улуғбек каби буюк алломаларимиз, балки муқаддас заминимизда хоклари ётган Имом Бухорий, Имом Мотуридий, Бурҳониддин Марғиноний, Баҳоуддин Нақшбанд сингари азиз-авлиёларимиз билан ҳам ғуурланишимиз керак. Улар қолдирган буюк меросга биз, уларнинг авлоди бўлиб, нима улуш қўшамиз, бу бойликни кўпайтиришда бизнинг ҳиссамиз қандай бўлади, деган саволни ҳар қайсимиз, авваламбор ёшлар, ўзимизга бериб яшашимиз лозим. Шундагина аждодларимизга муносиб бўлиб, уларнинг ишини давом эттириш учун белни маҳкам боғлаб, интиламиз, ўзимизга қандайдир куч-қувват топамиз. Табиийки, буларнинг барчаси фахр-ифтихор туйгуси, унинг амалий намоёни бўлиб, бизнинг ҳаётимизда ўз натижасини беради.

Сиз қайси олий ўқув юртида ўқийсиз?

Жавоҳир Кудратов. Мен Ўзбекистон Миллий университети журналистика факультетининг 1-курс магистрантиман.

Ислом Каримов. Келгусидаги мақсадингиз нима?

Жавоҳир Кудратов. Мақсадим — матбуот орқали давлатимиз ва халқимизнинг миллий манфатларини ҳимоя қилиш, холис журналист бўлиш ва шу йўлда бор куч-ғайратимни сарфлаш.

Ислом Каримов. Биласизми, чиройли йигит экансиз, гапларингиз ҳам маъноли, ниятингизга етинг. Менинг орзуим шуки, ўзбек йигит-қизларидан ҳам чет тилларни чукур биладиган, дунёда тан олинган, халқаро майдонда танилган журналистлар чиқса.

Маълумки, ҳозир телевидение ва ахборот коммуникациялари жуда тез суръатлар билан ривожланиб боряпти. Шундай пайтда, қани эди, бизнинг миллатимиздан ҳам ана шундай журналистлар чиқса, деб ҳавас қилиш, ўйлайманки, ўринлидир.

Афсуски, бизнинг шарҳловчиларимиз шу дарражага кўтарила олмаяпти, ҳамон заиф бўлиб қоляпти. Шунча имкониятлар бўлатуриб, нима учун журналистларимиз халқаро майдонга чиқолмаяпти? Нима учун ғанимларимиз юртимиз, халқимиз ҳақида турли афсонаю бўхтонларни тарқатганда уларнинг аксарияти жим туради? Ҳеч бўлмаса, ўзимизнинг матбуот, телевидение орқали дадил, ҳар томонлама асосланган маълумотлар билан ҳақиқатни очиб бериш мумкин-ку!

Ҳолбуки, бугун одамларни жуда кўп масалалар қизиқтиради. Ҳозирги пайтда пойтахтимиз,

вилоят ва туман марказлари ўз йўли билан, ҳатто олис қишлоқларда яшайдиган болалар ҳам аввалгидан ўн чандон ўткир. Улар билан гаплашсангиз, шундай саволларни берадики, уларга ҳамма ҳам жавоб тополмайди.

Менинг фикримча, журналист албатта маълум бир соҳага ихтисослашган бўлиши керак. Мен журналист касбининг нақадар оғир ва мураккаб эканини тан оламан. Журналист бўлиш учун истеъдол ва маҳорат, билим ва тажрибадан ташқари жасорат ҳам керак.

Агар Аллоҳ иқтидор бермаган бўлса, журналист бўлиш мушкул. Журналистнинг нафақат қалами, балки зеҳни ва мантиқий тафаккури ҳам ўткир бўлиши керак. У воқеаларнинг мантиқий ҳалқасини топиб, ҳақиқатни юзага чиқара оладиган, ҳар қандай рақиб ёки оппонент билан тортишишга, мунозара юритишга қодир инсон бўлиши лозим. Оғир карvon бўлиб, уялиб, тортиниб юриш журналистларга тўғри келмайди. Журналист ҳаётнинг ҳеч бўлмаса бир соҳасини ҳар томонлама чуқур эгаллаган, шу бўйича ихтисослашган бўлиши лозим. Шундай журналистгина таҳлилий тафаккур ва таъсирчан услуб соҳиби бўлиб, ўта мураккаб масалаларни ҳам оддий ва тушунарли тилда ифодалаб одамларга етказиши, уларнинг ҳис-туйғуларини уйғота олиши мумкин.

Бугунги жамият аъзолари ана шундай журналистга қулоқ солади, унинг галларига ишонади. Телевидение ёки радио, газета ёки журнал бўладими — қаерда чиқиш қилмасин, ҳамма унинг фикри билан танишишга ҳаракат қиласди.

Кейинги йилларда мамлакатимизда оммавий ахборот воситалари ривожига катта эътибор бериб келинмоқда. Айни вақтда журналист кадрларни тайёрлаш тизимини тубдан такомиллаштириш масаласи ҳамон долзарблигича қолмоқда. Шу борада журналистларнинг муайян соҳаларга ихтисослашувини таъминлаш мақсадида Ўзбекистон Миллий университети қошида икки йиллик ўқув курсларининг ташкил этилиши ҳам радио, телевидение, матбуот учун юқори малакали кадрларни тайёрлашда муҳим аҳамият касб этади.

Бу курсларда биринчи навбатда олий ўқув юртини битириб, маълум бир касб соҳасини эгаллаган кишилар журналистиканинг сир-асорорини ўрганиши, қаламини чархлаши керак. Шундан кейин журналист, ўйлайманки, воқеликка дилетантлик билан саёз ва юзаки ёндашиш хавфидан халос бўлиши мумкин.

Адабиётга қизиқадиган айрим ёшлар журналистика факультетига ўқишига киришга, келгусида шу касбни эгаллашга қизиқади. Хўп, боланинг табиий истеъоди бўлса, у келажакда шоир

ёки ёзувчи бўлиб етишиши мумкин. Аммо, бара-ка топкур, журналистика бу — бошқа масала. Бадиий ижод билан журналистиканинг фарқи бор. Бадиий ижодда хаёл, тафаккур, фантазия иш бериши мумкин. Чунки у аниқ билим ва далилларни кўп ҳам талаб қиласкермайди.

Журналист авваламбор публицист бўлиши зарур. Лекин ҳозирги пайтда журналистикада бирон соҳани чуқур билмасдан, аниқ ихтисосликка эга бўлмасдан туриб, жиддий бир нарса ёзиб бўладими? Ахир, журналистнинг ҳар бир сўзи қанча-қанча одамлар, ташкилотлар, қолаверса, бутун жамият ҳаётига дахлдор бўлади.

Масалан, бирон-бир редакция ёш журналистни бир корхона ёки вилоят ҳаётини, у ердаги ислоҳотлар жараёнини ўрганишга юборади. Айтинг-чи, агарки унинг аниқ ихтисослиги, ҳаётий тажрибаси бўлмаса, нимани ўрганади ва қайси томондан ўрганади? Етарли билими бўлмагач, нима қиласди — одамлар, раҳбарлар айтган гапни куруқ қофозга тушириб, шундан хулоса чиқариб, мақола тайёрлайди. Лекин ўзининг мустақил фикрига эга бўлган журналист авваламбор қаламга олаётган мавзуни қалби ва юрагидан, бутун вужудидан ўтказади. Шундан кейингина унинг тайёрлаган мақоласи ёки кўрсатуви одамларда қизиқиш уйғотиши, ижтимоий ҳаётга қандайдир таъсир кўрсатиши мумкин.

Суҳоат жараенида давлатимиз раҳоари маънавий-маърифий тарбия масалаларига алоҳида тўхталди.

Биз бугунги ҳаётимиз, хусусан, ёшларимизнинг баркамол инсон бўлиб ўсиб-улгайиши, жамиятда ўз ўрнини топиши билан боғлиқ масалаларнинг маънавий томоннига катта эътибор бераётганимиз бежиз эмас, деб таъкидлади Юртбошнимиз.

Баъзи ёшларимиз лавозим поғоналарида тезроқ ўсиш ва улгайишни хоҳлайди. Уларни бунга ким даъват қиласди? Албатта, ота-онаси. Улар, сен ҳам бошқалардек катта ишларга кўтарилгин, масъул вазифаларни эгаллагин, дейди. Одатда кексаларимиз ҳам дуойи фотиҳа қилганда, мартабангиз улуғ бўлсин, янада ошсин, деган гапларни айтади.

Бундай ният ва тилаклар албатта яхши. Лекин, менга буюрса, ёшларни дуо қилганда, аввало инсон бўл, бир қасб ёки хунарни чукур эгалла, ота-онангни, эл-юртингни рози қил, деган сўзларни айтсак, янайм яхшироқ бўларди.

Иккинчидан, ҳақиқий инсон етук мутахассис бўлиш билан бирга, юксак маънавият эгаси ҳам бўлиши лозим.

Бу ҳаётда кимгадир раҳбарлик қилиш учун эса кўп ўқиб-ўрганиш, бошқаларга ҳар томонлама ибрат бўлиш зарур. Раҳбарлик қилиш дегани —

бу кимгадир талаб қўйиш, одамларни бошқариш, уларга иш ўргатиш, масъулиятни ўзига олиб, қатъият кўрсата олиш дегани. Энди ўйлаб кўринглар, бирдан юқори мансабга кўтарилиган одам бу фазилатларнинг барчасини қандай эгаллайди? Амал зинасидан жуда тез кўтарилиган одамнинг бу борада мўрт ва заиф бўлиб қолмаслигига ким кафолат беради?

Ахир, лавозим курсисига ўтириб, оғир ва масъулиятли вазифалар бўйинга тушгандан кейин ўқиб-ўрганишга, орқага қайтиб бошқатдан талаба ёки шогирд бўлишга имкон бўлмайди. Шунинг учун, сизларга қарата, эй болаларим, эши-тинглар, деб мурожаат қилмоқчиман: эртага бирданига кўтарилеман, катта амалдор бўламан, мансабга эришаман, деб яшашни ўзингизга эп кўрманг. Мансабга интилиб яшаш — бу аслида энг хунук одат.

Агар яхши инсон, етук мутахассис бўлсангиз, мана шу замин манфаатлари йўлида ёниб яшайдиган бўлсангиз, эл-юртнинг, ҳайётнинг ўзи сизни кўтаради. Халқимизда нарвонга ҳам аста-секин чиқилади, деган гап бор. Ҳеч қачон унутманглар, бу дунёда ҳамма нарса аста-секин, ўз йўли билан бўлади.

Очиғини айтадиган бўлсам, мени доимо ҳар томонлама қийнаб келадиган муаммо шуки, бирор масъул лавозим, айтайлик, бирорта вазир-

нинг ўрни бўшаса, шу жойга муносиб одам топиш — мен учун энг оғир масала. Бу ҳаётда турли қийинчилик ва синовларни бошидан кечирган, қуи ва ўрта лавозимларда ишлаб, тажриба ортирган, дунёнинг пасту баландини кўрган одамгина эл-юрт ўртасида ҳурмат-эътибор топади, раҳбарликнинг машаққатли юкини кўтаришга тайёр бўлади.

Аввало, инсон бўлиш, малака ва тажриба ортириш, ҳаётдан зарур сабоқ чиқариш, кўпроқ билимга эга бўлишга ҳаракат қиласангиз, бас — қолгани ўзи келаверади. Мен бу гапларни кўпни кўрган, кўп жойда ишлаган одам сифатида айт япман.

Қани, сұхбатимизни давом эттирсак. Сиз қаерда ўқийсиз?

Камола Эрматова. Мұхтарам Ислом Абдуғаниевич, биз, энг аввало, ёшларга бу қадар катта эътибор берәётганингиз учун сизга чин дилдан ташаккур билдиromoқчимиз. Сизнинг фармонингиз билан 1999 йил 10 июня юртимизда Зулфия номидаги давлат мукофоти таъсис этилган эди. Мен ана шу юксак мукофот совриндорларидан бири бўлганимдан ҳақли равишда фаҳранаман.

Ҳозирги кунда Ўзбекистон Миллий университети журналистика факультети талабасиман. Биз журналистикани оламни титратадиган соҳа, деб

биламиз. Журналистика, етук кадрларга эга бўлса, жуда кўп жойларга кириб бориши мумкин.

Ислом Каримов. Журналистика дунёни яхши маънода титратса, майли, мен қарши эмасман (кулги). Сиз нима дейсиз?

Бахтиёр Маъруфбоев. Аввало, ўзимни таништириб ўтсан: мен Ўзбекистон Миллий университети фалсафа факультетининг 1-курс магистрантиман. Донишмандлар, зийрак ва огоҳ одам ҳамма нарсадан ҳикмат топиши мумкин, деган экан. Шунинг учун мен фалсафа фанини, оламнинг моҳияти, жамият ва табиат уйғунлиги ҳақидаги билимларни ўрганмоқчиман.

Ислом Каримов. Дарҳақиқат, фалсафа барча фанларнинг отаси. Фалсафани билмайдиган одам — медицина ёки таълим, санъат ёки маданият соҳаси вакили бўладими, бундан қатъи назар — ҳаётнинг, ўз касбининг маъно-мазмунини яхши тушунмайди. Мисол учун, тарихни таҳлил қилиш учун ҳар бир воқеа ва жараёнга фалсафий қараш, уларни умумлаштирган ҳолда зарур хуолосалар чиқара олиш керак. Шу боис тарихчи бўлиш учун фалсафий тафаккур қобилиятига эга бўлиш даркор.

Фалсафанинг ўзагини ташкил этадиган диалектика фани бўйича ҳозир олий ўқув юртларимизда қандай дарсликлар бор? Дунёни диалектик нуқтаи назардан баҳолашда, бугунги ўта му-

раккаб ва шиддатли жараёнларни англаш, уларга муносабат билдиришда қайси йўналишлар сизларга маъқул? Бизда шўро давридаги фалсафий қарашлар, афсуски, ҳали-бери ўз таъсирини сақлаб келяпти. Мисол учун, ўша пайтлари Кант, Гегель, Фейербах, Ницше, Вейсман, Фрейд каби Farb файласуфларининг назариялари мутлақо ўрганилмас, уларнинг тоялари фақат асоссиз танқид қилинар эди.

Бу масалада бундай бир ёқлама қарашлардан мутлақо воз кечиш лозим. Ўйлайманки, ана шундай файласуфларнинг таълимотига ҳали ҳам шубҳа билан қараб, уларни ўрганмайдиган бўлсак, билиб қўйинглар, ўзимизни, фалсафий тафаккуримизни анча чеклаб, ғариб-камбағал қилиб қўйган бўламиз. Қайсиdir файласуф, бизга ёқадими-йўқми, бундан қатъи назар, унинг асарларини барибир билишимиз, ўрганишимиз керак.

Дунёни англаш, ҳаёт ва жамият қонуниятларини ҳар томонлама идрок этиш, ер юзидағи турли халқлар ва миллатлар дунёқарashi, тояси, маслак-муддаоларини билиш учун ҳам фалсафа фанини кент ва атрофлича ўрганиш даркор. Бир сўз билан айтганда, ёшларимизни фалсафий тафаккур билан куроллантириш — давр талаби. Нега деганда, бугунги замонда ҳар қандай рақиб ва мухолиф билан баҳсга киришиш учун унинг қарашлари ва тояси, фалсафасини кўпроқ били-

шимиз, керак бўлса, унинг ўзидан ҳам пухтароқ эгаллашимиз лозим. Мен ана шундай ёндашув тарафдориман.

Мисол учун, фалсафада сабаб ва оқибат деган категория бор, сизлар уни қандай тушунасиз? Агар вақтим bemalol бўлғанда, бу ҳақда батафсил гапиришим мумкин эди.

Афсуски, ҳаётда биз кўпинча сабаб ва оқибат ўртасидаги доимий боғлиқлик ва муносабатларни тушунмаймиз. Биз амалий ҳаётимизда кўпинча оқибатни сабаб ўрнида қабул қиласиз, сабабни эса оқибат деб тушунамиз. Аслида, сабаб ва оқибат ўртасидаги боғлиқликнинг ўзи диалектикадир.

Мана, демократия ҳақида кўп гапирамиз. Биз, албатта, Европани ҳам, Американи ҳам, Японияни ҳам, улар танлаган демократия йўлини ҳам ҳурмат қиласиз. Аммо шуни ҳам айтиш керакки, кимлардир четдан туриб ўзининг демократия моделини бизга ҳам жорий қилишга уринмоқда.

Биз уларнинг ўзига хос ҳаёт тарзи, ўзига хос қарашлари, фалсафаси борлиги ва ҳар бирининг тараққиёт йўли ана шу қадриятларга асосланишини эсдан чиқармаслигимиз лозим. Шундай экан, нима учун дунёning нариги бир чеккасида шаклланган, универсал модель сифатида мақталаётган демократия модели бошқа бир мамлакатда, дейлик, бизнинг юртимизда зўравонлик билан ўрнатилиши керак?

Ахир, бизнинг минг йиллар давомида шаклланган, неча-неча замонлар синовидан ўтиб, безавол яшаб келаётган ўзига хос урф-одат ва қадриятларимиз, турмуш тарзимиз, умуман, бошқалардан ажralиб турадиган миллий хусусиятларимиз бор. Модомики шундай экан, кимлардир оғиз кўпиртириб мақтаётган ўша «универсал демократия модели» бизнинг муқаддас динимизга, ҳаёт тарзимиз ва қарашларимизга, миллий манфаатларимизга қанчалик тўғри келишини ўйлаб кўришимиз лозим.

Мана, кўринглар, Европада, Farb дунёсида нима бўляпти? Англиялик Элтон Жон деган таникли бир кўшикчи эркак бўлатуриб бошқа бир эркак билан оила қурибди. Инсонийликка мутлақо зид бўлган бундай ахлоқсизликни ҳам кимлардир «демократия», «эркинлик» намунаси сифатида бутун дунёга тарғиб қиляпти. Эй барака топкур, бу ахир демократия эмас, одамларни йўлдан оздирадиган қипқизил бузғунчилик эмасми?

Ахлоқ-одобни инсоннинг энг катта бойлиги деб биладиган бизнинг динимиз буни ҳеч қачон қабул қилмаслигини яхши биламиз. Лекин буни қайси дин қабул қиласди? Христианлик қабул қиласдими — йўқ. Хўш, шундай фалсафа, шундай демократия, шундай ҳаёт тарзи бизга тўғри келадими?

Агар демократия ниқоби остида шундай бемаза ишлар қилинадиган бўлса, бунинг асл мақ-

сади ва сабаби, илдизини аниқламасдан, теран англамасдан туриб, тўғри хулоса чиқариб бўладими? Шунинг учун ҳам фалсафани, диалектикани чуқур билиш керак.

Такрор айтаман, ҳаёт — бу диалектика дегани. Чунки ҳаётдаги барча воқеалар бир-бири билан чамбарчас боғланиб кетган.

Қани, яна ким гапиради?

Азамат Назаров. Мен Мирзо Улуғбек номидаги Ўзбекистон Миллий университети психология бўлимининг 1-курс аспирантиман. Асосий йўналишим ижтимоий психология бўлгани учун ҳозирги кунда Куролли Кучларимизда хизмат қилаётган аскар ва офицерлар фаолияти мисолида ҳарбий психология бўйича илмий-амалий тадқиқотлар олиб боряпман. Шу билан бирга, ўзимнинг маҳсус дастуримни тузмоқчиман.

Ислом Каримов. Яқинда Тошкентда Ломоносов номидаги Москва Давлат университетининг филиали очилишидан хабардормисиз?

Азамат Назаров. Бундан хабарим бор.

Ислом Каримов. Психология фани биз учун энг зарур соҳалардан бири, десак, тўғри бўлади. Ана шу филиалнинг очилиши муносабати билан Россиядан психология бўйича ҳам етук мутахассислар келади. Психологияни ўрганиш — ҳаётни, инсонни ўрганиш дегани. Керак бўлса, раҳбарлик қилмоқчи экансиз, етакчи бўлиб одам-

ларга күрсатма бермоқчи экансиз, олдин уларнинг психологиясини ҳар томонлама ўрганиш керак. Бунинг тагида жуда катта маъно бор.

«Ёшлик» талабалар шаҳарчасидаги «Маънавият ва маърифат» марказида «Нафосат» клуби ташкил этилган бўлиб, у ерда қизларни ҳаётга тайёрлаш, уларнинг эстетик дидини шакллантириш, айниқса, кийиниш маданияти масалаларига алоҳида эътибор қаратилади. Бўлиб ўтган эркин ва самимий сухбат чорида кийиниш борасида миллийлик ва замонавийликни уйғулаштириш хусусида ҳам давлатимиз раҳбари ўз фикрларини билдириди.

Мен шунинг тарафдориманки, кийиниш маданиятида албатта миллийлик бўлиши керак, деди Ислом Каримов. Бироқ, миллийликни қандайдир бир ёқдама тушуниш ҳам нотўғри. Аслида, бу масалада ҳам эркинлик бўлиши зарур.

Агар ҳозирги пайтда кийиниш борасида ҳаёт нимани талаб қиласди, деб сўрасангиз, мен мутахассис эмасман-у, лекин ўз фикримни айтишим мумкин. Биринчи талаб — эркинлик. Одам ўзини ҳар қандай либосда ҳам эркин ҳис қилиши керак. Мисол учун, баъзи бир ёшлар тор оёқ кийим кияди. Балки бу модадир, лекин инсон бу пойабзални кийганда бемалол юролмаса, бундай мода ўзини оқладими?

Шунинг учун, мода — мода билан, аммо одам ҳар қандай либосда ҳам ўзини эркин сезиши ло-

зим. Демак, аввало эркинлик, ундан кейин мода бўлиши керак. Умуман, бу икки талаб ўзаро уйгунлашиши, эркинлик албатта мода билан ёнмаён юриши зарур.

Қолаверса, кийим танлаш ва кийинишда ёшли-римиз миллий турмуш тарзимизга, Ўзбекистон шароитига, иқлинимизга мос жиҳатларни инобатга олишса, фойдадан холи бўлмайди. «Нафосат» клуби фаолиятини амалга оширишда ана шу фикрларни ҳам эътиборга олсангиз, маъкул бўларди.

Мана, бутун шундай гўзал ва шинам туарржойлар сизларнинг ихтиёрингизга берилмоқда. Бундай уй-жойларни қуришдан асосий мақсад — ёшларнинг қалбидаги жўшқин интилиш ва ҳавасларни, керак бўлса, талабларни рўёбга чиқаришдан иборат. Шунинг учун менинг ниятим, менинг даъватим — бундай уй-жойлар янада кўпайсин.

Энди бу биноларни кўз қорачиғидай асраб, бу ердаги шароитлардан оқилона фойдаланиш сизларнинг ўзингизга, ҳар бирингизнинг тиришқоқлигингиз ва ташаббускорлигингизга, янгиликка интилиб яшашингизга боғлиқ. Агарки бу шароитларни қадрлаб, ёшликтининг ҳар дақиқасини ганимат билиб, қунт билан ўқиб-ўргансангиз, камолотга Эришиш учун астойдил интилсангиз, биз, ота-оналар, устоз-мураббийлар сизлардан албатта рози бўламиз, сиз билан фахрланаб юраймиз, деди пировардида Ислом Каримов,

ЎЗБЕКИСТОН ХАЛҚИГА ЯНГИ ЙИЛ ТАБРИГИ

Азиз ватандошлар!

Мұхтарам отақон ва онахонлар, опа-сингиллар, дүстларим, биродарларим!

Мана шу файзли ва шукухли дақиқаларда барчангизни янги — 2006 йил билан қызғын муборакбод этаман ва сизларга қалбимдаги әзгу тилякларимни, самимий меҳр ва ҳурматимни билдиришдан баҳтиёрман.

Янги йил арафасида, табиийки, барчамиз якунига етиб бораётган 2005 йилнинг ўзимиз ва оиласиз, халқимиз ва мамлакатимиз ҳаётидаги ўрни ва аҳамияти, моҳиятини беихтиёр хаёлилиздан ўтказамиз.

Ҳеч шубҳасиз, ўтиб бораётган йил эл-юртимиз ҳаётида чукур из қолдираётган йил бўлиб қолиши муқаррар.

Ўтган вақт мобайнида әзгу мақсадларимиз сари — юртимизда барқарорликни сақлаш, ҳаётилизни янгилаш, йўлимизда тўсиқ бўлиб турган асоратлардан воз кечиш, демократик давлат, очиқ

фуқаролик жамиятини барпо этиш, эркин ва барчамизга тенг имкониятлар яратиб берәётган иқтисодиётимизни ривожлантириш, муқаддас қадриятларимизга мос маънавиятимизни юксалтириш йўлида янги қадамлар қўйдик.

Мамлакатимиз тараққиётининг мезони бўлмиш ислоҳотларни янада чуқурлаштириш, юртдошларимизнинг мулкка эгалик ҳиссииётини кучайтириш, тадбиркорлик ва ишбилармонлик, бизнес ва фермерлик ҳаракатига равон йўллар, кенг имтиёзлар очиб бериш, тўпланиб қолган ижтимоий муаммоларни ечиш, аҳоли тураржойларини обод этиш ва коммунал хизматни тартибга солиш каби масалаларда амалга ошираётган саъй-ҳаракатларимиз ўз самарасини бермоқда.

Бунинг тасдигини мамлакатимиз ривожида, авваламбор, иқтисодиётимиз барча етакчи соҳа ва тармокларининг барқарор ўсиш суръатларida, юртимизга кенг кўламда кириб келаётган инвестиция ва сармояларда, замон талабига жавоб берадиган янги корхона ва ижтимоий иншотлар, лицей ва коллежларда, бошқатдан қурилган ва таъмирланган мактаб ва шифохоналаримизда, улкан ободончилик ишларимизда — мухтасар қилиб айтганда, шаҳар ва қишлоқларимиз, бугунги ҳаётимизнинг қиёфаси кундан-кунга очилиб бораётганида кўриш қийин эмас.

Айниқса, ризқ-рўзимиз манбаи бўлган қишлоқ хўжалиги, пахтачилик ва фаллачилик тармоқларида қўлга киритган юксак мэрраларимиз, албатта, барчамизни қувонтирумасдан қолдирмайди.

Бу ҳаракатларимизнинг пировард натижаси аҳолимизнинг реал даромадлари жорий йилда қарийб 22 фоизга, ойлик иш ҳақи, пенсия, стипендия ва нафақалар ўртача 40 фоиз ўсишида намоён бўлди.

Албатта, якунига етиб бораётган йил биз учун осон бўлмади. Кундалик ҳәётимизда, иқтисодий ва ижтимоий муаммоларни ечишда қўпгина қийинчиликларга дуч келдик.

Ёвуз мақсадларни кўзда тутиб уюштирилган тажовузкор террорчи чиқишлиарни бартараф этишга, юртимизга қарши четдан ташкил қилинган ҳамла, бўхтон ва тухматларни бошимиздан кечиришга тўғри келди.

Яратганимизга минг шукроналар бўлсинким, мана шундай ўта таҳликали ва оғир вазиятда биз юртимизда тинчлик ва осойишталикни сақлашга, гаразли хуруж ва оғатларни ентишталиктайтишга келди.

Ўзбекистонни олиб бораётган мустақил сиёсатидан қайтариш, бизни кимгадир қарам қилиш ҳаракатлари беҳуда, пуч эканини намоён этдик.

Қадрли дўстлар!

Кириб келаётган янги йилда биз истиқолимизнинг ўн беш йиллик қутлуғ тўйини нишонлаймиз, яъни, шарқона ҳикматга кўра, айни навқиронлик, балоғат палласига қадам қўямиз.

Йиллар, замонлар ўтади, балки бутун содир бўлган кўп воқеа ва ҳодисалар хаёлимиздан кўтарилиши мумкин. Лекин яхшилик ва сахийлик, олижаноблик ва меҳр-оқибат ҳеч қачон унутилмайди.

Биз миллий қадриятимиз бўлган бундай пок туйғуларни доимо асраб-авайлашимиз, азиз фарзандларимизни ҳам шундай эзгу фазилатлар соҳиби этиб тарбиялашимиз керак.

Юртимизда «Ҳомийлар ва шифокорлар йили» деб эълон қилинган 2006 йил айнан шу каби юқсак интилиш ва ҳаракатларга ундаиди. Ишонманки, бундай даъват шу мўътабар заминда яшаётган, миллати, тили ва динидан қатъи назар, барча ватандошларимиз қалбидан чукур жой топади.

Шу маънода, инсон ва унинг манфаатларини таъминлаш, ижтимоий ёрдамга муҳтоҷ қатламларга доимий эътибор ва кўмак бериш, жамиятимизда ўзаро ҳамжиҳатлик, мурувват ва бағрикенглик муҳитини янада мустаҳкамлаш, аҳолимиз учун муносиб турмуш шароитини яратиш, эл-юрг фаровонлигини ошириш масалалари янги

Йилда ҳам биз учун долзарб ва устувор вазифа бўлиб қолаверади.

2006 йил давлат бюджетида белгилаб қўйилганидек, ишчи ва хизматчиларнинг умумий иш ҳақи, шунингдек, стипендия, пенсия ва нафоқалар миқдорини 33 фоизга ошириш кўзда тутилмоқда. Яқинда қабул қилинган қарорларни инобатта оладиган бўлсақ, ўқитувчи ва шифокорларнинг ойлик иш ҳақи, индексацияни кўшиб ҳисоблагандা, ўртacha 1,5 марта ортади.

Буларнинг барчаси ҳалқимизнинг кундалик ҳаётида ўзининг ижобий таъсирини кўрсатиши, янги йилимизнинг янада мазмунли бўлишига хисса қўшиши шубҳасиз, албатта.

Табиийки, бундай юксак мақсадларга эришишнинг асосий шарти ва гарови — авваламбор, ўз юртимиз ва хонадонларимизда тинчлик ва барқарорликни асраш, хавфсизликни таъминлаш билан боғлиқ эканини, доимо ҳушёр ва огоҳ бўлишимиз зарурлигини ён-атрофимиздаги, дунёдаги мураккаб вазият яққол кўрсатиб турибди.

Муҳтарам юртдошларим!

Мана шу қувончли лаҳзаларда бетакрор диёримизнинг узоқ-яқин шаҳар ва қишлоқларида янги йилни катта орзу-умидлар билан кутиб олаётган сиз, азизларни, бутун Ўзбекистон аҳлини яна бир бор чин қалбимдан кутлайман.

2006 йил барчангизга, сиз, қадрдонларимга
баҳт ва омад олиб келсин!

Юртимиз тинч, ҳалқимиз омон бўлсин!

Хонадонларимиздан файзу барака аримасин!

Янги йил барчамизга муборак бўлсин!

*Ислом КАРИМОВ,
Ўзбекистон Республикаси Президенти*

ВАТАН ҲИМОЯЧИЛАРИГА БАЙРАМ ТАБРИГИ

Хурматли аскар ва сержантлар, офицер ва генераллар, Куролли Кучларимиз фахрийлари!

Қадрли ватандошлар!

Барчангизни мамлакатимиз ҳәтидаги қутлуг сана — Ватан ҳимоячилари куни билан чин қалбимдан самимий муборакбод этиш менга катта мамнуният бағишилайди.

Куролли Кучларимиз доимо мамлакатимиз озодлиги ва мустақиллик ининг, кенг миқёсдаги демократик ўзгаришларни амалга ошириш ва фуқаролик жамиятини шакллантириш, муқаддас заминимизда тинчлик ва осойишталикни таъминлашнинг ишончли кафолати бўлиб қелмоқда ва бундан кейин ҳам шундай бўлиб қолади.

Ўз ҳәтини дунёдаги энг муҳим ва олижаноб вазифа — Ватан ҳимоячиси деган шарафли касбга бағишилаган инсонлар эса давлатимиз ва жамиятимизда ҳамиша юксак ҳурмат ва эҳтиромга муносиб бўлиб қолажак.

Биз ўтган давр мобайнида миллий Куролли Кучларимизни шакллантириш, стратегик ва тактик вазифаларни бугунги кун талаблари даражага-

сида ҳал қила оладиган, сарҳадларимиз дахл-сизлиги, мамлакатимиз ва бутун минтақамиздаги тинчлик ва барқарорликни бузишга қаратилган ҳар қандай ёвуз ҳаракат ва хуружларни бартараф этиш ва уларга муносиб зарба беришга қодир бўлган ихчам, тезкор ва ҳаракатчан, замонавий қурол-яроғ ва техника билан таъминланган армияни барпо этиш йўлида кўп ишларни амалга оширдик.

Бизнинг Қуролли Кучларни қайта ташкил қилиш ва ислоҳ этиш бўйича қабул қилган Давлат дастуримиз Марказий Осиё минтақасидаги шиддат билан ўзгараётган ҳарбий-сиёсий вазиятнинг ҳар томонлама чуқур таҳдилига, худудимиз хавф-сизлигига таҳдид солиши мумкин бўлган ва реал хатарларни ҳисобга олишга, мамлакатимизнинг мудофаа қобилиятини кучайтиришга қаратилган, пухта ўйланган ва узоқ истиқболга мўлжалланган чора-тадбирларни амалга оширишга асосланган.

Бугунги кунда Қуролли Кучларнинг жанговар қобилиятини ошириш, армиянинг ташкилий тузилишини тубдан ислоҳ қилиш ва мустаҳкамлаш, барча қўшин турлари, худудий округлар, қисм ва бўлинмаларнинг хатти-ҳаракатларини яхлит тузилма сифатида уйғунлаштириш мақсадида иш олиб борилмоқда.

Армиямизни шартнома-контракт негизида профессионал асосга ўтказиш жараёни деярли

ниҳоясига етмоқда. Ҳарбий ўқув юртлари ва сержантлар тайёрлаш мактабларини модернизация қилиш, уларнинг моддий-техник ва ўқув базасини мустаҳкамлаш, замонавий компьютер техникаси, коммуникация ва ахборот технологиялари ҳамда таълим воситалари билан жиҳозлаш бўйича катта иш қилинмоқда. Буларнинг барчаси ҳар қандай вазиятда ҳам ташаббускор ва самарали қарорлар қабул қилишга қодир бўлган командир ва сержантларнинг янги авлодини тайёрлаш ва тарбиялаш мақсадида амалга оширилмоқда.

Мамлакатимизда жорий этилган сафарбарлик-чақирув резерв хизмати тизими ўзини тўлиқ оқла-моқда. Унинг сафларида ёшлирамиз бошлангич ҳарбий тайёргарликни эгаллаш ва чиниқиш мактабини ўтамоқда, ўзининг эл-юрт учун кераклигини яна бир бор ҳис этмоқда.

Ҳарбий хизматчилар ва уларнинг оиласлари учун бутунги кун талабларига жавоб берадиган ижтимоий-маиший шароитларни яратиш, ҳарбий шаҳарчаларни ободонлаштириш борасида ҳам кўпгина ишлар қилинмоқда.

Ҳарбий хизматчилар, жумладан, муддатли ҳарбий хизматни ўтаётган аскарларни моддий кўллаб-қувватлаш ва ижтимоий ҳимоя қилиш масалаларига катта эътибор берилмоқда. Хусусан, 2005 йилда уларнинг ойлик маошлари ўртача 35 фоизга оширилди, ҳарбийларни резервга бўша-

тишда тўланадиган тўловлар ҳажми эса икки марта кўпайтирилди, ҳарбий мутахассисларнинг касб маҳоратини оширишни рағбатлантиришга қаратилган қўшимча пул маблағлари ва бошқа тўлов турлари белгиланди.

Бу масалаларни ечиш учун зарур молиявий манбалар излаб топилмоқда, жумладан, қўшинларни модернизация қилиш жараёнида тежалган маблағлар ҳам шу мақсадларга йўналтирилмоқда.

Биз бугун катта фурур ва ифтихор юлан аита оламизки, ёшларимиз учун мамлакатимиз Куролли Кучлари сафларида хизмат қилиш нафақат конституциявий бурч, балки юксак мақсад, том маънодаги шон-шараф ишига айланмоқда. Армияда улар ҳарбий мутахассисликларни пухта эгаллаш билан бирга, жисмоний ва маънавий жиҳатдан чиникиб, иродаси тобланиб, ҳаётий қарашлари шаклланмоқда. Ватан ҳимояси йўлида доимо тайёр турадиган мард ва жасур инсонлар бўлиб камол топмоқда.

Эзгу орзу-умидлар билан мустақил ҳаётга қадам кўяётган минглаб ёшлар учун армия сафларида хизмат қилиш уларнинг шахс сифатида шакланишида ўзига хос пойдевор бўлмоқда, ҳаёт йўлларини танлашда, олий маълумот, шу жумладан, ҳарбий маълумот олишда кенг имкониятлар очиб бермоқда. Бугунги кунда айнан мана шу ёшлар

мамлакатимизнинг фаол ва пухта тайёрланган кадрлар захирасини, Ўзбекистон келажагининг таянчи ва суюнчини ташкил этмоқда.

Азиз ватандошларим!

Бугун барчамиз қандай мураккаб замонда яшаётганимизни, ўйлайманки, яхши тушунамиз. Халқаро террорчилик, экстремизм, тобора кўла-ми кенгайиб бораётган наркоагрессия каби бало-қазолар мамлакатимизнинг ҳозирги куни ва келажаги учун жиддий таҳдидга айланмоқда.

Кейинги вақтда биз турли бузгунчи ва муайян ташқи кучларнинг юртимиздаги вазиятни издан чиқариш, конституциявий тузумни ағдариш, ўзларининг узоқни кўзлаган қабиҳ режаларини амалга ошириш ва мамлакатимизнинг мустақил ташқи сиёsat йўлини ўзгартириш, ўз стратегик манфаатларига жавоб берадиган тараққиёт моделени зўравонлик билан жорий этишга қаратилган уринишларининг гувоҳи бўлдик.

Лекин бу кучлар энг асосий омилни — халқимизни ўз танлаган йўлидан қайтариб бўлмаслигини ҳисобга олмади.

Биз ана шу хатарли таҳдид ва мисли қўрилмаган тазийкларга, тухмат ва уйдирмалар оқимига мардона қарши тура олдик, ҳар бир оила ва бутун мамлакатимизда тинчлик-осойишталиктни сақлашта муваффақ бўлдик ва бутун қатыйи ишонч билан ўз келажагимизни барпо этмоқдамиз.

Бундай вазиятда барчамиз доимо ҳушёр ва сергак бўлиш, янги куч ва имкониятларимизни сафарбар этган ҳолда, Куролли Кучларимизнинг мудофаа қобилиятини мустаҳкамлаш нақадар муҳим аҳамиятта эга эканини янада чукурроқ англаймиз, албатта.

Бугун бу масала биз учун нафақат долзарб вазифа, балки давлатимиз ва жамиятимизнинг, мамлакатимиз тақдири ва келажаги учун бефарқ бўлмаган ҳар бир инсоннинг муқаддас бурчидир.

Бизнинг бу борадаги вазифаларимиз қуидагилардан иборат:

биринчидан, минтақамизда содир бўлган ва рўй бергаётган воқеалар, уларнинг қайси йўналишда ривожланиб бораётганини инобатта олиш, хавфсизлигимизга рахна солиши мумкин бўлган замонавий хатар ва таҳдидларни сезгирилик билан баҳолаш, мустақиллигимизга, мамлакатимизнинг ҳудудий яхлитлиги, одамларимизнинг осуда ҳаётига қарши қаратилган ҳар қандай тажовузларни бартараф этишта қодир Куролли Кучларимизнинг стратегия ва тактикасини такомиллаштириш.

Биз бепарволик ва лоқайдлик каби иллатлардан бутунлай ҳалос бўлишимиз, ҳарбийларимиз, айниқса, қўмондонлик ва раҳбарлик лавозимларида ўтирган шахсларнинг ўз иши учун талаб-

чанлик ва масъулият ҳиссини оширишимиз даркор;

иккинчидан, қўшин турлари ва Куролли Кучларимиз қисмларининг уйғун ва тезкор ҳаракат қилишига, уларнинг жойлардаги ҳокимият органдари ва жамоатчилик билан ҳамкорлигини мустаҳкамлашга Эришиш мақсадида армиямизниң ташкилий қурилиши ва ҳарбий бошқарув тизимини такомиллаштиришга қаратилган ишларимизни янада кучайтишимиз зарур;

учинчидан, ҳар қайси ҳарбий хизматчи онгига унинг ўз фикри, атрофида кечеётган воқеаларга дахлдорлик туйғусини мустаҳкамлаш, юксак ахлоқий ва маънавий фазилатларни, фаол ҳаётий позицияга эгалик ва ватанипарварлик ҳиссини тарбиялаш. Бу ўта муҳим масала армиядаги хизматни, барча бўғиндаги командирлар фанолиятини баҳолашда асосий мезон бўлиши лозимлигини кўзда тутган ҳолда, ҳарбий хизматчилар, биринчи навбатда, ҳарбий хизматга чақирилганларни тарбиявий, ахлоқий-руҳий, ижтимоий-сиёсий жиҳатдан тайёрлаш борасидаги ишлар қандай йўлга қўйилганини қайта кўриб чиқиш;

тўртинчидан, ҳарбий хизматчиларнинг касбий малакасини оширишга, ҳарбий билим юртлари ва сержантлар тайёрлаш мактабларидағи ўкуватарбия ишларини тубдан яхшилашга, уларни

замонавий техника ва жиҳозлар, ўқув қўлланмалари ва таълим технологиялари билан таъминлашга биринчи даражали эътибор қаратиш. Курсантлар, билим юртлари ва сержантлар тайёрлаш мактабларини битирувчиларнинг интеллектуал тайёргарлик даражасига алоҳида аҳамият бериш;

бешинчидан, қўшинларнинг юксак жанговар қобилияти ва самарадорлигини, ҳаракатчанлиги ва тезкорлигини ҳар томонлама мустаҳкамлаш мақсадида уларни энг замонавий қурол-яроғ ва техника, маҳсус жиҳоз ва аслаҳа билан таъминлаш масаласига армияни ислоҳ қилишнинг ўта муҳим ва устувор вазифаси сифатида қараш. Ҳарбий техника ва қурол-аслаҳаларни модернизациялаш, қўшинларнинг моддий-техник базасини ҳозирги замон талабларига мувофиқ тарзда мустаҳкамлаш борасидаги ишларни изчил давом эттириш.

Юқорида зикр этилган барча вазифаларни бажаришнинг энг асосий шарти — ҳарбий хизматчиларнинг ижтимоий-маиший аҳволини, яшаш шароитларини яхшилаш, иш ҳақи ва таъминотини ошириш масалаларини босқичма-босқич ва тизимли равишда яхшилаб бориш давлат ва жамиятимизнинг, Қуролли Кучлар қўмондонлигининг доимий дикқат-эътиборида бўлиши зарур.

Қадрли дўстлар!

Бугунги байрам кунида Қуролли Кучлар сафларида ўз хизмат бурчини шараф билан адо этаётган барча Ватан ҳимоячиларига, захирадаги аскар ва офицерларга мурожаат қилас эканман, бизнинг армиямиз юртимизнинг муқаддас сарҳадларини, халқимизнинг тинчлиги ва осойишталигини, мусаффо осмонимизни доимо муносиб ҳимоя қила олади, деб қатъий ишонаман.

Яна бир бор сиз, қадрдонларимни Ватан ҳимоячилари куни билан табриклайман.

Барчангизга сиҳат-саломатлик, баҳт ва омад тилайман.

Ислом КАРИМОВ,

*Ўзбекистон Республикаси Президенти,
Қуролли Кучлар Олий Бош Қўмандони*

МАМЛАКАТИМИЗ ТАРАҚҚИЁТИНИНГ ҚОНУНИЙ АСОСЛАРИНИ МУСТАҲКАМЛАШ ФАОЛИЯТИМИЗ МЕЗОНИ БЎЛИШИ ДАРКОР

Хурматли мажлис қатнашчилари!

Бугунги имкониятдан фойдаланиб, Сенат фаолияти хусусидаги ўзимнинг айрим фикр-мулоҳазаларим билан ўртоқлашмоқчиман.

Сенатимиз иш бошлаганидан бўён роппа-rossca бир йил ўтмоқда.

Албатта, ўтган вақт Сенат фаолиятига қатъий баҳо бериш учун катта муддат эмас. Лекин, шундай бўлса ҳам, ўтган давр мобайнида қилинган ишлар бўйича дастлабки хulosаларни чиқаришга имкон бор, деб ўйлайман.

Аввалимбор, шуни таъкидлаш лозимки, Сенат фаолиятини йўлга кўйиш нисбатан қисқа ташкилий даврда амалга оширилди.

Раҳбарият таркибини сайлаш, ижро тузилмалари, қўмиталар ва комиссиялар фаолиятини, ишчи аппаратини шакллантириш, турли таҳлилий гурӯҳлар ишини ташкил этиш билан боғлиқ жиддий ва масъулиятли масалалар узоқча чўзилмасдан тез муддат ичida ҳал этилди, бу борада катта сафарбарлик кўрсатилди.

Энг асосийси — Сенат ўзининг амалий фаолиятида дастлабки кунларданоқ ўз профессионал қобилиягини, аниқ мақсадларга йўналтирилган иш услубини намойиш этди, қонунчилик хужжатларини тасдиқлаш ҳамда мамлакатимизнинг ҳаётига оид муҳим муаммоларни ҳал этиш йўлида қарорлар қабул қилишга қодир ҳокимият органи сифатида ўзини кўрсатди.

Ҳеч муболагасиз айтиш мумкинки, Сенат қонун ижодкорлиги жараёнида ўзига муносиб ўринни эгаллаб бормоқда. Конституциямизга киритилган янги ўзгартиришлар ва қабул қилинган конституциявий қонунларга мувофиқ ташкил этилган бу тузилма ўзини мамлакатимиз олий қонунчилик органининг юқори палатаси сифатида зарур эканини яна бир карра исботлади. Сенатнинг ўтган даврдаги фаолияти бу ҳақиқатни тўла-тўкис тасдиқлади.

Мен ҳозир Сенатнинг кўп қиррали фаолияти билан боғлиқ барча масалалар хусусида батафсил тўхталиб ўтирмасдан, менинг қарашим бўйича, унинг фаолиятига доир энг муҳим йўналишларга эътиборингизни қаратмоқчиман.

Ўтган вақт мобайнида Сенат ўзининг тўртта ялпи мажлисида мамлакатимизда олиб борилаётган ижтимоий, сиёсий ва иқтисодий ислоҳотларни чукурлаштириш учун катта аҳамиятта эга бўлган 19 та қонунни кўриб чиқди ва маъқуллади.

Бу борада қуйидаги мисол алоҳида эътиборга молик, деб ўйлайман. Юқори палатада кўриб чиқиш жараёнида тўртта қонун қайтарилиди. Улар бўйича Қонунчилик палатаси билан биргаликда келишув комиссиялари тузилиб, барча баҳсли масалалар кўриб чиқилди ва ўзаро мақбул хуло-сага келинди.

Икки палата ўртасида шаклланаётган мана шундай эътиборга сазовор муносабат ва тажриба аввало бутун парламентимизда демократик кўникма ва жараёнлар қарор топаётганидан дарак беради. Ва шундай мисоллар мамлакатимизнинг қонунчилик ҳокимияти тизимида қабул қилинаётган қонунларнинг юксак сифатини, жамиядаги манфаатлар уйғунлигини таъминлайдиган, ўзаро мувозанатни саклашга хизмат қиласидиган самарали тизим шаклланаётганини яна бир бор намойиш этади.

Сенат томонидан Бош вазирни ва Бош прокурорни тасдиқлаш, Конституциявий суд, Олий ва Олий хўжалик судларини шакллантириш бўйича қабул қилинган муҳим қарорларни аввало Сенат, қолаверса, мамлакатимиз ҳокимият тизимининг мустақил қонунчилик идораси бўлмиш парламентимиз — Олий Мажлисимиш ваколатларининг амалий жиҳатдан кенгайгани ва ҳукуқлари анча ошганининг тасдиги сифатида қайд этиш лозим.

Юқори палата Ўзбекистон Республикаси Президентининг тавсиясини кўриб чиқиб, мамлакат Конституциясининг 13 йиллиги муносабати билан амнистия тўғрисидаги актни қабул қилди. Шунингдек, Ўзбекистоннинг хорижий давлатлардаги дипломатик ва бошқа вакилларини тайинлаш ва озод этиш тўғрисида бир қатор қарорлар қабул қилди.

Маълумки, мазкур ваколатлар илгари давлат раҳбарига тегишли эди, энди улар мамлакатимизнинг олий қонунчилик органи томонидан амалга оширилмоқда. Айни пайтда жамиятда қонун устуворлигини таъминлаш ва хуқуқий маданиятни ошириш масалаларига ҳам катта эътибор қаратилмоқда.

Ўтган қисқа вақт мобайнида Сенатга мамлакатимизнинг турли минтақаларида яшайдиган фуқаролардан 700 дан ортиқ хат ва аризалар тушди ва бу мурожаатлар юзасидан тегишли қарорлар қабул қилинди.

Юқорида зикр этилган фикрлардан келиб чиқиб айтиш мумкинки, Сенат — мамлакатнинг Олий Қонунчилик органи, Олий Мажлиснинг юқори палатаси сифатида шаклланди.

Шу фурсатдан фойдаланиб, сиз, муҳтарам Сенат аъзоларига юртимиз ва халқимиз фаровонлиги йўлида қилаётган меҳнатингиз учун ўзимнинг чукур миннатдорлигимни изҳор этмоқчи-

ман. Шу билан бирга, бутун эришилган ютуқларни таъкидлаган ҳолда, Сенат фаолиятида йўл қўйилган айрим жиддий камчилик ва нуқсонлар тўғрисида ҳам алоҳида тўхталиб ўтиш зарур, деб ўйлайман.

Биринчидан, Сенатимиз фаолиятининг бутуни кунда энг бўш томонини, шуни очиқ тан олишимиз керак, аввало маҳаллий кенгашлар депутатлар корпуси билан узвий алоқаларни таъминламаганимиз, улар билан ҳамкорликда ишлашни жой-жойига қўймаганимизда кўришимиз лозим, деб ўйлайман.

Шуни назарда тутиш керакки, Сенат вакиллик органи бўлиб, сенаторларнинг асосий қисми халқ депутатлари вилоят, шаҳар ва туман кенгашларининг депутатлари ҳисобланади ва улар маҳаллий кенгашларнинг умумий йиғилишларида Сенат аъзолигига сайланган.

Бошқача айтганда, Сенат аъзолари ўз ваколатларини маҳаллий кенгашлар депутатларидан олган ва уларнинг олий органдаги тўлақонли, айни вақтда шу кенгашларга ҳисоб берадиган вакиллари сифатида фаолият кўрсатади. Бироқ амалда Сенат ва маҳаллий кенгашлар ўртасида изчил, самарали алоқа ва ҳамкорлик ҳозиргacha йўлга қўйилмаган.

Яна бир бор такрорлаш лозим — маҳаллий кенгашлар депутатлар корпуси билан нафақат

алоқа, нафақат ҳисобот ва учрашувлар, балки ҳамкорлик ҳам ҳали-бери шаклланмаган.

Сенат кенгаши томонидан 2005 йилнинг 21 ноябрида, яъни Сенат ташкил этилганидан сўнг деярли бир йил ўтгач, «Ўзбекистон Республикаси Олий Мажлиси Сенатининг Қорақалпоғистон Республикаси Жўқорғи Кенгеси, халқ депутатлари вилоятлар ва Тошкент шаҳар кенгаши билан ҳамкорлик ҳаракатларининг ташкилий-хукуқий механизмларини такомиллаштириш чора-тадбирлари комплекси» тасдиқланган эди. Лекин атиги 9 банддан иборат бўлган бу ҳужжат талаблари ҳам ниҳоятда қониқарсиз бажарилмоқда.

Иккинчидан. Маълумки, Сенатнинг мутлақ ваколатига кирадиган ўта муҳим масалалар бор. Афсуски, Ўзбекистон Республикаси Конституциясининг 80-моддасига кўра, Сенатга берилган бу ваколатдан ҳам ҳисобот даврида етарли даражада фойдаланилмаган.

Масалан, Ўзбекистон Республикаси Давлат табиатни муҳофаза қилиш кўмитаси ва Ўзбекистон Республикаси Марказий банки бошқаруви раисларининг ҳисоботлари чуқур таҳлил қилинмасдан, тегишли хулосалар чиқарилмасдан, айтиш мумкинки, юзаки кўрилган. Сенат ва Сенат аъзоларига берилган ваколатлардан етарли фойдаланилмаган.

Бу ҳисоботлар ва улар юзасидан бўлиб ўтган муҳокамаларда атроф-муҳитни муҳофаза қилиш, банк тизими фаолиятини такомиллаштириш, шу соҳаларда иқтисодий ислоҳотларни тўғри йўлга кўйиш борасида мавжуд бўлган жиддий муаммолар, камчилик ва нуқсонларга, шу идораларнинг масъулиятини ошириш масаласига керакли эътибор берилмаган.

Шуни таъкидлаш лозимки, мамлакатимизда, аввало ҳудуд ва минтақаларимизда ижтимоий-иқтисодий соҳаларда олиб борилаётган ислоҳотларнинг самарасини ошириш, юртимизда мавжуд бўлган ўта долзарб муаммолар, масалан, ишсизлик муаммосини муҳокама қилиш юзасидан Сенат томонидан ташаббуслар сезилмаяпти.

Маълумки, бугунги кунда мамлакатимизда суд-хуқуқ тизими ислоҳотлари изчил давом этмоқда. Жумладан, прокуратура, хуқуқни муҳофаза қилувчи ва суд органларининг бутун бир тизими фаолиятини ташкил этишни талаб қиласиган янгича ёндашувлар асосида муҳим ҳужжатлар — қонунлар, жиноий жазолар тизимини, судларнинг иш юритувини, инсон хуқуқларини ҳимоя қилиш билан боғлиқ масалаларни либераллаштириш тўғрисидаги фармонлар қабул қилинмоқда.

Кўрятпизки, бу соҳада муҳокама қилинадиган ва тегишли хулосалар чиқариш зарурати бўлган талайгина масалалар етарли. Лекин, шунга қарамасдан, Сенат томонидан 2005 йил иш режасида кўзда тутилган Ўзбекистон Республикаси Бош прокурорининг ҳисоботи 2006 йилга кўчирилганини тушуниб бўлмайди.

2005 йил давомида Сенат қўмиталари бор-йўғи иккита сайёр мажлис ўтказган. Мудофаа ва хавфсизлик масалалари қўмитаси томонидан Термиз шаҳрида ўтказилган мажлисда «Умумий ҳарбий мажбурият ва ҳарбий хизмат тўғрисида»ги қонуннинг, Аграр, сув хўжалиги масалалари ва экология қўмитаси томонидан Самарқанд шаҳрида ўтказилган мажлисда «Сув ва сувдан фойдаланиш тўғрисида»ги қонуннинг ижроси муҳокама этилган, холос.

Учинчидан. Ўтган йили Сенат томонидан 24 та турли семинар, конференция ва давра суҳбати ташкил қилинган.

Афсуски, кўп ҳолларда бундай муҳокамалар жиддий тайёргарликсиз, кўрилган масала бўйича амалий таклифлар беришга қодир бўлган олим ва мутахассисларни жалб этмасдан туриб ўтказилганини айтишга тўғри келади.

Кўпинча бундай тадбирларда муҳокама қилинаётган соҳалардаги муаммолар тўғрисида гапириш ўрнига олдиндан маълум бўлган мисол

ва таклифларни тақоролашдан нарига ўтилмаяпти.

Оқибатда нима бўляпти? Бундай анжуманларда бир қарашда ғоят долзарб мавзуулар кўтарилади, лекин, афсуски, бу борада мавжуд муаммоларни ечиш бўйича амалий таклифлар ўртага ташланмайди.

Энг ачинарли томони шундаки, кўп ҳолларда бундай семинар, конференция ва давра сұхбатлари кўзланган мақсадларга хизмат қилмаяпти, мамлакатимизнинг кенг жамоатчилиги эса улардан четда қолмоқда.

Маълумки, қонун ижодкорлиги билан шуғулланадиган идораларнинг фаолиятида бу борада муайян тартиб-қоида қабул қилинган. Яъни, бундай муҳокама ва семинарлар фақат маълумот бериш, мавжуд фактларни қайд қилиш билан чекланмаслиги, аксинча, бу муҳокамалар пировард натижада зарур қонунчилик таклифларини тайёрлаш учун асос бўлиб хизмат қилиши даркор.

Тўртинчидан. Сенат назорат фаолиятининг са-марадорлиги, парламент назоратининг таъсирчанлиги ҳали-бери паст даражада қолмоқда.

Юқори палата нафақат айрим қонун бузилиш ҳолатларини аниқлаши, балки қонун талабларининг бажарилмаслигига, қонун нормаларининг амал қилинмаётганига сабаб бўлаётган омилларнинг тагига етиши зарур.

Шунингдек, қонунчилигимиздаги, мамлакатимизда амалга оширилаётган ислоҳотларни хуқуқий жиҳатдан таъминлаш борасидаги бўшлиқ ва заиф нуқталарни аниқлаш ҳам унинг муҳим вазифаси ҳисобланади.

Парламент назоратини режалаштириш ва амалга оширишда бу ишларни Қонунчилик палатаси билан мувофиқлаштиришга эътибор берилмаётгани натижасида назорат тадбирларини ўтказишида, худдики мусобақа қилгандек, бир-бирини такрорлаш ва ортиқча куч сарф қилиш ҳолатлари рўй бермоқда.

Бешинчидан. Қонунларни кўриб чиқиш ва қабул қилиш жараёнида Олий Мажлис палаталарининг ўзаро самарали ҳамкорлик қилиш механизмини, аввало, куйи ва юқори палаталарнинг тегишли қўмита ва тузилмалари ўргасидаги ўзаро муносабатларни такомиллаштириш зарур.

Олдимизда турган муҳим вазифа — ҳар икки палата бир-бирининг ишини такрорламасдан, бир-бирини тўлдирган ҳолда, яхлит ва изчил тизим, бутун бошли бир қонунчилик органи сифатида фаолият кўрсатишини таъминлашдир.

Шу борада, яъни янги қонунларни яратиш ёки қонунларга ўзгартишлар киритиш жараёнида шуни яна бир бор таъкидлаб айтмоқчиманки, юқори палата томонидан бирон-бир қонуннинг қайтарилиши, қонуннинг мазмун-моҳияти бўйича

келишув комиссиялари доирасида баҳс-мунозаралар олиб бориши кимгадир ғалати кўринмаслиги ва кимнингдир нафсониятига тегмаслиги керак.

Бундай ҳолатларни демократик парламентнинг соғлом фаолият шакли, қабул қилинаётган қонун ва қонун хужжатларининг сифати юқори бўлишини кафолатлайдиган муҳим омил, деб қабул қилишимиз зарур.

Юқорида зикр этилган вазиятларни бартараф этиш ва олдини олиш мақсадида палаталар ўртасида келиб чиқадиган баҳс ва мунозараларни иштартибида ҳал этиш вазифаси юклатилган Мувофиқлаштирувчи кенгаш тузиш ҳақида яқинда қабул қилинган қарор ўзининг амалий натижаларини беради, деб ишонаман.

Хурматли Сенат аъзолари!

Бугунги йиғилишимизда Олий Мажлисимизнинг юқори палатаси бўлмиш Сенат фаолияти, унинг қисқа вақтда амалга оширган ишлари, эришилган натижалар, шу билан бирга, эътибордан четда қолган масалалар ва йўл қўйилган хато-камчиликлар ҳақида тўхталиб ўтар эканман, мен ўз олдимга Сенат ишига чуқур таҳлил асосида танқидий баҳо бериш мақсадини қўйганим йўқ.

Сенатнинг ўтган давр мобайнидаги фаолияти якунларини кўриб чиқиш масаласи ушбу ялпи

мажлис кун тартибига киритилганидан сизлар хабардорсиз.

Сиз, мұхтарам сенаторлар, бу масалани мұхқама этиш өтгіда ўтган давр мобайнида қилинған ва ҳали-бери бажарилмаган ишларга ўзингиз атрофлича чуқур баҳо беришиңгиз, сизларга ишонч билдирган сайловчиларингиз манбааттарини ифодалаш ва ҳимоя қилишга қаратылған фаолиятингиз самарадорлигини ошириш йўлларини белгилаб олишиңгиз, ўйлайманки, ҳар томонлама мақсадга мувофиқ бўларди.

Азиз дўстлар!

Бугун сиз мамлакатимиз ҳәтида кечираётган қандай жараёнларни, қайси соҳа ва тармоқни олмасангиз — марказда ёки узок-яқин шаҳар ва қишлоқларимизда бўладими, корхона, ташкилот ёки хўжаликларда бўладими — юртимизнинг барча жойларида мавжуд вазиятни бир сўз билан ифодалаш мумкин: халқимиз, мамлакатимиз изланиш, янгиликка интилиш, бунёдкорлик туйғуси билан яшамоқда.

Олиб борилаётган кент кўламли ислоҳотлар натижасида юртдошларимизнинг олдида очилаётган янги имкониятлар уларнинг ўзи ва оиласининг бугунги, эртанги куни учун катта умид ва ишонч туғдириб бермоқда.

2005 йилни қандай ижобий натижалар билан якунлаганимиз сизларга яхши маълум.

Айни пайтда 2006 йилда амалга ошириладиган мақсад ва вазифаларимизни аниқ белгилаб олганимиз ва шу йўлда белни маҳкам бояглаб астойдил меҳнат қилаётганимиз ҳам, иншооллоҳ, ўз ҳосили ва самарасини беради.

Айниқса, жойларда аҳолимизнинг кундалиқ ҳаёти билан ҳар томонлама боғлиқ муаммоларни ҳал этиш бўйича қилаётган ишларимиз — бу иқти-содий масалаларни ечиш ёки тадбиркорлик, кичик бизнес ва фермерликни ривожлантириш бўладими, янги-янги иш ўринларини яратиш, шунинг ҳисобидан одамларнинг ҳаёт даражаси-ни ошириш, таъминотини яхшилаш, ҳар қайси инсонга Аллоҳ берган ақл-заковат, куч-кувват ва салоҳиятни рӯёбга чиқаришда имконият яратиш бўладими — буларнинг барча-барчаси ана шундай ишонч туйғусини мустаҳкамлашга хизмат қиласди.

Шу борада биздан, яъни қонун чиқарувчи-лардан нима талаб қилинади, деган савол пайдо бўлиши табиийдир.

Биринчидан, мамлакатимиз тараққиётининг қонунчилик базасини яратишида, янги қонунларни ижод қилишда ва уларга ўзгартишлар киритишида авваламбор меҳнат аҳли, у фермер бўладими, тадбиркор, кичик бизнес соҳиби ёки ташаббускор ишбилармонми — ким бўлмасин, уларнинг манфаати ва яна бир бор манфаатини фаолияти-

мизда асос қилиб олиш ва рўёбга чиқариш талаб қилинади.

Иккинчидан, қабул қилинаётган қонун ва юридик нормаларни амалда татбиқ этишда, мана шу жараённи жиловлаб, кўлга олиб қаттиқ назорат ўтказишда бош-қош бўлишни ҳаётнинг ўзи тақозо қиласди.

Минг афсуски, қабул қилинаётган қонун ва қарорларимизни жойларга етказиш, кеңг тушунтириш ишларини, тарғиботларни ўтказиш ва кечиктирмасдан ҳаётимизга жорий этиш, бунинг учун керакли чора ва тадбирларни кўриш — бу гунги кунда фаолиятимизнинг оқсоқ бир томонига айланиб қолмоқда.

Бундай вазифаларни амалга оширишда Олий Мажлисимиизнинг қуи — Қонунчилик палатаси қаторида Сенат аъзолари зими масига алоҳида масъулият юклатилади.

Сиз, муҳтарам Сенат аъзолари, маҳаллий кенгашлар халқ ноибларининг вакиллари бўлиб, юксак ваколат соҳиби сифатида, ҳаётнинг аччиқ-чучугини яхши биладиган инсонлар сифатида бу масалаларга катта масъулият билан қарашингиз талаб қилинади.

Ишонаманки, шундай юксак ишончга сазовор бўлган сиз, муҳтарам сенаторлар ўз масъулиятингизни ҳар томонлама чуқур англааб, сайловчиларимизнинг, халқимизнинг умиди, орзу-ни-

ятларини амалга оширишда ўзингизни аямай хизмат қиласиз.

Шу йўлда барчангизга сиҳат-саломатлик, муваффақият ва омадлар тилайман.

*Ўзбекистон Республикаси
Олий Мажлиси Сенатининг
бешинчи ялти мажлисидаги нутқ,
2006 йил 24 февраль*

ЭРИШИЛГАН ЮТУҚЛАРНИ МУСТАҲКАМЛАБ, ЯНГИ МАРРАЛАР САРИ ИЗЧИЛ ҲАРАКАТ ҚИЛИШИМИЗ ЛОЗИМ

Хурматли мажлис иштирокчилари!

Бугунги йиғилишимиздан кўзда тутилган мақсад — иқтисодиётимизни ривожлантириш, ислоҳ қилиш ва эркинлаштириш бўйича 2005 йил якунларини муҳокама этиш, эришилган натижаларни танқидий баҳолаб, 2006 йилдаги асосий устувор вазифа ва йўналишларни белгилаб олишдан иборат.

2005 йилнинг якунлари ҳақида гапирав эканмиз, шуни мамнуният билан қайд этмоқчиманки, ўтган йилда деярли барча макроиктисодий кўрсаткичлар бўйича прогноз ҳажми ва кўрсаткичларига эришилди, аксарият кўрсаткичларнинг эса сезиларли даражада ошириб бажарилиши таъминланди.

2005 йилда ялпи ички маҳсулотнинг ўсиш суръатлари 7 фоизни, инфляция даражаси эса 7,8 фоизни ташкил этди.

Саноат ишлаб чиқариши 7,3 фоизга, жумладан, истеъмол товарлари ишлаб чиқариш 17,7

фоиз, қишлоқ хўжалиги маҳсулотлари ишлаб чиқариш эса 6,2 фоизга ўсгани қувончли ҳол, албатта.

2005 йил давлат бюджети ялпи ички маҳсулотга нисбатан кутилган 1 фоиз тақчиллик ўрнига 0,1 фоиз профицит билан бажарилди, унинг даромад қисми эса прогноз кўрсаткичларидан 39 фоиз зиёд бўлди.

Ялпи ички маҳсулотнинг барқарор суръатда ўсиб бораётгани, сўнгги икки йилда бу кўрсаткичнинг 7 фоиздан ортаётгани айниқса диққатга сазовор. Иқтисодиётнинг ўсиш кўрсаткичи 2000 йилга нисбатан 30,1 фоизни, 1991 йилга таққослаганда эса 28,2 фоизни ташкил этмоқда.

Бир масалага эътиборингизни алоҳида жалб қилмоқчиман.

Шуни таъкидлаш зарурки, Ўзбекистон эришаётган барқарор иқтисодий ўсиш суръатлари нинг асосий манба ва омиллари тариқасида дунё хом ашё ва товарлар, аввало, нефть ва газ бозорларида мавжуд бўлган қулай конъюнктура ва қандайдир ташки омиллар қўмаклашиб тургани йўқ.

Иқтисодиётимизда эришилган натижалар негизида аввало бозор ислоҳотлари ва мамлакатни модернизация қилишининг пухта ўйланган модели ва узоқ муддатга мўлжалланган дастурини босқичма-босқич амалга ошириш бўйича олиб

борилаётган тизимли, изчил ва қатый ҳаракатлар турганини кузатиш қийин эмас.

Рұхсатингиз билан 2005 йилда иқтисодиётимизни ислоҳ қилишнинг энг муҳим йўналишларига қисқача тўхталиб ўтмоқчиман.

Биринчи йўналиш — иқтисодиётин тизимли ва таркибий жиҳатдан изчил янгилаш.

Бу борадаги ҳаракатлар аввало иқтисодиётда макроиқтисодий мутаносибликни таъминлаш, иқтисодий ўсишда етакчи ўрин тутиши лозим бўлган ишлаб чиқариш, соҳа ва тармоқларни жадал ривожлантириш, шу билан бирга, Ўзбекистоннинг ўзига хос демографик хусусиятлари, бандлик, аҳоли даромадларини кўпайтириш билан боғлиқ ва бошқа ўта муҳим муаммоларни ҳал этишга қаратилди.

Мамлакатимиз учун устувор бўлган мазкур вазифанинг аҳамиятини яна шу билан изоҳлаш лозимки, ички ва ташқи инвестицияларни киритишни талаб этадиган таркибий ўзгаришларни амалга оширмасдан туриб, хом ашё етиштиришга йўналтирилган бир ёқлама иқтисодиётдан халос бўлиш, том маънодаги иқтисодий мустақилликка эришиш мумкин эмас.

Кўрилаётган қатый тадбир ва чоралар, амалга оширилаётган ислоҳотлар натижалари мамлакатда ишлаб чиқрилаётган ялпи ички маҳсулотнинг таркибитга ижобий таъсир кўрсатмоқда. Етак-

чи соҳаларимиздан бўлмиш саноатнинг улуши 2002 йилдаги 14 фоиз ўрнига 2005 йилда 20,7 фоизни ташкил этгани ҳам бу фикрни тасдиқлайди.

Хизмат кўрсатиш соҳасини оладиган бўлсак, бу тармоқ ҳам жадал ривожланмоқда. Бу соҳанинг ялпи ички маҳсулот таркибидаги улуши 38,5 фоиздан ошгани, жумладан, коммуникация, транспорт ва алоқа тармоқлари бўйича хизмат кўрсатиш ҳажми беш йил мобайнида бир ярим баравар ўсгани бунинг яққол тасдигидир.

Айниқса, кейинги йилларда телекоммуникация алоқаси ва молия-банк тизимида хизматларнинг янги турлари тез суръатлар билан ривожлаётгани эътиборга сазовор.

Сўнгги беш йилда суғурта хизматлари ҳажми 5 марта, лизинг операциялари деярли 6 марта, аудиторлик хизмати кўрсатиш, пул билан ҳисоблагандан, тахминан 9 марта ўсгани, табиийки, салмоқли натижга сифатида баҳолашга арзиди.

Мамлакатимиз иқтисодиётида амалга оширилаётган таркибий ислоҳотлар ва улардан қўзланган мақсадларнинг бажарилиши енгил саноатнинг жадал суръатда ривожланишида ҳам ўз ифодасини топмоқда.

Бу тармоқда 2005 йилда ўсиш суръати 2004 йилга нисбатан 12 фоизни ташкил этгани, шу жумладан, тўқимачиликда 17 фоиз, тикувчилик-

да 24,5 фоиз, трикотаж маҳсулотлари ишлаб чиқаришда 53 фоиз ўсиш кузатилганини қайд этиш зарур.

Замонавий техника ва ускуналар билан жиҳозланган корхоналарнинг ишга туширилиши, хорижий инвесторлар билан ҳамкорликда янги ишлаб чиқариш кувватларининг ташкил этилиши, жаҳон бозорига рақобаттга бардошли тайёр енгил саноат маҳсулотларини экспорт қилиш ҳажмининг сезиларли даражада ортиб бораётгани — буларнинг барчаси мазкур жараённинг таркибий қисмларидир.

Энг муҳими, бундай ўзгаришлар натижасида янги иш ўринлари яратилмоқда, аҳоли, айниқса, хотин-қизлар иш билан таъминланмоқда.

2005 йилда четта маҳсулот экспорт қилиш ҳажми 11,5 фоизга ўсгани юртимизда амалга оширилаётган ислоҳотлар ва иқтисодиётни модернизация қилишда эришилаётган ютуқларнинг муҳим натижаси, десак, ўйлайманки, ҳеч қандай муболага бўлмайди.

Айни пайтда умумий экспорт ҳажмида тайёр маҳсулот ва хизматлар улуши 50 фоиздан ошди.

Бу эса, ташқи савдода мустақиллик йиллари-даги энг юқори кўрсаткич — 1,3 миллиард АҚШ доллари миқдоридаги ижобий сальдога эришиш имконини берди. Натижада мамлакатимизнинг олтин-валюта захираси 1,3 марта кўпайди, бу эса,

аввало, иқтисодиётимизнинг ташқи бозор ўзгаришларига барқарорлиги ортиб бораётганидан далолат беради.

Ўзбекистон иқтисодиётида юз бераётган сифат ўзгаришларини баҳолаш учун эътиборингизни яна бир мисолга қаратмоқчиман. Агарки яқин-яқинларгача, яъни 2000 йилда экспорт таркибида пахта толасининг ҳиссаси 27,5 фоиз бўлган бўлса, 2005 йилда бу кўрсаткич 19 фоизни ташкил этганинг ўзи кўп нарсани билдиради, деб ўйлайман.

Шу даврда импортнинг таркиби ҳам ўзгариб, мамлакатта олиб кирилаётган умумий маҳсулот ҳажмида техника ва ускуналар улуши 44 фоиздан ортгани айниқса эътиборга лойик.

Шу билан бирга, иқтисодиёт тармоқларининг сифат жиҳатидан юксалиши кўп томондан инвестиция ҳажмидаги таркибий ўзгаришлар билан боғлиқ бўлиб, уларнинг ялпи ички маҳсулотдаги улуши 20 фоиздан ошди.

Марказлаштирилган ҳолда маблағ билан таъминлаш ҳажми қисқараётган бир пайтда корхоналар ва аҳолининг хусусий маблағ-қўйилмалари кескин ошиб бормоқда, тўғридан-тўғри хорижий инвестициялар ва тижорат банклари ресурслари фаол жалб этилмоқда.

Буни 2005 йилда номарказ инвестиция манбалари улуши 76,6 фоизни ташкил этгани, тўғри-

дан-түгри хорижий инвестициялар ва кредитлар ҳажми эса қарийб 1,5 баробар кўпайгани ҳам кўрсатиб турибди.

Диққат марказимизда бўлиб келган иккинчи масала — бу иқтисодиётни либераллаштириш жараёнларини кенгайтириш ва чукурлаштириш билан боғлик.

Бу борада асосий эътибор солиқ юкини камайтириш, солиқ-бюджет сиёсатини либераллаштириш ва унификация қилиш, солиққа тортиш тартибини соддалаштириш, солиқ ва молия органлари масъулиятини кучайтиришдек аниқ мақсадларга йўналтирилган сиёсатни амалга оширишга қаратилганини таъкидлаш жоиз.

2005 йилда юридик шахслар даромадлари (фойда)дан олинадиган солиқ ставкаси 18 фоиздан 15 фоизга туширилди, бу эса қарийб 40 миллиард сўмлик маблагни корхоналар ихтиёрида қолдириш имконини берди. Ягона ижтимоий тўлов ставкаси 31 фоизгача қисқартирилди, жисмоний шахсларни солиққа тортиш тизими ўзгартирилди, мулк солиги ставкаси эса 3,5 фоизгача камайтирилди.

Амалда жами 15,2 фоизни ташкил этган солиқ ва тўловлар ўрнига 13 фоиз миқдоридаги ягона солиқ тўловининг жорий этилиши тадбиркорлик фаолиятини ривожлантиришда айниқса кичик корхоналар учун муҳим аҳамиятга эга бўлди. Бу

ўз навбатида кичик корхоналарга фақат 2005 йилнинг иккинчи ярмида қарийб 10 миллиард сўм маблағни тежаш имконини берди.

Солик юкини камайтириш борасида кўрилган чоралар туфайли давлат бюджетига тўпланаётган киримлар, яъни фискал чегирмалар 22,6 фоизгача қисқартирилди.

Натижада корхоналар ихтиёрида қолдирилган 130 миллиард сўмдан зиёд пул уларнинг айланма маблағларини тўлдиришга йўналтирилди ва молиявий аҳволини мустаҳкамлашда муҳим омил бўлиб хизмат қилди.

Нақд пул олишдаги чекловларнинг бекор қилиниши ва бу борадаги талабларга банклар томонидан қатъий риоя этилиши, нақд пул тушумининг ўз вақтида ва тўлиқ топширилиши устидан назоратнинг кучайтирилиши банк-кредит тизимини либераллаштиришда муҳим қадам бўлди.

Тижорат банклари учун уларнинг Марказий банкдаги корреспондентлик ҳисоб рақамларидан чекловсиз фойдаланиш имконияти яратилгани, шунингдек, нақд ва нақд бўлмаган пул айланмаларини унификация қилиш бўйича кўрилган кейинги чора-тадбирлар, нақд пулсиз ҳисоб-китобнинг илгор шакли бўлган пластик карточкаларнинг амалиётда кенг жорий этилиши туфайли ўтган йилда бундай карточкаларнинг сони

тахминан беш баробар ортгани муҳим аҳамиятга эга, албатта.

2005 йилда биз ташқи савдони либераллаштиришда, жаҳон хўжалик алоқаларига интеграциялашув борасида янада салмоқли натижаларга эришдик.

Бунда мамлакатимизда ишлаб чиқарилган маҳсулотларни экспорт қилишни рағбатлантириш, экспорт-импорт операцияларини божхона тарифлари орқали тартибга солишни янада тақомиллаштириш, божхона тўловларини унификация қилиш, солиқ ва божхона маъмуриятчилиги билан боғлиқ жараёнларни соддалаштириш бўйича кўрилган чора-тадбирлар катта роль ўйнади.

Учинчидан – 2005 йилда моддий ресурслар ва тайёр маҳсулотларни реализация қилиш ва улардан фойдаланиш тизимини либераллаштириш йўлида ҳал қилувчи қадам қўйилди.

Бугун тўла ишонч билан айтиш мумкинки, тадбиркорларга, аввало, кичик бизнес субъектларига асосий, шу жумладан, талаб катта бўлган моддий ресурслардан фойдаланиш имконини берадиган барқарор бозор механизми шаклланди.

Биржа савдоларидаги айланма маблағлар ҳажми 2001–2005 йиллар мобайнида 5,5 баробар ортди. Ҳозирги кунда улгуржи савдо айланмасининг учдан бир қисми биржа савдолари ҳиссасига тўғри

келмоқда. Ваҳоланки, 2000 йилда бу кўрсаткич атиги 8,5 фоиздан иборат бўлган эди.

Шуни алоҳида тъкидлаш ўринлики, биржа савдоларида маҳсулот савдосидан энг кўп фойдани кичик бизнес ва хусусий тадбиркорлик субъектлари олмоқда. Бугунги кунда кичик бизнес субъектлари товар-моддий ресурсларга бўлган ўз эҳтиёжининг қарийб 70 фоизини биржа савдоларида қилинаётган харидлар ҳисобидан тъминламоқда.

Барчамизга маълумки, 2005 йилда Тошкентда биринчи бор ўтказилган Халқаро пахта ярмаркаси муҳим аҳамиятга эга бўлди. Бу анжуманда дунёning 26 мамлакатида фаолият кўрсатаётган 200 та хорижий компаниянинг 340 нафар вакили иштирок этди. Ярмарка натижаларига кўра, пахта хом ашёсини харид қилувчи Хитой, Россия, Ҳиндистон, Жанубий Корея, Сингапур, Бангладеш, Бирлашган Араб Амирликлари ва бошқа давлатлар билан 122 та шартнома тузилди.

Ярмарка пахта маҳсулотини сотиш ва уни қайта ишловчиларга воситачиларсиз, тўғридан-тўғри етказиб бериш механизми янада эркинлашишига, харидор мамлакатлар географиясини кенгайтиришга имкон берди.

Тошкентда ўтказилган ярмарка Ўзбекистон дунёда пахта толасини ишлаб чиқарадиган етак-

чи давлатлардан бири сифатида жаҳон пахта бозорида фаол роль ўйнаши мумкинлигини яна бир бор яққол кўрсатди.

Тўртингичдан — хусусий секторни кенгайтириш, кичик бизнес, фермер хўжаликлари ва тадбиркорликни жадал ривожлантириш борасида туб бурилишга эришилди.

2005 йилда давлат корхоналарини бутунлай, шунингдек, давлат акция пакетларини асосан хусусий мулкдорларга сотиш масаласига алоҳида эътибор қаратилди. Натижада 980 та объектдан 902 таси хусусий мулкка айлантирилди. 2000—2005 йиллар давомида жами 4 минг 660 та корхона ва объект хусусий мулкдорларга сотилди.

Масалан, Самарқанд чой қадоқлаш фабрикаси, “Оҳангаронцемент”, “Бухорогипс”, “Паркентсувқурилиш” акциядорлик жамиятлари каби йирик корхоналар тўлигича хусусий мулкдорларга сотилди.

Хусусийлаштириш жараёнининг сўнгги йиллардаги ўзига хос жиҳати давлат активлари ва акция пакетларининг нолга teng харид қиймати бўйича тўлиқ ҳажмда сотилаётганида намоён бўлмоқда.

Кейинги уч йил мобайнида 396 та корхона ва объект 43,2 миллиард сўмлик инвестиция киритиш мажбурияти билан нолга teng харид қийматида сотилди. Низом жамғармасида давлат улуши

бўлган хўжалик субъектлари сони 2001 йилдагига нисбатан уч баробар қисқарди.

Бугунги кунда мамлакатимизда ишлаб чиқарилаётган ялпи ички маҳсулотнинг қарийб 76 фоизи, саноат маҳсулотларининг 78 фоиздан ортиғи, қишлоқ хўжалиги ва чакана савдо айланмасининг деярли барча маҳсулотлари нодавлат сектор улушига тўғри келмоқда. Нодавлат секторда 77 фоиз ёки иқтисодиётда банд бўлган кишиларнинг тўртдан уч қисми меҳнат қилмоқда.

Ҳеч муболагасиз айтиш мумкинки, 2005 йил кичик бизнес ва хусусий тадбиркорликнинг жадал ривожланишида туб бурилиш йили бўлди.

Бугунги кунда ушбу соҳа нафақат иқтисодиётнинг ўсиш суръатларини жадаллаштиришда, балки мамлакатимиз учун ниҳоятда муҳим бўлган бандлик ва аҳоли даромадларини ошириш масалаларини ҳал этишда ҳам етакчи ўрин тутмоқда.

Бунга кўп жиҳатдан хуқукий базани мустаҳкамлаш, иқтисодиётнинг мазкур сектори учун барқарор қулайлик, имтиёз ва кредитлар тизимини шакллантириш масалаларига жиддий эътибор берилаётгани туфайли эришилди. 2005 йилнинг ўзида кичик бизнес обьектлари 31,5 мингтага кўпайди ва уларнинг сони 310 мингтадан ортди.

Ҳозирги кунда кичик тадбиркорлик (бизнес)-нинг ялпи ички маҳсулот ҳажмидаги улуши 38,2

фоизни ташкил этмоқда. Бутун иқтисодиётда банд бўлган аҳолининг 65 фоиздан кўпроғи мазкур соҳада фаолият юритмоқда. Янги яратилаётган иш ўринларининг 85 фоизи айнан кичик бизнес ҳиссасига тўғри келмоқда.

Ўтган йили қишлоқ хўжалиги ишлаб чиқаришини тубдан ислоҳ қилиш ва биринчи галда қишлоқда фермер хўжаликларини жадал ривожлантириш масаласига катта эътибор қартилди.

Мамлакатимиз фермер хўжаликлирида бугунги кунда 1 миллиондан зиёд киши банд бўлиб, 2005 йилги пахта хом ашёсининг 66 фоизи, ғалланинг 55 фоиздан ортиғи фермер хўжаликлари томонидан етиштирилди.

Бешинчидан — 2005 йилда давлат ва назорат тузилмаларининг корхоналар молия-хўжалик фаолиятига аралашувини кескин қисқартириш, хўжалик субъектлари ҳамда тадбиркорликнинг иқтисодий эркинлиги ва хукуқларини сезиларли даражада кенгайтириш бўйича салмоқли ишлар амалга оширилди.

Текширувлар сони 2001 йилдагига нисбатан 2,5 баробардан кўпроқ камайди.

Илгари хўжалик субъектлари томонидан топширилган давлат статистик ҳисботларининг умумий сони икки баробар, ойлик ҳисботлар сони эса 5 баробарга қисқарди, рухсат бериш

билин боғлиқ 12 та процедура бекор қилинди, ҳисобот маълумотларини ишонуний талаб қилганилик учун жавобгарлик кучайтирилди.

Ягона солиқ тўловларининг жорий этилиши муносабати билан солиқ идораларига тақдим этиладиган солиқ ҳисоб-китоблари бўйича хужжатлар сони 10 баробар қисқарди.

Назорат идораларининг хўжалик субъектлари ва тадбиркорлик обьектларини текшириш натижалари бўйича қабул қилган барча қарорларини суд идоралари орқали амалга ошириш тартиби ўрнатилди.

Бундай тартиб ўз-ўзича мазкур субъектларга нисбатан турли санкцияларни қўллашни ҳам тубдан ўзгартириш, яъни уни суд қарори билан ўрнатишни белгилаб беради.

Шундай қилиб, хўжалик субъектлари фаолиятидаги ўзаро масала ва талабларни турли даражадаги давлат бошқаруви идораларида кўриш ва ҳал қилиш каби ўз умрини ўтаб бўлган амалиётга бутунлай барҳам бериш борасида қатъий қадамлар қўйилди. Бугун бундай масалалар, ҳуқуқий демократик давлатларда бўлганидек, истисносиз равишда суд орқали ҳал этилади.

Сўнгги йилларда хўжалик судлари тизими анча мустаҳкамланди, умумий юрисдикция судларининг функциялари фуқаролик ва маъмурий-жиноий ишлар бўйича алоҳида ажратилди.

Шу борада хўжалик судларининг фаолияти алоҳида аҳамият касб этмоқда. 2001—2005 йилларда улар томонидан кўрилган ишлар сони 3,7 баробар, жумладан, маъмурий ҳуқуқбузарлик ҳолатлари бўйича ишлар сони 4 баробардан кўпроқ ошгани ҳам шундан далолат беради.

Кўрилган ишларнинг аксарияти тадбиркорлар ва хўжалик субъектлари фойдасига ҳал қилинаётганини алоҳида таъкидлаш жоиз. Фақат 2005 йилнинг ўзида уларнинг фойдасига 45 миллиард сўмдан ортиқ маблағ ундирилди.

Бозор ислоҳотларини чукурлаштириш ва тадбиркорлик тузилмалари фаолиятига аралашувни чеклаш масалаларини ҳал этишда биз **маъмурий ислоҳотларни амалга оширишга** алоҳида эътибор беришимиз даркор.

Ислоҳотларни янада чукурлаштириш ва иқтисадиётни эркинлаштириш масалалари эски замон иллати бўлган бюрократик бошқарув тизимини бартараф этиш билан бевосита боғлиқ эканини исботлаб ўтиришнинг ҳожати йўқ, леб ўйлайман. Тан олиш керакки, республикада амалга оширилаётган маъмурий ислоҳотлар марказ ва жойлардаги бошқарув органлари тузилмаларини такомиллаштиришга сезиларли таъсир қилди, бошқарув ходимлари ва уларнинг фаолияти билан боғлиқ харажатларни анча қисқартириш имконини берди.

2001–2005 йиллар мобайнида бошқарув ходимларининг умумий сони 75 минг кишига ёки 35,5 фоизга, жумладан, республика органлари бўйича 21 фоиз, маҳаллий бошқарув органлари бўйича 63,5 фоиз, хўжалик бошқарув органлари бўйича 30,5 фоизга қисқартирилди.

Лекин бу тизим, кўрилаётган кескин чораларга қарамасдан, афсуски, ҳали-бери ўзининг салбий кучи ва таъсирини йўқотганий йўқ. Афсуски, кўпчилик олиб борилаётган маъмурий ислоҳотларни ҳанузгача бошқарувчилар сонини шунчаки қисқартиришдан иборат, деб нотўғри тушунмокда.

Маъмурий ислоҳотларнинг натижалари аввалимбор бошқарув тузилмаларининг маъно-мазмуни ва мақсадларининг ўзгариши, уларнинг бошқарув ва назорат ваколатларининг кескин қисқартирилиши, керак бўлса, барҳам топиши, шунингдек, хўжалик субъектларининг ишига ноқонуний аралашувга, уларнинг фаолиятини чеклашга қаратилган хатти-ҳаракатларга йўл қўймаслик билан узвий боғлиқ.

Буни барча бўғиндаги, айниқса, марказда ва вилоятларда лавозимда ўтирган катта-кичик раҳбарлар аниқ тушуниб олиши ва ҳаётга қатъий татбиқ этиши зарур.

Иқтисодиётимиздаги сифат ўзгаришлари, бозор ислоҳотлари йўлидан илгари бориш ҳақида

тапирганда яна бир бор таъкидламоқчиман: биз ислоҳотларни шунчаки ислоҳот учун амалга оширмаяпмиз. **Ислоҳотлар қандай самара бераётгани, улар одамларнинг ижтимоий аҳволига қандай таъсир кўрсатаётганини ҳисобга олиш муҳим аҳамиятга эга.**

2005 йилда бюджет соҳаси хизматчиларининг ойлик иш ҳақи, пенсиялар, стипендия ва нафакалар ўртача 40 фоизга оширилди. Ўз навбатида, бу аҳолининг реал даромадларини 22 фоизга кўпайтириш учун асос бўлди.

Одамларнинг дунёқараши, менталитети ўзгариб, улардаги ижтимоий боқимандалик ва фақат давлатдан ёрдам кутиб яшаш кайфияти барҳам топмоқда.

Хусусийлаштириш, хусусий мулкни мустаҳкамлаш, кичик корхоналар, микро фирмалар, фермер хўжаликлари ташкил этиш ва тадбиркорликни рағбатлантириш ҳисобидан мамлакатимиизда демократик жамиятнинг асоси ва таянчи сифатида ўрта синф амалда шаклланмоқда.

Биринчи навбатда бу — ўз кучи ва имкониятига таяниб-суяниб яшайдиган, ўзини, оиласини боқаётган ва давлатга ҳам катта наф келтираётган, ўзининг мустақил тижорат ишига эга бўлган мулкдор-тадбиркорлардир.

Айнан ана шундай одамлар жамиятимизнинг таянчи бўлиб, унинг ижтимоий асосини ташкил

этади. Чунки айнан шулар демократик ва бозор ислоҳотларини давом эттириш ва чуқурлаштиришдан, мамлакатни барқарор ва изчил ривожлантиришдан кўпроқ манфаатдор эканини таъкидлаш зарур.

Шундай қилиб, мамлакатимизнинг 2005 йилдаги иқтисодий ривожланиш натижаларини якунлар эканмиз, лўнда қилиб айтганда, шуни таъкидлаш керакки, ўтган давр мобайнида демократик янгиланиш ва иқтисодий ислоҳотларни чуқурлаштириш, иқтисодиётни эркинлаштириш йўлида, ҳеч шубҳасиз, улкан қадамлар кўйилди.

Шунинг эвазига иқтисодий тараққиётимизнинг барқарор суръатлар билан юксалиши, аввало ялни ички маҳсулот ва инвестицияларнинг ўсишида, ташқи савдо соҳасида катта ҳажмда ижобий сальдога эришишимизда, давлат бюджетини профицит билан бажаришда, кўпгина социал муаммоларни ечишда сезиларли натижаларни кўлга киритдик.

Ҳурматли мажлис иштирокчилари!

Энди мамлакатимизни 2006 йилда иқтисодий ривожлантириш бўйича режа ва мақсадларимиз, бошлаган ислоҳотларни янада чуқурлаштиришга қаратилган устувор вазифалар ҳақида қисқача тўхталиб ўтмоқчиман.

2006 йилда иқтисодиётнинг юқори ўсиш суръатларини, барқарор ва мутаносиб макроиктисо-

дий күрсаткычларни таъминлаш масалалари доимий дикқат марказимизда бўлмоғи даркор.

Бу аниқ мақсадли вазифани амалга ошириш учун 2006 йилда ялпи ички маҳсулотни 7,2 фоизга, аҳоли жон бошига ҳисоблагандага эса 6 фоизга кўпайтириш кўзда тутилмоқда. 2006 йилда иқтисодий ривожланиш, авваламбор, саноат маҳсулотлари ҳажмини кўпайтириш (9 фоиз), қишлоқ хўжалиги маҳсулотлари ишлаб чиқариш (5,2 фоиз), хизмат кўрсатиш соҳаси (13,2 фоиз) ва савдонинг (8,5 фоиз) ўсиши ҳисобига таъминланади. Йил давомида инфляция даражасини чеклаш ва унинг 6—8 фоиз даражада бўлишини таъминлаш мўлжалланмоқда.

Ишлаб чиқаришни жадал ривожлантириш учун мустаҳкам пойдевор яратишда, биринчидан, бюджет ва солиқ ислоҳотларини чукурлаштириш, солиқ тизимини соддалаштириш ва унификация қилиш ҳамда солиқ юкини янада камайтириш мўлжалланмоқда.

Бу мақсадга эришиш учун 2006 йилда даромад солиғи ставкалари сезиларли даражада — 15 фоиздан 12 фоизга, ягона ижтимоий тўлов 25 фоизгача камайтирилади. Қимматбаҳо қофозлар бозорига қизиқиши ортириш ва унинг иштирокчилари даромадларини кўпайтириш мақсадида дивиденdlар ва фоизлар бўйича даромад солиғи 15 фоиздан 10 фоизга туширилди.

Экология солиғи ва савдо қилиш ҳуқуқи учун ойлик йиғим бекор қилинди. Бундан ташқари, солиққа тортиладиган базадан ишлаб чиқариш билан боғлиқ қатор харажатлар чиқариб ташланди.

Бу соҳада кўзда тутилган чора-тадбирларнинг амалга оширилиши натижасида, дастлабки ҳисоб-китобларга кўра, корхоналар ва хўжалик тузилмалари ихтиёрида қўшимча 250 миллиард сўм маблағ қолади. Бу маблағлар ишлаб чиқариш, инвестиция мақсадлари ҳамда ходимлар иш ҳақини оширишга йўналтирилиши тавсия қилинади.

Солиқ юкини сезиларли равишда енгилластириши бўйича кўзда тутилган чора-тадбирларни амалга ошириш борасидаги энг муҳим вазифа — ишлаб чиқаришни фаоллаштиришнинг муҳим омили бўлмиш харид талабининг жадал ўсишини таъминлашdir.

Бу ҳақда гапирганда, биз нафақат аҳоли талабини назарда тутамиз, балки корхоналар ва тадбиркорлик тузилмалари айланма маблағлари ҳажмининг кўпайиши ҳисобига харид талабининг ўсишини ҳам инобатга оламиз. Умумий талабининг ўсиши деярли барча товарлар, шу жумладан, истеъмол товарлари ишлаб чиқаришни ошириш учун кучли рағбатлантирувчи омилларни яратади. Шу борада аввало ишчиларнинг иш

ҳақи, аҳолимизнинг даромадлари ўсишини таъминлашимизни кўзда тутамиз.

2006 йилда бюджет ташкилотлари ходимлари иш ҳақининг икки босқичда оширилиши кўзда тутилган.

Бунинг натижасида ўртача ойлик иш ҳақининг 1,4 маротаба ошиши таъминланади. Худди шундай миқдорда нафақа, пенсиялар, стипендия ва бошқа ижтимоий кўмаклар ҳам кўпаяди.

Кичик бизнес, фермер ва деҳқон хўжаликларини ривожлантиришга қаратилган ишларни изчил давом эттириш, йирик ва кичик ишлаб чиқарувчилар ўртасидаги кооперацияни, шунингдек, касаначиликни кенгайтириш аҳоли даромадларининг ўсишида муҳим омил бўлади.

Буларнинг барчасини инобатга олганда, аҳолининг реал пул даромадлари, ҳисоб-китоблар бўйича, камида 20 фоизга ўсиши керак.

Биз тадбиркорликнинг мана шу йўналишларини рағбатлантириш юзасидан аниқ чоралар кўришимиз, бунда микрокредитлаш ҳамда микролизинг механизmlари ва ҳажмини кенг ривожлантиришга алоҳида эътибор қаратишимиш зарур. Шу мақсадлар учун хизмат қиласидаган “Микромолиялаш тўғрисида” қонун қабул қилишни тезлаштиришимиз зарур.

Мазкур вазифани амалга оширишнинг механизми ва воситаси сифатида барча худудларда ўз

филиалларига эга бўлган ихтисослашган банк ташкил қилиниши ва у кичик бизнес ва хусусий тадбиркорлик субъектларига микрокредитлаш ва микролизинг бўйича турли хизматлар кўрсатиши даркор. Бундай банкни ташкил қилишга жорий йилнинг биринчи чорагида киришиш лозим.

Бу борада ечилиши зарур бўлган энг муҳим масала — банкнинг устав фондини ташкил қилиш учун унинг манбанини топиш, кредит процентини 5 фоиздан оширмаслик ва бериладиган кредитларни қайтариш кафолатларини аниқлаш ва ишга солишдан иборат.

Харид талабини ошириш ва рағбатлантириш мақсадида узоқ муддат фойдаланиладиган товарларни сотиб олиш учун аҳолига, айниқса, қишлоқ аҳолисига кредит ажратишни кескин кўпайтиришимиз керак. Ҳозирги вақтда фақат енгил автомобиль харид қилишни кредитлаш кенг кўлланмоқда, холос.

Айни пайтда мебель, телевизор, холодильник, кир ювиш машиналари, муракқаб майший ва бошқа электрон техникани сотиб олиш учун кредит ажратишнинг талай имкониятлари мавжуд.

Барча банкларнинг бу йўналишдаги фаолиятини кучайтириш лозим. Марказий банк тижорат банклари, Савдо-саноат палатаси билан биргаликда, бир ой муддатда, аввало ўзимизда ишлаб чиқариладиган, узоқ муддат фойдаланадиган

товарларни ҳарид қилиш учун аҳолига кредит ажратиш ва олинган кредитларни қайтаришни кафолатлаш чора-тадбирлари бўйича Вазирлар Маҳкамасига таклифлар киритсин.

Олдимизда турган бундай вазифаларни бажариш, иқтисодиётимизда мавжуд бўлган кўпгина муаммоларни ечиш учун банк тизимида олиб борилаётган ислоҳотларни янада чуқурлаштиришимиз ва кеңгайтиришимиз даркор.

Бугунги қунда банклар фаолияти хўжалик субъектлари, кичик бизнес, фермерлик ҳамда хусусий тадбиркорлик вакилларининг жиддий эътиrozларига сабаб бўлаётганини очиқ тан олишимиз лозим.

Банк тизимида пул-кредит сиёсати мутаносиблигини таъминлашнинг замонавий воситалари, шунингдек, бошқарув механизмларининг бозор ва монетар агрегатларидан суст фойдаланимокда.

Банкларнинг капиталлашуви ва молиявий барқарорлигини ошириш, уларнинг ресурс базасини аҳоли ва хўжалик субъектларининг бўш маблағларини жалб қилиш ҳисобига кўпайтириш борасидаги вазифалар етарли даражада бажарилмаяпти.

Марказий банк ва тижорат банклари биринчи навбатда мижозларнинг депозит ҳисоб рақамларидаги нақд пулларининг ҳеч қандай қийинчи-

ликсиз bemalol beriliishi, naqd va naqd boulmagan pul muomalasini tulyk unifikasiya қилиш ҳисобига ахоли va бизнес vakkilarinинг bank tizimiga boulgan išonchini mustaҳкамлаш учун barча куч va imkoniyatlari ni safarbar etmoғi зарур.

Bankdan taşqari pul ailanmasini kesskin қisқartiriш va pul muomalasini mustaҳкамлаш, milliy валюта barқarorligini oшириш, chakanan savdo va xizmat kүrsatiш соҳасида ҳисоб-kitoblarни amalga oширишда plastik kartochkalardan foidalaniшни kengaytiiriш masalalari bundan buён ҳам эътиборимиз markazida bуliishi dаркор.

Banklara ro bозорда raқobat muхитini яратиш, bank va lizing xizmatlari segmentlari ni rivojlanтириш, mikrokreditlar ajratishni сезиларли daражада kengaytiiriш учун barча imkoniyatlarni iшга solish зарур.

Barчamiz bir fikrni tushunib oliшимиз kerak: kutilaётган iқтисодий ўсиш bizning бюрократik түсикларни, бизнес юритишда хавф etkazaётган barча сабабларни bartaraф этиш, тадбиркорлик фаолияти эркинligini таъминлаш borasidagi iшларимиз bilan chambarchas boғlik. Шу борада маъмурий ислоҳотлар доирасида лицензиялар va turli ruhsatnomalar bеришни kesskin қisқartiriшни давом etтириш лозим.

Адлия вазирлиги, Монополиядан чиқариш, рақобат ва тадбиркорликни қўллаб-куватлаш давлат қўмитаси, Савдо-саноат палатаси икки ой муддатда амалдаги рўйхатга олиш, бизнес юритиш учун лицензия ва рухсатнома бериш тизимини яна бир бор чуқур инвентаризация қилсин ҳамда Вазирлар Маҳкамасига янги корхоналар ва бизнес ташкилотларини рўйхатга олишнинг аксарият ҳолларда хабардор қилиб қўйиш тизимига ўтиш бўйича таклифлар киритсин.

Иккинчи муҳим устувор йўналиш — таркибий ислоҳотлар ва иқтисодиётни модернизациялашни янада чуқурлаштириш, унинг кўламини кенгайтириш, хорижий инвестицияларни жалб қилиш учун зарур шароитларни яратишдан иборатdir.

Биз 2006 йилда нефть-газ мажмуида, электр энергетикаси ва рангли металлургия соҳасида ишлаб чиқаришнинг барқарор ҳажмларини таъминлашимиз керак. Машинасозлик, енгил саноат, биринчи галда, ил-газлама ва тикувчилик саноатини янада юқори суръатлар билан ривожлантириш зарур.

Бу устувор вазифани амалга ошириш натижасида иқтисодиёт таркибида сифат ўзгаришларини таъминлаш, яъни 2010 йилгача саноатнинг, шу жумладан, қурилиш индустриясининг ялпиички маҳсулотдаги улушини босқичма-босқич

24—26 фойзгача, хизмат соҳасининг улушкини 45—47 фойзгача кўпайтириш даркор.

Бизнинг фаолиятимизда углеводород хом ашё захираларининг юқори суръатларда ўсишини таъминлаш, энергетика мажмуасига қарашли тармоқларни тез суръатлар билан ривожлантиришга қаратилган геологик қидирув ишларини жадал ва кент кўламда олиб бориш учун хорижий инвесторларни жалб қилиш муҳим аҳамият касб этади.

Саноат ишлаб чиқаришининг ҳудудий жойлашуви ва таркибини такомиллаштириш масаласини тубдан ҳал этиш лозим. Бу борада маҳаллий хом ашёни қайта ишлаш билан шуғулланадиган ва рақобатга бардошли тайёр маҳсулот ишлаб чиқарадиган кичик корхоналар ва микрофирмалар ташкил этишга устувор аҳамият беришимиз керак.

Вазирлар Маҳкамаси, Қорақалпоғистон Вазирлар Кенгаши, вилоятлар ҳокимларлари икки ой муддатда замонавий ишлаб чиқариш яхши ривожланмаган аҳоли пунктларида кичик корхоналар ёки маҳаллий хом ашё асосида маҳсулот ишлаб чиқараётган йирик корхоналарнинг филиалларини ташкил этиш борасида маҳсус дастур ишлаб чиқиши лозим.

Бу дастурда мазкур субъектларга бериладиган имтиёз ва қулийлик тизимини, жумладан, бун-

дай кичик корхоналарни ривожлантириш учун биноларни нолга тенг қиймат бўйича бериш имтиёзларини кўзда тутиш зарур.

Шу борада янги қўшма корхоналар ташкил этиш, мавжуд ишлаб чиқариш қувватларини модернизация қилиш ва технологик янгилашга йўналтирилаётган хорижий инвестицияларни янада кенг кўламда жалб этиш нақадар катта аҳамиятга эга эканини барчамиз тушуниб олишимиз керак.

Ҳукуқий базани янада мустаҳкамлаш, белгиланган имтиёз ва қулайлик кўллашнинг аниқ ва ошкора механизмини яратиш, чет эл ишбилармон доиралари ва салоҳиятли ҳамкорларга иқтисодиётимизнинг муайян тармоқларидағи инвестиция имкониятлари ҳақида ҳар томонлама кенг ахборот етказиш зарур. Энг асосийси, бюрократик тўсиқ ва говлар, амалдорларнинг лоқайдлиги ва коррупцияга берилиш ҳолатларидан узилкесил халос бўлиш лозим.

Таъкидлаш жоизки, бу вазифаларни ҳал қилишда яқинда ташкил этилган Ташқи иқтисодий алоқалар, инвестициялар ва савдо вазирлигининг етарли даражадаги фаоллиги ҳозирча сезилмаяпти.

Учинчи устувор масала — хусусий мулкчилик тармоғини кенгайтириш, бизнес учун қулай мухит яратиш ва унинг кафолатларини мустаҳкамлашдан иборат.

Бунинг учун қандай вазифаларни амалга оширишимиз зарур?

Аввало, корхоналарни хусусийлаштириш борасидаги ёндашувларни тубдан ўзгартириш кепрак. Айниқса, йирик корхоналар, биринчи навбатда, катта миқдордаги инвестициялар ва замонавий технологияларга муҳтоҷ корхоналарни хусусийлаштиришга алоҳида эътибор қаратиш даркор.

Кўпгина холдинг ва акциядорлик компаниялари устав жамғармаларида ҳали ҳам давлат акциялар пакети улуши асоссиз равишда, ҳатто бунга ҳеч қандай зарурат бўлмаса ҳам, юқори миқдорда қолаётгани билан муроса қилиб бўлмайди.

“Ўзқишлоқхўжаликмаш-холдинг”, “Ўзбекэнерго”, “Ўзбекистон темир йўллари”, “Ўзбекнефтгаз” каби мамлакатимиз бозорида монопол мавқени эгаллаб турган кўплаб компанияларнинг обьектларини хусусийлаштириш масалалари бўйича ёндашувларни жиддий қайта кўриб чиқишимиз зарур.

Бугунги кунда Давлат мулки қўмитаси асосан майдо, иккинчи даражали масалалар билан овора бўлиб, корхоналарни хусусийлаштириш ва хусусийлаштиришдан сўнг кўллаб-куватлаш, корпоратив бошқарув тизимида тегишли тартиб ўрнатиш, акциядорлик жамиятлари ва уларнинг

кузатув кенгашлари ролини тубдан қайта кўриб чиқиш ва фаолиятини кучайтириш бўйича муҳим стратегик йўналишларда ҳеч қандай ташаббус кўрсатмаётганига чида бўлмайди.

Қимматли қоғозлар бозорини, айниқса, иккиласмчи бозорни ривожлантиришга алоҳида эътибор қаратиш, рақобатга бардошли фонд бозорини ривожлантириш бўйича яқин истиқболга мўлжалланган самарали стратегияни ишлаб чиқиш, акциялар ва объектларнинг биржа савдларида сотилишида ошкоралик тамойилларини кескин кучайтириш керак.

Ҳар бир корхона ва объектни биржа ва биржадан ташқари савдода сотиш учун тайёрлаш механизмини қайта кўриб чиқиш лозим. Бу борада янги, самарали тизимни жорий этиш, хусусийлаштиришдан кейинги мониторингни амалга оширишда тизимли ёндашувни ишлаб чиқиш, янги мулкдорларнинг ўз зиммасига олган инвестиция мажбуриятларини бажариш учун уларнинг иқтисодий масъулиятини ошириш зарур.

Давлат мулки қўмитаси Иқтисодиёт вазирлиги, Монополиядан чиқариш, рақобат ва тадбиркорликни қўллаб-қувватлаш давлат қўмитаси, бошқа манфаатдор тузилмалар билан биргаликда, икки ой муддатда, 2006—2008 йилларга мўлжалланган янги хусусийлаштириш дастури-

ни ишлаб чиқиб, Вазирлар Маҳкамасига киритиши лозим.

Ушбу дастурга табиий монополияларнинг стратегик аҳамиятга эга бўлмаган корхоналари ни киритиш ҳамда инвестор томонидан муайян инвестиция мажбуриятларини зиммасига олиш шарти билан, нолга тенг харид қиймати бўйича савдога кўйилаётган корхона ва объектлар рўйхатини сезиларли даражада кенгайтириш керак.

Хусусийлаштириш жараёнида ўз ечимини кутаётган бир қатор принципиал масалалар кунтартибига кўйилиши лозим.

Биринчидан. Иқтисодиёт вазирлиги, Молия вазирлиги, Ер ресурслари, геодезия, картография ва давлат кадастри давлат қўмитаси, Давлат мулки қўмитаси, Адлия вазирлиги, Монополиядан чиқариш, рақобат ва тадбиркорликни кўллаб-кувватлаш давлат қўмитаси бир ой муддатда инвесторлар — хусусий мулкдорларга бинолар ва иншоотларни улар жойлашган ер участкалари билан бирга хусусийлаштириш ҳуқуқини бериш ҳисобига хусусийлаштириш объектларини кенгайтириш имкониятлари юзасидан таклифларни кўриб чиқсин ва Вазирлар Маҳкамасига киритсин.

Бунда ер участкаларининг нархи қатъий бозор ёндашувларидан келиб чиқиб белгиланмоғи лозим. Бугунги кунда кўпгина хусусийлаштирил-

ган объектлар, мол-мулкининг нархлари атиги бир неча миллион сўмни ташкил этгани ҳолда, ўнлаб гектар ер майдонларини эгаллаб олган.

Бундай ер участкаларининг катта қисми янги мулкдорлар томонидан умуман фойдаланилма-япти, чунки бу ерлар уларга муддатсиз фойдала-ниш учун бепул берилган.

Иккингиздан. Якка тартибда уй-жой куриш учун ер участкаларини белгиланган меъёrlар доира-сида ажратиш ҳисобига хусусийлаштириш жа-раёнларини янада кенгайтириш ва чукурлашти-ришга эришиш мумкин. Бу хусусий ва оиласиий бизнесни янада кенгайтиришнинг гарови, ипотеканинг бошқа шаклларини ривожлантириш-нинг кучли омили бўлиб хизмат қилади.

Айни пайтда амалда мавжуд бўлган, лекин давлатнинг назоратидан четда қолаётган кўчмас мулк ва бундай мулк жойлашган ер участкалари бўйича савдо айланмасининг қонунийлиги ва ошкоралигини таъминлайди.

Учинчидан. Хусусий бизнес кафолатларини мустаҳкамлаш, унинг ривожи учун кулай муҳит яратиш мақсадида давлат бошқаруви идоралари ва бозор институтларида маъмурий процедура-ларни бажариш билан боғлиқ, ҳали-бери анча юқори бўлиб келаётган бизнес харажатларини ка-майтириш нуқтаи назаридан қайта кўриб чиқиши лозим.

Монополиядан чиқариш, рақобат ва тадбиркорликни қўллаб-куватлаш давлат қўмитаси, Молия вазирлиги Савдо-саноат палатаси, юқорида қайд этилган маъмурий процедураларни бажарувчи вазирлик ва идоралар билан биргаликда жорий йилнинг 1 апрелига қадар бу борадаги мавжуд ҳолатни таҳлил этсин ҳамда Вазирлар Маҳкамасига шу ҳақда аниқ таклифлар киритсин.

Бундан ташқари, жорий йилнинг биринчи чорагида тадбиркорлик субъектлари учун жарима санкцияларини камайтиришни кўзда тутадиган қонунчиликни такомиллаштириш бўйича бошланган ишларни ниҳоясига етказиш керак. Нега деганда, ўта юқори даражада белгиланадиган жарима санкциялари баъзан текширувчилар орасида коррупция ҳолатларига сабаб бўлаётгани ҳам сир эмас.

Тўртингчидан. Бизнес учун қулай муҳитни шакллантиришнинг ғоят муҳим вазифаларидан бири суд тизимини янада мустаҳкамлаш, тадбиркорларнинг қонуний хукуқларини ҳимоя қилиш ва уларга янада кўпроқ эркинлик беришга қаратилган суд ислоҳотларини чуқурлаштиришdir. **Адлия вазирлиги, Олий хўжалик суди, Олий суд бир ой муддатда мазкур масалалар бўйича таклифлар киритсин.**

Хурматли мажлис иштирокчилари!

Кичик бизнесни ривожлантириш ва фермер хўжаликларини шакллантиришни рағбатланти-

риш бўйича қабул қилинган қарорларнинг сўзсиз бажарилишига алоҳида эътибор бериш ва бу ма-салада қатъий назорат ўрнатиш зарур.

2006 йилда 657 та ширкатни, жумладан, пахта-чилик ва ғаллачиликда 447 та, мева-сабзавотчиликда 210 та ширкатни фермер хўжаликларига айлантириш борасида бошланган ишларни ниҳоя-сига етказиш олдимизда турган муҳим вазифадир.

Шуни алоҳида таъкидлаб айтмоқчиманки, фермер хўжаликларининг ривожланиши ва мустаҳкамланиши ҳамда шу жараёнга бевосита боғлиқ бўлган қишлоқдаги туб ислоҳотларнинг са-марали амалга оширилиши жуда оддий, аммо муҳим бир тамойилга асосланишини унутмасли-гимиз керак.

Яъни, бу борада фермерларнинг шахсий ман-фаатдорлиги биринчи ўринда туриши керак. Бу мақсад қишлоқларимиз ҳайтини ўзгартириш бо-расида олиб борилаётган барча ислоҳотларимиз-нинг асосий ва ҳаракатлантирувчи кучи бўлиб қолмоғи зарур.

Ҳозирги босқичда фермерлар томонидан ўзи ишлаб чиқарадиган қишлоқ хўжалиги маҳсулотини, аввало, чорвачилик ва мева-сабзавот маҳ-сулотларини қайта ишлаш бўйича ихтиёрийлик асосида кооперациянинг турли шаклларини яра-тишга қаратилган таъсирчан механизм ишлаб чиқилиши муҳим аҳамиятта эга.

Тўртинчи устувор вазифа — аҳолининг даромадлари ва турмуш даражасини оширишнинг ўта муҳим шарти бўлган бандлик масаласини ҳал этишдир.

Мазкур долзарб муаммони ечиш нафақат иқтисадий, балки улкан ижтимоий ва сиёсий аҳамиятга эга бўлиб, ҳалқимиз турмуш даражаси ва фаровонлигини ошириш билан бевосита боғлиқ бўлгани ҳақида ортиқча гапиришнинг зарурати йўқ, деб ўйлайман.

Бундай ўта долзарб ва муҳим вазифаларни ечишда ҳеч ким, авваламбор, маҳаллий ҳокимиётлар раҳбарлари ва ходимлари четда турмаслиги керак.

Бу ўринда гап мамлакатимизда яқинда қабул қилинган, катта аҳамиятга эга бўлган қарор ва дастурларни амалга ошириш ҳақида бормоқда. Жумладан:

янги микрофирмаларнинг ташкил қилиниши, оиласијиј бизнес ва кичик хусусий корхоналарнинг ривожлантирилиши, микрокредитлаш тизимларининг рағбатлантирилиши ҳақида;

касаначиликнинг йирик саноат корхоналари билан кооперациялашувидан фойдаланиш имкониятларини кенгайтириш тўғрисида;

енгил ва озиқ-овқат саноатининг маҳаллий хом ашёни чукур қайта ишлаш ва тайёр, рақобатга бардошли маҳсулот ишлаб чиқаришга йўналти-

рилган, кўп меҳнат талаб қиласиган тармоқларини жадал ривожлантириш ҳақида;

2010 йилгача бўлган даврда хизмат кўрсатиш ва сервис соҳасини, биринчи навбатда, қишлоқ жойларда ривожлантириш хусусида;

шахсий томорқа, дехқон ва фермер хўжаликларида чорва моллари, авваламбор, қорамоллар сонини оширишни рағбатлантириш тўгрисида гап бормоқда.

Шуни таъкидлаш жоизки, янги иш ўринларини яратишга қаратилган ушбу йўналишларнинг аксарияти катта капитал маблағларни талаб этмайди. Уларда кўзда тутилган кўрсаткичларнинг тўла бажарилиши биз учун муҳим аҳамиятга эга.

Негаки, бу ўн минглаб кишиларни, айниқса, хотин-қизлар, қишлоқ ёшлигини иш билан таъминлаш, оиласарнинг даромадини сезиларли даражада кўпайтириш, бутун мамлакатимиз аҳолисининг фаровонлигини ошириш имконини яратади.

Ўзбекистон Республикаси Вазирлар Маҳкамаси, Қорақалпоғистон Республикаси Вазирлар Кенгаши, вилоятлар, шаҳар ва туман ҳокимликлари қабул қилинган дастурлар доирасида аҳоли бандлигини таъминлаш учун барча шарт-шароитларни яратиш, бу масалани ҳал қилиш учун зарур бўлган бинолар, микрокредитлар ажратиш, бир сўз билан айтганда, ҳар томонлама ёрдам ва

кўмак кўрсатиш бўйича аниқ чора-тадбирларни ишлаб чиқиши даркор.

Ушбу дастурларнинг бажарилиши хукумат ва маҳаллий ҳокимият органларининг ҳар бир чорак якунларига бағишлиланган йиғилишларида атрофлича кўриб чиқилиши лозим.

Бешинч устувор вазифа — экспортни ҳар тоннлама рағбатлантириш ва валюта захираларини тежаш, улардан оқилона ва самарали фойдаланишни таъминлашдан иборат.

Мазкур устувор масаланинг амалга оширилиши иқтисодиётнинг экспортга йўналтирилган таркибини шакллантириш, экспорт салоҳиятининг ўсишида хусусий сектор улушкини кўпайтириш орқали ташқи савдо ва валюта бозорини янада эркинлаштиришни тақозо этади.

Бу борада мамлакатимизда экспортни ҳар тоннлама рағбатлантириш, юртимизда ишлаб чиқарилган товарларнинг ташқи бозорларга чиқиши ва интеграциялашувини таъминлайдиган инфратузилмани ривожлантириш масалалари янада долзарб аҳамият касб этади.

Ҳукуматнинг бу борадаги энг муҳим вазифаси — амалдаги маъмурий, божхона, банк процедураларини чуқур таҳлил қилиш, мамлакатимизда ишлаб чиқарилаётган рақобатта бардошли маҳсулотларнинг экспорти йўлида ғов бўлиб турган барча тўсикларни олиб ташлашдан иборат.

Шу ўринда ҳал қилиниши лозим бўлган яна бир муаммога тўхталишни истардим. Тобора кўпайиб бораётган кичик корхоналар ёки хусусий тадбиркорларнинг ҳаммаси ҳам ўз маҳсулотини мустақил равишда самарали экспорт қила олмайди, албатта.

Бунга уларнинг нафақат моддий ва молиявий ресурслари, балки тажрибаси ҳам етишмайди, жаҳон бозорида эса, ўз молини сотиш учун кескин рақобат тобора кучаймоқда.

Бугунги кунда ҳалқаро амалиётда экспорт масаласи билан шу соҳага ихтисослашган ташқи савдо ташкилотлари, бу ишнинг ҳақиқий профессионаллари шугулланади. Фақат меҳнат тақсимоти ва ихтисослашув, янги замонавий технологияларга суюниш жаҳон бозорида рақобатга киришиш, кичик корхоналар маҳсулоти экспортини салмоқли даражада кўпайтириш ва унинг самарадорлитини ошириш имконини беради.

Шу сабабли Ташқи иқтисодий алоқалар, инвестициялар ва савдо вазирлиги Савдо-саноат палатаси, Молия вазирлиги, Иқтисодиёт вазирлиги ва Монополиядан чиқариш, рақобат ва тадбиркорликни қўллаб-куватлаш давлат қўмитаси билан ҳамкорликда ташқи савдо компаниялари фаолиятини тартибга соладиган мавжуд қонун ҳужжатларини қайта кўриб чиқиши керак.

Ва бир ой муддатда Вазирлар Маҳкамасига ташқи бозорда изчил иш олиб бораётган хусусий трейдерларга экспортга маҳсулот ишлаб чиқараётган ўз ишлаб чиқарувчиларимизга яратилган имтиёз ва қурайликларни қўллаш борасида таклифлар киритиши зарур.

Ҳозирги кескин халқаро рақобат шароитида ўз маҳсулотини хорижга сотаётган ишлаб чиқарувчиларимиз экспортини кредитлаш ҳамда экспортга маҳсулот етказиб беришни суғурталаш механизмларини қўллаш амалиётини кенгайтириш керак.

Сифатни бошқариш халқаро тизимларини ва ишлаб чиқарилаётган маҳсулотлар сертификациясини жорий этаётган корхоналарни ҳар томонлама рағбатлантириш лозим.

Юқорида зикр этилган барча муаммоларни ечиш мақсадида амалдаги Божхона кодексининг янги таҳририни ишлаб чиқиш зарурати бугун кун тартибида турибди. Мазкур кодекс барча божхона процедуралари бажарилишининг очиқлигини таъминлаш, ички бозорни сифатсиз контрабанда маҳсулотлари кириб келишидан ҳимоялашга қаратилиши, бевосита таъсир кучига эга бўлган норматив ҳужжат бўлиши керак.

Валюта бозори ва ташқи савдо бозорининг янада эркинлаштирилиши валюта ресурсларидан фойдаланишда қатъий тежамкорликка амал

қилиш билан бирга олиб борилиши лозим. Валюта захиралари, биринчи навбатда, ишлаб чиқаришни техник қайта жиҳозлашга, янгилаш ва модернизация қилишга, шу асосда корхоналарнинг экспорт салоҳиятини юксалтиришга йўналтирилмоғи зарур.

Алоҳида эътибор қаратилиши лозим бўлган олтинчи устувор масала бу — уй-жой-коммунал хўжалигидаги ислоҳотларни чукурлаштиришdir.

Бу, аввало, уй-жой-коммунал хўжалиги соҳасидаги бошқарувни тубдан яхшилаш, уй-жой мулкдорлари ширкатлари мақомини, уларнинг ташкилий ва молиявий мустақиллигини, фаолиятининг самарадорлигини ошириш масалаларини ўз ичита олади. Ҳозирги кунда мамлакатимизда 2,5 мингта шундай ширкатлар ташкил этилган.

Бундан кўзланган асосий мақсад аввалимбор ширкатларни етарли даражада ваколатга, зарур имтиёз ва преференцияларга эга бўлган уй-жой мулкдорларининг ҳақиқий ўзини ўзи бошқариш институтларига айлантиришдан иборат.

Уй-жой мулкдорлари ширкатлари, биринчи галда, уй-жой мулкдорларининг маблағларини жамлаган ҳолда, бирлашган буюртмачи сифатида иш юритмоғи, тўпланган маблағларни бевосита ўз олдида турган мақсадга, яъни уй-жой фондини таъмирлаш, ободонлаштириш ва сақлашга йўналтириши лозим.

Бирок, афсус билан қайд этиш керакки, ўтгаң йили Тошкент шаҳри ва Тошкент вилоятида уйжойлардаги шароитни яхшилаш бўйича муайян ишлар бажарилганига қарамай, ширкатлар фаолиятини ҳали-ҳамон қониқарли, деб бўлмайди.

Аксарият ҳолларда улар собиқ ЖЭК ва кооперативлардан деярли фарқ қилмаяпти. Уларнин асосий камчиликларидан бири шуки, маҳаллий ҳокимликлар томонидан етарлича назорат ўрнатилмагани туфайли тўпланган коммунал тўловлар ҳеч қандай режасиз, назарда тутилмаган максадларга сарфлаб юборилмоқда.

Ширкатлар доимо айланма маблағларга муҳтож бўлиб тургани ҳолда, уларда асоссиз равишда бошқарув ва хизмат кўрсатиш ходимларининг ортиқча штати сақлаб қолинмоқда. Жорий ва капитал таъмирлаш ишларининг сифати қониқарсиз аҳволда, кўзбўямачилик ва маблағларни суиистеъмол қилиш ҳолатларига йўл қўйилмоқда. Кўпинча ширкатларга тасодифий кишилар бошчилик қилмоқда.

Ҳар йили аҳолини иссиқлик, газ ва ичимлик суви билан таъминлашда одамларнинг диққати ва норозилигини оширишга олиб келадиган ҳолатларга дучор бўламиз, умумий фойдаланиш майдонлари, подъездлар ва кўп қаватли уйлар атрофидаги ҳудудларнинг қиёфаси ҳамон хунук аҳволда.

Бундай вазиятнинг сабаблари ҳақида кўп та-
пириш мумкин.

Бунинг асосий сабабларидан бири шундаки,
уй-жой фонди хусусийлашганига, мана, 13 йил-
дан ошди. Яъни, бугунги кунда барча квартира
ва уйлар хусусий эгаликка ўтган. Лекин шуни
таъкидлаш лозимки, кўпчилигимиз ҳали-бери шу
ҳолатни тан олишдан олисмиз.

Бошқача қилиб айтганда, энди шахсий ва
умумий мулкка айланган уй-жойларни тартибга
солиш, таъмирлаш ва сақлаш масалалари бўйи-
ча янгича, таъсирчан тизим ташкил қилишда
кўпгина муаммоларга дуч келмоқдамиз.

Таъкидлаш жоизки, янги усуlda ташкил этил-
ган уй-жой мулқдорлари ширкатлари уй-жой
фондини бошқариш ва шу уйларда яшовчилар-
нинг долзарб муаммоларини ўз вақтида ҳал этиш-
да заиф бўлиб қолмоқда. Очиқ айтиш керак, бу
ширкатлар бутунги кунда ҳақиқий уй-жой мулк-
дорлари бирлашмаларига ҳали-бери айлангани
йўқ.

Уй-жой-коммунал хизматлар соҳасини ислоҳ
қилиш яна бир ўта муҳим масалани — коммунал
хизматлар, пудрат ва таъмир ишлари бозорлари-
ни шакллантириш масаласини ҳал этишни талаб
қилмоқда.

Токи бозорда рақобат юзага келмас экан, ҳар
бир ширкат бир неча пудратчи орасидан энг мақ-

булини танлаш, у билан таъмирлаш ва ободонлаштириш ишларини бажариш юзасидан шартнома тузиш имкониятига эга бўлмас экан — бу соҳадаги мавжуд аҳволни ўнглаш қийин.

Бундай ўта мураккаб муаммоларни ечишда уйжой мулкдорлари ширкатлари давлат ташкилотлари, маҳаллий ҳокимият, молия ва банк тузилмаларининг доимий амалий ёрдамига муҳтож ва шунга дахлдор бўлган мутасадди раҳбар ва мутахассисларнинг масъулиятини оширишни талаб килади.

Қорақалпогистон Республикаси Вазирлар Кенгаши, вилоятлар ҳокимликларининг ҳар чоракдаги якуний мажлисларида туман ва шаҳар ҳокимларининг одамларнинг кайфиятига бевосита таъсир қиласиган мазкур ўта муҳим ва долзарб масалалар юзасидан ҳисботларини эшлиб боришни мақсадга мувофиқ, деб ўйлайман.

Вазирлар Маҳкамаси барча манфаатдор идоралар билан биргаликда икки ой муддатда уйжой мулкдорлари ширкатларини мустаҳкамлаш, уларга реал маблағлар ажратиб бериш, бу соҳадаги монополияларни тутатиш, таъмирлаш ва коммунал хизматларининг ҳақиқий бозорини шакллантириш бўйича аниқ дастурни ишлаб чиқиши ва қабул қилиши керак.

Пировардида яна бир устувор масалани алоҳида таъкидлаб ўтмоқчиман. **Бу — Энергия ресурс-**

лари, биринчи галда, кўп миқдорда энергия сарф этадиган тармоқлар — кимё, рангли металлургия, электр энергетикаси ва бошқа соҳаларда қаттиқ тежамкорликни таъминлаш бўйича чора-тадбирларни амалга оширишдир.

Ушбу вазифа жаҳонда энергия ресурсларининг танқислиги ва нархи муентазам ошиб бораётган ҳозирги шароитда фоят долзарб аҳамият касб этмоқда.

Энергетика масаласида Ўзбекистон ўзини ўзи таъминлайдиган мамлакат ҳисобланади. Бирок, бу бизга қимматбаҳо, қайта тикланмайдиган ресурсларга хўжасизларча муносабатда бўлиш ҳукуқини бермайди. Бу ноёб бойликларда болаларимиз, келгуси авлодларимизнинг ҳам ҳаққи борлигини доимо ёдда тутишимиз ва бу ҳақда бош қотиришимиз зарур.

Энергия ресурсларини тежашни асло кечиктириб бўлмайдиган вазифа деб қабул қилишимиз, шунинг ҳисобидан товарлар, хизматларнинг нархини пасайтиришимиз ва иқтисодиётимизнинг ўсишини таъминлашимиз лозим.

Тан олиш керакки, бизда бу муаммо билан ҳеч ким тизимли равишда жиддий шуғулланмаяпти. Ҳатто бугун ҳам, худди 15 йил илгари бўлганидек, республика саноат корхоналарида энергия сарфи жаҳондаги ўртача кўрсаткичдан 2—2,5 марта ортиқ экани ҳеч кимни ташвишга солмаяпти.

Бу борада энергия ресурсларини қазиб олиш, қайта ишлашдан тортиб, сотиш ва ниҳоят фойдаланишгача бўлган деярли барча босқичларда уларни тежаб ишлатмаслик, ўлчов асбобларининг йўқлиги, асоссиз йўқотишларга, кўпинча ўғрилик ҳолатларига ҳам йўл қўйилмоқда.

Шу ўринда, авваламбор, энергия сарфи энг кўп бўлган тармоқларда ва энергетика комплексининг ўзида бу масала бўйича кенг чора-тадбирлар мажмуининг амалга оширилиши яқин истиқболдаги жуда муҳим ва долзарб муаммолардан биридир.

Вазирлар Маҳкамасига икки ой муддатда 2006–2010 йилларда энергия ресурсларидан тежамли фойдаланиш бўйича аниқ чора-тадбирлар дастурини ишлаб чиқиш ва қабул қилиш топширилади.

Бу дастурда қуйидагиларни кўзда тутиш зарур: нефть, газ ва газ конденсатини қазиб олиш, уларни ташиш ва қайта ишлаш жараёнидаги йўқотишлар ва ўз технологик эҳтиёжлари учун фойдаланиш ҳажмларини кескин камайтиришни, бу ресурсларни чуқур ва сифатли қайта ишлаш дарражасининг оширилишини таъминлайдиган янги илғор технологияларни жорий этиш;

иқтисодиётнинг барча тармоқларида энергияни тежайдиган асбоб-ускуналарни кенг миқёсда кўллаш, энергияни тежаш бўйича ҳар қайси тар-

мокда тегишли чора-тадбирлар амалга оширилиши юзасидан қатъий мониторинг олиб бориш;

энергиядан фойдаланишни ҳисоб-китоб ва назорат қилиш қоидаларини такомиллаштириш, ҳамма жойда ўлчов асбоблари ўрнатилишини қаттиқ назоратга олиш, энергия сарфлайдиган асбобларнинг жаҳон стандартлари бўйича энергия сарфи меъёrlарига мос келишини мажбурий сертификация қилиш;

энергияни тежаш бўйича иқтисодий рағбатлантириш чораларини янада такомиллаштириш, бунда молиявий-иктисодий, солиқ воситалари ва механизмлари тизимидан кенг фойдаланиш;

анъанавий бўлмаган, муқобил энергия манбаларини кенг қўллаш.

Шу борада ҳокимликлар хузуридаги аҳоли ва корхоналарга газ ва электр энергияси етказиб бериш билан шуғулланадиган идора ва хизматларнинг ўзини ҳам ислоҳ қилиш ва уларнинг фаолияти устидан қаттиқ назорат ўрнатиш зарур.

Мазкур идора ва хизматларнинг масъулиятсизлиги билан боғлиқ кўплаб фактлар ҳамда бу соҳада йўл қўйилаётган ноқонуний ўзлаштириш ва сунистъемолликларга ортиқ тоқат қилиб бўлмайди.

Таҳдиллар шуни кўрсатмоқдаки, амалда бундай хизматлардан фойдаланаётган кўпчилик истеъмолчилар ё улар учун ҳақ тўламайди, ёки турли назоратчилар ва тўлов йиғувчилар билан пин-

ҳона ҳисоб-китоб қиласи. Хизмат кўрсатадиган ташкилотлар билан ўзаро шартнома муносабатларини ўрнатмаган ёки хизматлардан ўлчов асбобларисиз фойдаланаётган истеъмолчиларнинг сони ҳудудларда кам эмас.

Ҳукумат (Ш.Мирзиёев), Қорақалпогистон Республикаси Вазирлар Кенгаши, вилоят ва шаҳарлар ҳокимларини ниҳоят бу ишда узилкесил тартиб ўрнатиши шарт.

Ҳурматли дўстлар!

Юқорида баён қилинган энг муҳим йўналишлар ва устувор вазифаларни амалга оширишдан асосий мақсад — аввало, иқтисодиётимизни жадал ва барқарор ривожлантириш, юртимизда эркин ва фаровон ҳаёт барпо этиш, халқимиз учун муносиб турмуш даражасини яратиб беришдан иборатдир.

Токи саховатли Ўзбекистон заминидаги истиқомат қилаётган ҳар бир инсон — миллати, тили ва динидан қатъи назар — келажакка ишонч билан қараб, ўз ҳаётидан рози бўлиб яшасин.

Мана шу эзгу мақсадларга эришиш йўлида барчангизга муваффақият ва омад тилайман.

2005 йилда мамлакатни ижтимоий-иктисодий ривожлантириши якунлари ва 2006 йилда иқтисодий ислоҳотларни чуқурлаштиришининг энг муҳим устувор йўналишларига бағишланган Вазирлар Маҳкамаси мажлисидаги маъруза, 2006 йил 10 февраль

НАВРЎЗ БАЙРАМИГА БАҒИШЛАНГАН ТАНТАНАЛИ МАРОСИМДАГИ СЎЗ

Ассалому алайкум, азиз ватандошлар!
Муҳтарам меҳмонлар!

Бугун она диёримизнинг барча гўшалари, воҳаю водийларида одамларимиз, эл-юртимиз бағрини кенг очиб, «Хуш келибсан, Наврўзи олам!» деб баҳорга пешвоз чиқмоқда, яшариш ва янгилиниш фаслинин катта хурсандчилик билан кутиб олмоқда.

Барчангизни мана шу кутлуг кун, Наврўз айёми билан чин қалбимдан муборакбод этишга, сиз, азизларга, сизлар орқали бутун халқимизга ўз ҳурмат-эҳтиромимни билдиришга ижозат бергайсиз.

Наврўз айёмининг ҳаётимиздаги ўрни, аҳамияти ва моҳияти ҳақида кўп минг йиллик тарихимизда қанча-қанча достонлар, афсонаю ривоятлар, кўшиқ ва қасидалар битилган бўлмасин, унинг маъно-мазмуни, бекиёс гўзаллигини таърифлашга, уни эъзозлаш ва улуғлашга ҳар қандай сўзлар ҳам ожизлик қиласи.

Лекин энг қадимий, энг ардоқли, асл миљий байрамимиз бўлмиш Наврўзниң юртимизда яшайдиган ҳар қайси инсон қалбига, руҳиятига ҳеч нарса билан қиёслаб бўлмайдиган ҳаётбахш таъсир ўтказишини, айни шу фусункор дамларда унинг кўнглида жўш ураёттан ҳис-туйғуларни тасаввур қилиш, англаш қийин эмас, деб ўйлайман.

Аввало, кўклам нафаси уфуриб, майин шабадалар эса бошлаши, табиат уйғониб, куртакларнинг очилиши билан инсон вужудига янги куч, янги ғайрат киргандек, унинг томирига, унинг қон-қонига ҳаёт ва баҳор нашидаси юргургандек бўлади, юрагимизни, бутун борлиғимизни яхшилик ва яратувчиликка ундаиди.

Қир-адирлар, боғу роғлар яшил либосга буркануб, майса-гиёҳлар тупроқни ёриб, қуёшга талпинаётган ажиб бир паллада одамзот беихтиёр табиат билан уйғун бўлиб яшашга, сумалак ва ҳалим каби тансиқ таомлар тайёрлаб, бу баҳор неъматларини ўз яқинлари, дўсту биродарлари, қадрдонлари билан баҳам кўришга, хурсандчилик билан сайилтомушалар ўтқазишга интилади.

Наврўзи олам келиши билан қадим замонларда ҳар қандай уруш-жанжаллар, низо ва адватлар барҳам топгани каби, бугунги кунда ҳам одамлар ўртасидаги турли келишмовчилик, гина ва аразларни унудишига қаратилган ҳаракатлар, хонадонлар, барча маҳалла-кўйларда, эл-юртимизда

аҳиллик, меҳр-оқибат ва тотувлик муҳити янада кучайиши табиий.

Бетакрор Наврӯз қунларида шу муқаддас тупроқда яшаб ўтган аждодларимиз, буюк алломалар, азиз-авлиёларимиз, ота-боболаримизнинг, юртимизда тинчлик-хотиржамлик бўлсин, элимизни файзу барака, хосият тарқ этмасин, сувимиз, ҳосилимиз мўл бўлсин, дала ишларини бошлиётган дехқонларимизнинг баҳтини, омадини берсин, деган тилак ва дуоларининг ижобат бўлиши барчамизнинг юрагимизга малҳам беради.

Наврӯз фалсафаси, Наврӯз қадриятларининг узвий бир қисми бўлмиш ёрдам ва кўмакка муҳтож одамларга, бева-бечора ва етим-есирларга, беморларга меҳр-мурувват кўрсатиш, ўтганларни хотирлаш, табаррук кексаларимизни зиёрат қилиб, дуосини олиш сингари олижаноб туйғу ва интилишлар янада жонланади.

Мана шу хурсандчилик қунларда бағрикенг, очик кўнгил халқимиз бизнинг қувончимизга шерик бўлаётган узоқ ва яқин қўшни халқларни, мана шу майдонда ўтирган уларнинг вакилларини чин дилдан табриклаб, ўзининг самимий тилак ва қутловларини йўллайди.

Муҳтарам юртдошларим!

Бу йилги Наврӯз истиқболимиз, мустақиллигимизнинг ўн бешинчи Наврӯзидир.

Бу йилги Наврӯз ҳаётимизнинг барча жабҳаларида, иқтисодиётимиз соҳа ва тармоқларида янгиланиш, ўсиш ва юксалиш Наврӯзидир.

Бу йилги Наврӯз қишлоқда тобора ҳал қилувчи кучга айланиб бораётган деҳқон ва фермерларимиз ҳаётида том маънодаги янги кун, янги меҳнат палласидир.

Ҳеч шубҳасиз, халқимизнинг мана шундай фидокорона меҳнати, интилиш ва саъй-ҳаракатлари негизида юртимизни янада обод қилиш, одамларимизнинг ҳаёт даражасини янги босқичта кўтариш, уларнинг ақл-заковати, куч-ғайрат ва салоҳиятини рўёбга чиқариш учун имконият яратиб бериш, аҳоли саломатлигини асраш, кўпмиллатли жамиятимизда ўзаро аҳиллик ва ҳамжиҳатлик муҳитини мустаҳкамлаш қаби юксак мақсадлар мужассам.

Юртимизда 2006 йилни «Ҳомийлар ва шифокорлар йили» деб атаганимиз, шу муносабат билан кенг миқёсда амалга ошираётган режа ва дастурларимиз одамларга беминнат яхшилик қилиш, беғараз ҳомийлик кўрсатиш, инсон дардига шифо бериш сингари Наврӯзнинг азалий қадрият ва анъаналари билан ҳамоҳанг экани, айниқса, эътиборлидир.

Азизларим, қадрдонларим!

Барчангизни бағримга босиб, Наврӯз айёми билан яна бир бор табриклайман.

ИСЛОМ КАРИМОВ

Юртимизда тинчлик ва осойишталик доимо
барқарор бўлсин!

Хонадонларимиздан меҳру оқибат, файзу ба-
рака аrimасин!

Табаррук оталаримиз, муҳтарама момолари-
мизнинг умрлари узоқ бўлсин, ёшларимизнинг
бахтини, камолини берсин!

Наврўзи оlam барчамизга муборак бўлсин!

2006 йил 19 марта

БАРҚАРОРЛИК ВА БУНЁДКОРЛИК – ТАРАҚҚИЁТНИНГ ҚЎШ ҚАНОТИ

Мамлакатимиз истиқлолнинг ўн беш йиллик құттруғ түйига улкан ютуқлар билан кириб бормоқда. Демократик ҳуқуқий давлат, очиқ фуқаролик жамиятини барпо этиш, эркин иқтисодиётни ривожлантириши, муқаддас қадрияларимизга мос маънавиятимизни юксалтириши йўлида қўйилаётган янгидан-янги қадамлар бунинг яққолдалолатидир.

Залворли ютуқларимизнинг асосида юртимизда ҳукм сурәётган тинчлик-осойишталик, халқимизнинг яратувчанлик рухи, эртанги кунга бўлган юксак ишончи мужассам. Зотан, барқарорлик ва бунёдкорлик – тараққиётнинг қўши қанотидир.

«Ҳомийлар ва шифокорлар йили»да халқимиз учун муносиб турмуш шароитини яратиш, мамлакат ободлиги ва эл-юрт фаровонлигини ошириш, жамиятимизда ўзаро ҳамжихатлик, мурувват ва бағрикенглик мұхитини янада мустаҳкамлаш борасидаги сабый-ҳаракатлар янги, юксак босқичга кўтарилимоқда. Иқтисодиётнинг барча соҳа ва

тармоқларида кузатилаётган барқарор ўсиш суръатлари, юртимизга кенг кўламда кириб келаётган инвестиция ва сармоялар, шаҳар ва қишлоқларимизнинг қиёфаси кундан-кунга ўзгариб бораётгани ҳам фикримизни тасдиқлаб турибди.

Айниқса, пойтахтимизда замонавий янги корхона ва ижтимоий иншоотлар, лицей ва коллежлар, мактаблар, шифохоналар, равон ва қулай йўллар, кўприклар, кўркам боғу хиёбонлар барпо этиши борасида улуғвор ишлар амалга оширилмоқда.

Ўзбекистон Республикаси Президенти Ислом Каримов 2006 йил 4 апрель куни Тошкент шаҳрида олиб борилаётган бунёдкорлик ва ободонлаштириш ишлари билан танишди.

Наврӯз байрами кунлари пойтахтимизнинг Шайхонтоҳур туман Қоратош мавзесида бир йўла учта янги ижтимоий объект — оиласий поликлиника, тикувчилик корхонаси ва маҳалла маркази ишга тушди.

55-оиласий поликлиника Қоратош, Чакар, Чорсу, Гулбозор, Ҳадра маҳаллаларида истиқомат қиласиган 30 мингга яқин аҳолига тиббий хизмат кўрсатади. Бу ерда юздан ортиқ тиббиёт ходими ишлайди. Уларнинг асосий қисми оиласий шифокорлардир. Шифохона аҳолига кечакундуз ишлайдиган ҳаракатдаги узлуксиз бирламчи тиббий ёрдам хизмати кўрсатади. Болалар, катта ёшли-

ларга, аёлларга тиббий хизмат кўрсатадиган хоналар, шунингдек, алоҳида ихтисосликлар бўйича шифокор кабинетлари мавжуд. Улар энг замонавий компьютер техникаси ва маҳсус тиббиёт асбоб-ускуналари билан жиҳозланган. Масалан, стоматология хонасида Италияning «Фашион» фирмаси ускуналари ўрнатилган. Улар тишни оғриқсиз ва шовқинсиз даволаш имконини беради. Рентген хонасидаги «Флюороренекс» аппарати эса Россиянинг «Вимпель» заводида ишлаб чиқарилган. У бир соатда 60 кишига хизмат кўрсатиши имкониятига эга. Аввалги рентген ускуналаридан фарқли улароқ, бу аппаратда плёнка ва реактивлар ишлатилимайди. Тасвир тўғридан-тўғри компьютерга кўчади ва уни oddий оқ қофозда чиқариб олиш мумкин.

— Биз оилавий поликлиникаларни щунчаки, замонасозлик учун қураётганимиз йўқ, — деди давлатимиз раҳбари. — Бундай ёруғ ва шинам шифо масканларини бунёд этишдан мақсадимиз соғлом авлодни камол топтириш борасидаги эзгу мақсадларимизни тўла рўёбга чиқаришдан иборат. Аммо уларни куришдан олдин, тегишли ҳудуддаги аҳолининг талаб ва эҳтиёжлари ҳар томонлама таҳдил этилиши даркор. Айтайлик, қанча кекса, қанча хотин-қиз ва ёш бола бор, уларнинг қанчаси қандай тиббий кўмакка муҳтоҷ —

ҳаммаси пухта ўрганилиши шарт. Оилавий поликлиника фаолиятининг йўлга қўйилиши, жиҳозланиши, муайян ихтисосликлар бўйича шифокорларнинг ишта жалб этилиш жараёни ана шундай аниқ маълумотларга таянган ҳолда ҳал қилиниши мақсадга мувофиқдир.

Бундай поликлиникаларда биринчи галда чақалоқлар, болалар ва оналар, ҳомиладор аёлларга, шунингдек, кексаларга тиббий хизмат кўрсатиш устувор мақсадга айланмоғи лозим. Яна бир муҳим жиҳат, оилавий поликлиника ходимлари беморни кутиб ўтирмасдан, аҳолининг доимий тиббий ёрдамга муҳтоҷлик даражасини мунтазам ўрганиб боришлари, профилактика ишларини изчил амалга оширишлари керак.

Ислом Каримов поликлиникадаги шарт-шароитлар билан танишар экан, тиббиёт ходимлари билан сұхбатлашди. Соҳада амалга оширилётгандык ишлар шифокорларнинг касбий фаолиятига, шахсий ва оилавий ҳаётига қандай таъсир кўрсатаётгани билан қизиқди.

Яқинда ишга тушган «Мурувваттекс» корхонасида 270 нафар ишчи ишлайди. Унда турли трикотаж буюмлари, асосан болалар кийим-кечаклари, кўйлаклар, майкалар тикилади. Корхонада замонавий жиҳозлар ўрнатилган.

— Илғор техника ва технологияларга асосланган, кишилар талабига тез мослаша оладиган

бундай ихчам фабрикалар фаолиятини ҳар томонлама қўллаб-кувватлаш лозим, — деди Юртбошимиз. — Айни чоғда, бундай корхоналар, биринчи навбатда ўзининг кенг ва истиқболли бозорига эга бўлиши, ўз маҳсулотларига харидор топа билиши, камида бир-икки йиллик буюргаси олдиндан маълум бўлиши керак. Шундаги на корхона кутилган самарани бериши мумкин.

Президент Ислом Каримов пойтахтимизнинг Самарқанд дарвоза маҳалласида бунёд этилган 14-оилавий поликлиника фаолияти билан ҳам танишди.

Ҳомийлар маблаглари иштирокида қисқа муддатда куриб фойдаланишга топширилган мазкур шифо маскани тўртта маҳалланинг йигирма беш минг кишилик аҳолисига хизмат қиласди. Илгари аҳоли бир неча поликлиникага қатнашга мажбур эди. Янги оилавий поликлиникада эса турли мутахассислардан иборат ўттиз тўрт нафар малакали шифокор ҳамда олтмиш саккиз нафар ҳамшира қунига 250 кишига бирламчи тиббий хизмат кўрсатмоқда.

Поликлиника тўла компьютерлаштирилган, бу ерда замонавий, юқори технологияли рақамли рентген, стоматология, ташхис анжомлари ва бошқа асбоб-ускуналар ўрнатилган. Ҳар бир оила-нинг саломатлик паспорти яратилган. Унда хона-дон аъзолари саломатлиги, уларни безовта қила-

ётган касалликларнинг олдини олиш борасида қилинаётган тадбирлар қайд этиб борилади. Айниқса, кексалар, болалар, ҳомиладор аёллар саломатлиги қатъий назоратга олинган.

Аҳолига интенсив тарзда бирламчи тиббий хизмат кўрсатиш мақсадида оиласвий поликлиникада куну тун ишлаш тартиби жорий этилган.

Оиласвий поликлиника ходимларини саломатлик посбонлари дейиш мумкин. Улар касалликларнинг олдини олишга сафарбар этилган фидойилардир, деди Юртбошимиз.

Президентимиз Самарқанд дарвоза маҳалла фуқаролар йиғини ҳамда милиция таянч пунктининг янги биносини бориб кўрди. Маҳалла фоллари билан самимий суҳбатлашди.

— Маҳалла — камдан-кам мамлакатда мавжуд бўлган ноёб идора, — деди Ислом Каримов. — Бу маскан миллий қадриятларимизни асррабавайлашда, эл-юртимиз тинчлиги ва осойишталигини мустаҳкамлашда, ёшларимизни комил инсонлар этиб тарбиялашда муҳим роль ўйнаб келмоқда.

Юртбошимиз «Муруваттекс» корхонасининг Самарқанд дарвоза трикотаж фабрикаси фаолиятини ҳам кўздан кечирди.

Фабрикада тайёрланаётган маҳсулотлар ички бозор билан бир қаторда Германия, Австрия, Венгрия ва Голландия каби хорижий мамлакат-

ларга экспорт қилинмоқда. Корхонада 250 нафар киши, асосан, ёшлар меҳнат қилади.

Юртбошимиз корхона ишчилари билан мулоттода бўлиб, улар учун яратилган шарт-шароитлар билан қизиқди.

Мамлакатимиз мустақиллигининг 14 йиллик байрами арафасида пойтахтимизнинг ҳалқа йўлида — Сергели тумани ҳудудидаги йирик чорраҳада 49 метр узунликдаги йўл ўтказгич барпо этилган эди. Ушбу мураккаб транспорт ечими билан боғлиқ яна бир хайрли иш амалга оширилди — йўл ўтказгич Катта ўзбек тракти билан боғланди.

Давлатимиз раҳбари мазкур йўл ўтказгич ва Эркин қўргони оралиғида бунёд этилган 3,7 километрлик янги йўлни бориб кўрди.

— Тараққиётни белгиловчи омиллар кўп, лекин уларнинг энг муҳимларидан бири мукаммал коммуникация тизимини яратишдан бошланади, — деди Юртбошимиз. — Йўл эса коммуникациянинг асосини ташкил этади.

Маълумотларга кўра, истиқдол йилларида пойтахтимиз ва унга туташ ҳудудларда қурилган ва реконструкция қилинган йўллар, йўл ўтказгичлар, кўприкларнинг умумий ҳажми минг километрдан ошади.

Шу пайтга қадар мамлакатимизнинг жанубий ва шимолий вилоятларидан келаётган катта транспорт оқими Фарғона водийсига пойтахтимизнинг

ИСЛОМ КАРИМОВ

Халқлар дүстлиги күчаси орқали йўл олар эди. Эндиликда бундай ортиқча ташвиш ва муаммоларга чек қўйилди. Янги йўл бош кентимиздаги экологик мувозанатни сақлаш ва транспорт қатновини янада яхшилашда ҳам муҳим аҳамиятга эга.

— Биз Тошкентда кўпдан-кўп янги иморатлар, боғлар, хиёбонлар барпо этяпмиз, — деди давлатимиз раҳбари. — Агар автотранспорт ҳаракати билан боғлиқ мана шундай муаммоларни ҳал қиласмаганимизда, амалга ошираётган ишларимиз бесамар кетиши мумкин эди. Қолаверса, замонавий ҳамда йирик шаҳарлар ўз хавфсизлигини таъминлаши керак. Таъмирлаш ва курилиш ишлари ҳали давом этаётган Тошкент ҳалқа йўли айни ана шу вазифани ҳам бажаради.

ИНСОН ХОТИРАСИ – МУҚАДДАС, ИНСОН ҚАДРИ – УЛУФ

9 май — Президентимиз Ислом Каримов ташаббуси билан Хотира ва Қадраш куни деб эълон қилинган ушбу умумхалқ байрами мамлакатимизда кенг нишонланди.

Мустақиллик йилларида бу кун том маънода инсон хотираси ва қадрига нисбатан адолатни тиклаган, асл ҳақиқатни ўзиди музжассам этган муҳим тарихий санага айланди.

Ушбу байрам бу гал «Ҳомийлар ва шифокорлар йили»да нишонланаётгани унинг аҳамиятини янада оширади. Хотира ва Қадраш — инсон ақл-заковатининг бетакрор маънавий неъматлари, тирикликнинг азалий мезонлари. Ҳомийлик, саховат ва ҳиммат, меҳр ва мурувват фазилатлари хотира ва қадр тушунчалари билан ўзаро уйғунлик касб этади. Зоро, қалби саховатга, меҳр-муҳаббатга, шафқат-шафоатга тўла инсонларгина ўз тарихини, аждодларини доимо хотирлайди ва фидойи юртдошлиари, ёруғ келажак йўлида меҳнат қилаётган кишиларнинг қадрига етади.

Иккинчи жаҳон урушида фашизм устидан қозонилган ғалабанинг 61 йилиги нишонланаётгани шу

кунларда юртимизда Хотира ва Қадрлаш куни алоҳида эътибор билан байрам қилинаётгани тегран маънога эга. Бинобарин, Иккинчи жаҳон урушидаги тарихий ғалабани таъминлашда юртдошлиаримизнинг ҳам жасорат ва хизматлари беқиёс бўлган. Жангу жадалларда жон олиб-жон берган минглаб ўзбек ўғлонлари, фронт ортида тунни тонгга улаб меҳнат қилган, ризқу насибасини ўзгапар билан баҳам кўрган меҳри дарё ватандошлиаримиз матонати ва фидойиликлари ҳеч қачон унтутилмайди.

Инсон, ҳалқ, миллат тарихий хотира билан тирик, барҳаёт.

Айниқса, ўтганларнинг хайрли ишларини ёдга олмоқ, қадрламоқ биз учун ҳам фарз, ҳам қарзdir. Шу маънода, Иккинчи жаҳон урушида ҳалок бўлган минглаб юртдошлиаримиз хотирасини ёд этиши ва эъзозлаш, оғир жангу жадалларни бошдан кечирган, ярадор бўлиб қайтган кексаларимизни, фронт ортида машаққатли меҳнати билан ғалабага ҳисса қўшган инсонлар, айниқса, оналаримизнинг ҳурмат-эҳтиромини жойига қўйиш ва муносиб тақдирлаш миллий қадрияtlаримиз қаторидан кенг ўрин олгани қувончли.

Президентимиз Ислом Каримовнинг 2006 йил 4 майдаги Фармонига мувофиқ Хотира ва Қадрлаш куни, шунингдек, 1941—1945 йиллардаги Иккинчи жаҳон урушида фашизм устидан қозонилган ғалаба-

нинг 61 йиллиги муносабати билан уруш қатнашичилари ва ногиронларининг нул билан мукофотланиши уларга кўрсатилаётган эҳтиромнинг яна бир ёрқин намойшишидир. Энг муҳими, ёшлиаримиз онгу шуурида ўтганларни хотирлаш, тирикларни қадрлашдек инсоний фазилатлар тобора мустаҳкам муҳрланмоқда. Кечаги кун сабоқларини, халқимиз келажаги йўлида жонини фидо қилган инсонларни хотирлаш бугунги ва эртанди кунимизни қадрлашга ўргатади. Хотира бўлмас экан, Қадрлаш ҳам йўқ. Ушбу тушунчалар мустақиллик даври авлоди учун ўзига хос маънавий қадриятга айланди. Илло, Юртбошимиз таъбири билан айтганда, буюк ғалабани буюк жасоратли инсонлар таъминлаган ва биз, миннатдор авлодлар бу фидойи юртдошларимизни доимо улуғлаймиз, уларнинг бекиёс матонати ва хотираси олдида ҳурмат билан бош эгамиз.

9 май. Пойтахтимиздаги Хотира майдони ҳар кунгидан ҳам гавжум. Бу ерга уруш ва меҳнат фахрийлари, ҳукумат аъзолари, депутатлар ва сенаторлар, ҳарбийлар, жамоатчилик вакиллари ташриф буюрган.

Майдон узра сокин мусиқа садоси таралади. Жанггоҳларда жон берган ватандошларимизнинг номлари агадий муҳрланган «Хотира китоби»нинг зарҳал варақлари Ватаннинг фидойи ўғлонлари қисматидан шаҳодат беради. Мотамсаро она қиёфасида изтироб ва умид намоён...

Соат 8.40. Майдонга Ўзбекистон Республикаси Президенти Ислом Каримов кириб келади.

Давлатимиз раҳбари ҳарбий оркестр садолари остида Мотамсаро она ҳайкали пойига гулчамбар қўйди.

Президентимиз Иккинчи жаҳон урушида жон фидо қилган минглаб юртдошларимиз хотирасига ҳурмат бажо этди.

— Бугун, 9 май — юртимизда Хотира ва Қадрлаш куни деб ном олган умумхалқ байрами билан барча юртдошларимизни қутлайман, — деди Ислом Каримов журналистлар билан суҳбатда. — Мана шундай улуғ кунда халқимиз шу ёруғ ва фаровон кунларга шукроналар айтиш баробарида, ҳаётимизнинг тинчлиги ва осойишталиги, осмонимизнинг мусаффолиги учун жанг жадалларда жон олиб-жон берган аждодларимиз хотираси олдида ҳақли равишда бош эгади. Шу билан бирга, бугун ҳаёт, орамизда яшаётган уруш қатнашчиларини ҳар қанча қадрласак арзиди.

Иккинчи жаҳон урушида фашизм устидан ғалабани таъминлашда кўплаб халқлар қатори Ўзбекистон халқи ҳам жуда катта ҳисса қўшган. Ўша пайтда юртимизда қарийб 3,5 миллион аҳоли истиқомат қилган бўлса, улардан тахминан 1,5 миллион нафари урушга сафарбар этилган. Ўз Ватанининг эркинлиги ва озодлиги учун, бугун

биз кечираётган осуда ҳаёт учун 400 минг нафардан зиёд ватандошимиз уруш майдонларида курбон бўлган, яна қанчадан-қанча кишиларимиз бедарак кетган.

Бунча одамнинг курбон бўлганини ўйлаш, кўз ўнгидан ўтказишнинг ўзи изтиробли. Зотан, жанггоҳларда ҳалок бўлган биргина одам ҳам — Инсон. Унинг ҳаёти бемаҳал якун топди, орзу-умидлари рўёбга чиқмай хазон бўлди. Бу йўқотишнинг ортида яна қанчадан-қанча қайғу, ғам-алам, ҳасратлар ётибди. Бева-бечораю етим-есирлар, фарзанди йўлига кўз тиккан онаизорнинг умиду надоматлари мужассам шу биргина аччиқ йўқотишнинг замирида...

Шу маънода, бу уруш башарият бошига солган чексиз мусибатлар ҳеч қачон унугилмайди. Уруш майдонлари ва фронт ортида миллионлаб одамлар кўрсатган жасорат ва матонат тарихимизда, ҳалқимиз хотирасида сақланиб қолади.

Юртбошимиз бутунги кунда дунёда уруш таҳдиди наинки мавжудлиги, балки бу таҳдид кундан-кунга кучайиб бораёттанига ҳам эътиборни қаратди.

— Башарият ўз тарихида уруш ҳеч қачон ҳеч кимга енгиллик, ёруғлик олиб келмаганига қайта-қайта гувоҳ бўлтанига қарамай, Ер юзида урушни хоҳловчилар камаймаётгани ачинарлидир, — деди Ислом Каримов. — Афғонистонда 27

йил олдин бошланган урушнинг оқибатлари ҳали ҳам барҳам топгани йўқ, бу юртда ҳалигача тинчлик ва хотиржамлик кузатилмаяпти. Ироқдаги уруш, Эрон атрофида уруш нафасини уфураётган воқелик ҳам ташвиш уйғотмасдан қолмайди. Урушга йўналтирилган бундай ҳаракатлар нега давом этмоқда? Афсуски, бу саволга жавоб тошиш мушкул. Зеро, дунё тарихи гувоҳки, урушдан ҳеч қачон на уни бошлаганларнинг муроди ҳосил бўлган ва на уруш домида қолганларга енгиллик келган.

Шундай экан, урушларнинг олдини олиш учун нима қилиш керак, деган савол туғилиши табиий. Бунинг учун, аввало, жаҳонда, минтақамизда тинчлик ва барқарорликка асосланган бугунги ва эртанги ҳаётни таъмин этиш керак. Бу йўлда ҳар қандай муаммо тинчлик йўли билан, дипломатия орқали ҳал этилиши лозим.

Мамлакатимизнинг бу йўлдаги саъй-ҳаракатлари алоҳида аҳамиятга эга. Россия билан Иттифоқчилик шартномасини имзолаганимиз, шунингдек, Хитой, Жанубий Корея, Ҳиндистон, Покистон каби йирик давлатлар билан дўстона ва ўзаро ҳамкорлик алоқаларини янада чукурлаштириш борасидаги келишувларимиз Ўзбекистоннинг тинчлик ва тараққиёт йўлида қўйилган залворли қадамлари эканини халқимиз, аввало, ёшлиаримиз теран англашлари лозим.

Энг муҳими, ҳар биримиз ҳар доим огоҳ, сезгир ва хушёр бўлишимиз даркор. Шу билан бирга, ҳаётда воқеаларни бефарқ ва лоқайд кузатувчи сифатида эмас, уларга бевосита дахлдор, тинчлик ва осойишталик, фаровон ҳаёт ва тараққиёт курашчилари бўлиб яшашга ўрганишимиз зарур, деди Президентимиз.

Бу борада Ўзбекистон ёшларида муайян тушунча ва тасаввур шаклланганини эътироф этар экан, Юртбошимиз ўзининг айrim таклифларини баён қилди:

— Аввало, ёшларимиз тарихни чуқур ўрганишлари лозим, — деди Президентимиз. — Негаки, ўз тарихини билмаган жамият истиқболга элтувчи йўлни топа олмайди. Тарихга беписанд халқнинг келажаги йўқ. Кўп асрлик тарихи мобайнида Ўзбекистон қанча босқинларни кўрмади, Марказий Осиё миңтақаси қандай бўронлар ичida қолмади, кимлар бизни тобе ва қарам қилишга интилмади. Ана шу тарихдан сабоқ чиқармасак, эртага кечаги кун кўргуликлари қайтадан бошнимизга тушиб қолиши ҳеч гап эмас. Бошқача айтганда, кечаги кунидан тўғри холоса чиқариб иш тутган жамият келажакка ишонч билан қадам қўяди.

Айни чоғда, ёшлар нафақат тарихни пухта ўрганиши, балки шу буюк ўтмишимиз билан ғурурланиб яшashi керак. Чунки, бу бизнинг та-

рихимиз. Амир Темур каби шавкатли аждодларимизнинг, улуғ аллома ва мутафаккир боболаримизнинг шонли ҳаёти лавҳаларидир.

Шуни ҳам унугмайликки, бутунги кишиларга, хусусан, буюк келажагимиз бунёдкорларига фақат тарихимиз билан фахру гуур этиб яаш кифоя қилмайди. Гуурли, мард ёшларимиз буюк тарихни яратган аждодларнинг ворислари сифатида «Мен келгуси авлодга ўзимдан нималар қолдираяпман?» деган тушунча ва интилишни онгу шуурига жойлаб яшаши шарт. Эришилган ютуқларимизни янада ривожлантириш билан бирга, бошқалардан ўзишга интилмоқ керак. Ана шунда буюк келажагимизни таъмин этган бўлмаймиз. Аслида, биз ҳеч қачон ҳеч кимдан кам бўлмаганмиз, кам эмасмиз ва кам бўлмаймиз ҳам, деган дъяватнинг мазмун-моҳиятида айни шундай интилиш мужассамдир.

Юртбошимиз таъкидлаганидек, Иккинчи жаҳон уруши қатнашчиларининг энг ёши бугун саксондан ошган. Ўтган йили худди шу санани 33 минг 572 нафар уруш қатнашчиси жойларда биз билан бирга байрам қилганди. Бу галги байрамгача улардан 22 минг 251 киши келди. Фахрийларимизни тириклигида қадрлайлик, эъзозлайлик. Уруш қатнашчиларининг умрини бир йил, бир ойга бўлса ҳам узайтириш, кўнглини олиш, дардига малҳам бўлиш йўлида кўлимиздан кел-

ган барча ишни қилиш бугунги авлод учун ҳам фарз, ҳам қарз бўлмоғи лозим.

Ушбу санани Хотира ва Қадрлаш куни сифатида кенг нишонлай бошлаганимизга етти йил бўлди, деди Президентимиз пировардида. Ўтган даврда бу айёмни кенг байрам қилиш юртимизда истиқомат қиласиган барча миллат ва элатлар вакиллари учун одат тусига кирди. Шу маънода, ўтгандарнинг хотираси олдида таъзим бажо келтириш, инсонни тириклик чоғида қадрлашдек ана шу ҳаётий қараашлар эл-юртимизнинг қонқонига сингиб бораётгани ва бугунги кунда ҳар бир юртдошимиз умрининг узвий қисмига, барчамиз учун муқаддас қадриятга айлангани катта воқеадир.

МАКТАБ ЎҚУВЧИЛАРИНИНГ «УМИД НИҲОЛЛАРИ» СПОРТ ЎЙИНЛАРИ ҚАТНАШЧИЛАРИГА

Қадрли фарзандларим!

Авваламбор, мана шу гўзал баҳор кунларида кўхна ва саҳоватли Қашқадарё заминида жам бўлган сиз, азиз ўғил-қизларимни, сизларга омад тилаб турган устоз-мураббийлар, ота-оналар ва ёру дўстларингизни «Умид ниҳоллари» спорт ўйинларининг тантанали очилиши билан чин қалбимдан самимий табриклайман.

Бугун сизлар каби минг-минглаб ўқувчи ёшлиларимизнинг азму шижоати, очик чехрасига боқиб, барчамиз вақтнинг қандай шиддат билан ўтаётганини, кўз ўнгимизда янги бир авлоднинг тобора кучга тўлиб, сафимизга кириб бораётганини чуқур ҳис этамиз ва беихтиёр кўнглимизда, қалбимизда қувонч ва гуур туйғулари пайдо бўлади, мустақил ҳаёт кечираётган йилларимизда амалга оширган машаққатли меҳнатимиз зое кетмагани учун Яратганимизга шукроналар айтамиз.

Айниқса, илм-фан, маданият ва санъат, спорт соҳаларида ўз билим ва истеъдодини, куч ва

имкониятларини амалда намоён этиб, дастлабки умидбахш мэрраларни қўлга киритаётган навқирон фарзандларимизни кўриб, эртанги кунимизга ишончимиз янада мустаҳкамланади.

Шу нуқтаи назардан қараганда, «Умид ниҳоллари» спорт ўйинларининг навбатдаги мусобақалари Қашқа воҳасида, буюк бобомиз соҳибқирон Амир Темур туғилиб вояга етган қадимий заминда ўтаётгани алоҳида рамзий маънога эга.

Айнан мана шу табаррук масканда тарбия топган, билим олган бу улуғ аждодимиз ўзининг бекиёс ақл-заковати, ноёб истеъоди, юксак ҳарбий маҳорати, бунёдкорлик фазилатлари билан жаҳонга машхур бўлган улкан салтанат бунёд қилиб, ўзбек номини улуғлаган ва унинг шуҳратини бутун дунёга тараним этган.

Шунинг учун ҳам буюк Амир Темур авлодлари бўлмиш сиз, юртимизнинг азиз фарзандлари бобомизнинг бизларга қарата айтган — биз киммиз, қандай улуғ зотларнинг зурриёдимиз, бизнинг илдизларимиз нақадар чукур, деган мазмундаги, бугун ҳам катта маъно ва ҳаётбахш кучга эга бўлган даъватини ҳеч қачон ҳеч қаерда унутмаслигингизни истардим.

Ва айни пайтда бу ҳикматли сўзлар сизларнинг орзу-ниятларингиз, интилиш ва ҳаракатларингизга қанот бериб, ўзгалар ҳавас қиласиган

комил инсонлар бўлиб улгайишингизда доимо куч-кувват баҳш этиши табиий, албатта.

Қашқадарё замини азал-азалдан кураги ерга тегмаган, мардлик ва ҳалолликни муқаддас ва олий қадрият деб биладиган ориятли полвонлари, довюрак баҳодирлари билан ҳамиша шуҳрат қозониб келади.

Бугун сизларнинг барчангиз қалбингизда зўр ҳаяжон, зафар иштиёқи билан бел боғлаб майдонга тушар экансиз, бу мусобақалар халқимизнинг том маънодаги умид ниҳоллари бўлган сиздек ёшлиаримиз учун катта синов ва шараф, шу билан бирга, улкан масъулият эканини, ўйлайманки, яхши англайсиз.

Азиз ўғил-қизларим!

Ҳозирги кунда юртимизда ёруг келажакни ўйлаб, қатъият ва изчилик билан амалга оширилаётган янгиланишлар, шу жумладан, таълимтарбия соҳасини тубдан ўзгартириш ва самарасини ошириш бўйича қабул қилинган умуммиллий дастурларимиз авваламбор ягона бир мақсадни кўзда тутади. У ҳам бўлса, миллионлаб фарзандларимизнинг замон талабларига жавоб берадиган, жаҳон андозалари даражасида жиҳозланган, янгича қиёфа касб этиб бораётган мактабларда, илғор таълим стандартлари асосида, ҳеч кимдан кам бўлмаган шароитда билим ва тарбия олишини таъминлашдан иборат.

Мамлакатимиз тараққиётининг бугунги ва эртаниги кунини белгилаб берадиган мана шу эзгу мақсад йўлида давлатимиз, жамиятимиз сиз, ёшлардан ҳеч нарсани — маблағ ва имкониятни ҳам, куч ва ҳаракатни ҳам асло аямайди.

Менинг даъватим — халқимизнинг ана шундай эътибори ва ғамхўрлигига ҳамиша муносиб бўлинг, жондан азиз Ватанимизни, унинг озодлиги ва мустақиллигини кўз қорачиғидек асрabbavайлаш, ҳимоя қилишга қодир фидойи, баркамол инсонлар бўлиб етишишга интилиб яшанг.

Унутмангки, ота-оналарингиз, устоз-мураббийларингиз, бутун халқимиз сизларга ишонади, сизларни биз бошлаган буюк ишларнинг давомчилари, ҳаётдаги ҳақиқий таянчимиз ва суянчимиз деб билади.

Ишончим комилки, қизғин беллашувлар, адолат, ўзаро ҳурмат ва самимият руҳида ўтадиган, фарзандларимизнинг иродасини янада тоблашга, жамиятимизда соғлом турмуш тарзини мустаҳкамлашга хизмат қиласиган ушбу спорт ўйинлари ҳар бирингизнинг ҳаётингизда ёрқин ва ўчмас сахифа бўлиб қолади.

Фурсатдан фойдаланиб, сизларга атаб мана шундай замонавий стадионлар, улкан спорт мажмуаларини барпо этган қўли гул қурувчиликар, меъмор ва муҳандисларга, пудратчи ташкилотлар, саҳоватли ҳомийларга, бутун Қашқадарё

ИСЛОМ КАРИМОВ

аҳлига, бу олижаноб ишга ҳисса қўшган барча инсонларга ўз номимдан, халқимиз номидан чукур миннатдорлик билдираман.

Сизларни бутунги байрам, бугунги шодиёна билан яна бир бор кутлар эканман, барчангизга сиҳат-саломатлик, қалбингиздаги эзгу интилишларингиз рўёбга чиқишини тилайман.

Доимо омон бўлинг, баҳт ва омад сизларга ҳамиша ёр бўлсин, азиз фарзандларим!

*Ислом КАРИМОВ,
Ўзбекистон Республикаси Президенти*

«ПАХТАКОР» ФУТБОЛ ЖАМОАСИ АЪЗОЛАРИ ВА ФАХРИЙЛАРИГА

Қадрли дўстлар!

Авваламбор, сизларни, сизлар орқали миллионлаб футбол мухлисларини бугунги қутлуғ сана — «Пахтакор» жамоасининг ташкил этилганига 50 йил тўлиши муносабати билан чин қалбимдан самимий муборакбод этаман.

«Пахтакор» деганда, биз ўзбек футболи тарихидан юксак ўрин олган, машхур футбол юлдузларини ўз сафида мужассам этиб, ирода, қатъият ва маҳорати билан нуфузли халқаро мусобақаларда унтилмас ғалабаларни қўлга киритган кўп миллатли, номдор спорт жамоасини тасаввур қиласиз.

«Пахтакор» деганда, нафақат футболимиз, балки мамлакатимиз тарихи билан узвий боғланниб кетган, марказда бўладими, узоқ ва яқин шаҳар-қишлоқларимизда бўладими — бутун халқимиз қалбидан алоҳида жой эгаллаб, унинг фахру ифтихорига айланган, юртдошларимиз хотирасида муҳрланиб қолган машхур футболчилар сиймоси кўз ўнгимизда гавдаланади.

ИСЛОМ КАРИМОВ

Айнан «Пахтакор» жамоаси ўзбек футболининг етакчи намояндаси сифатида юртимиздаги ҳар қайси маҳалла ва мактабдаги минг-минглаб ёшларимизга ижобий таъсир кўрсатиб, унинг сафларида тўп сурган буюк футболчилардан ибрат ва намуна олган янги-янги футболчилар авлодининг етишиб чиқишига замин яратди, десак, айни ҳақиқатни айтган бўламиз.

Ярим асрлик тарихи давомида «Пахтакор» зафарли онлар билан бирга, ҳаётнинг жиддий синов ва машаққатларини ҳам бошидан кечиргани, айниқса, 1979 йилги авиаҳалокат натижасида ўзининг энг кучли таркибидан жудо бўлганини барчамиз ҳали-ҳануз изтироб билан ёдга оламиз. Ана шу навқирон спортчи ўғлонларимизнинг хотираси халқимиз қалбида ҳамон сақланиб келмоқда.

Бугунги кунда «Пахтакор» босиб ўтган мураккаб йўлни, бу жамоанинг нафақат Ўзбекистонда, балки мамлакатимиздан олисда жойлашган турли минтақа ва давлатларда ҳам тан олинганини, катта довруғ ва ҳурмат қозонганини эслар эканмиз, бизнинг энг муҳим вазифамиз — ўзбек футболи эришган ана шундай обрў-эътибор ва нуфузни тиклаш, унинг шонли тарихини муносаб давом эттиришдан иборатdir.

Мустақиллик йилларида юртимизда спорт соҳасига давлат сиёсатининг устувор йўналиши

сифатида доимий эътибор берилаётгани туфайли миллий футболимизни ҳар томонлама ривожлантириш учун кенг имкониятлар яратилаётгани жамоатчилигимизга яхши маълум. Милион-миллион мухлислар, аввало, ёшларимиз қалбida ҳайрат ва ҳаяжон, чексиз завқ ва кувонч туйғуларини уйғотадиган футболдек жозибали ўйин, таъбир жоиз бўлса, том маънодаги бетакрор санъатга интилишни юксалтириш, шак-шубҳасиз, бугунги кунда спортни оммалаштириш ва соғлом ҳаёт тарзини кенг қарор топтиришда ҳеч нарса билан солиштириб бўлмайдиган бекиёс таъсир ва аҳамиятга эга.

Шу нуқтаи назардан қараганда, яқинда қабул қилинган «Ўзбекистонда футболни ривожлантиришга доир қўшимча чора-тадбирлар тўғрисида»ги қарорнинг бу борада нечоғлиқ муҳим аҳамият касб этишини изоҳлашта ҳожат йўқ, деб ўйлайман.

Ушбу қарорда қўзда тутилган асосий мақсадлар — футбол клубларининг моддий-техник ва молиявий базасини мустаҳкамлаш, уларнинг таркибига болалар ва ўсмиirlар футбол мактабларини киритиш, истеъодди спортчи ёшлар заҳирасини ривожлантириш, мамлакатимиз футболининг оммавийлик даражасини янада кўтириш, стадионларни халқаро андозаларга мувофиқлаштириш, жаҳон ва Осиё чемпионат-

ларида, нуфузли беллашувларда Ватанимиз ша-рафини муносиб ҳимоя қилишга қодир бўлган юксак малакали футболчиларни, мураббий ва мутахассисларни тайёрлаш каби долзарб вазифаларни амалга ошириш миллий футболимизни янги, замонавий босқичга кўтаришга хизмат қиласди, албатта.

Энг муҳими, бундай ёндашув нафақат «Пахтакор» клуби, балки жойларда фаолият кўрсатаётган барча клублар ишини яхшилашда ҳам асосий мезон бўлиши, давлат ва жамоат ташкилотлари, ҳомийлар, ҳаётини шу соҳага бағишлиланган футбол фидойиларининг эзгу мақсад-муддаосига айланишини истардим.

Шу борада биз янгича асосда ташкил этилаётган Ўзбекистон футболини қўллаб-қувватлаш жамғармасининг фаолиятига катта умид ва ишонч билан қарашга ҳақлимиз.

Азиз дўстлар, биродарлар!

Фурсатдан фойдаланиб, бугун 50 ёшини нишонлаётган «Пахтакор» жамоасининг шаклланишига, унинг спорт оламида кент шуҳрат қозонишига катта ҳисса қўшган футболчи ва мураббийларга, мутахассис ва ташкилотчиларга, муҳтарам фахрийларимизга барча футбол муҳлислариномидан чуқур хурмат-эҳтиром ва миннатдорлик изҳор этишни ўзимнинг шарафли бурчим, деб биламан.

Барчангизни бугунги қутлұғ айём билан яна бир бор табриклар эканман, сизлар «Пахтакор»-дек мамлакатимиз спорт тарихида ёрқин сағиға яраттан машхұр ва севимли жамоанинг шағынни юксак даражада сақлаб, унинг доимо ифтихоримиз тимсоли бўлиб қолиши учун билим ва таж-риба, куч-ғайрат, салоҳият ва маҳоратингизни янада яққол намоён этасиз, деб ишонаман.

Шу йўлда барчангизга сиҳат-саломатлик, баҳт ва омад тилайман.

*Ислом КАРИМОВ,
Ўзбекистон Республикаси Президенти*

ШАҲТ ҲАМКОРЛИКНИНГ УЛКАН САЛОҲИЯТИНИ НАМОЙИШ ЭТМОҚДА

Ўзбекистон Республикаси Президенти Ислом Каримов Шанхай Ҳамкорлик Ташкилотининг 2006 йил 15 июнь куни Шанхай шаҳрида бўлиб ўтган саммити арафасида Хитой Ҳалқ Республикаси оммавий ахборот воситалари вакиллари билан учрашиди. Мамлакатимиз раҳбарининг интервьюси XXРнинг марказий ССТВ-1 телеканали, етакчи ахборот маҳкамаси — «Синъхуа» агентлиги, нуфузли «Жэныминъ Жибао» газетаси, Бутунхитой радиоси ва бошқа оммавий ахборот воситаларида кенг ёритилди. Қуйида ушбу интервьюю эътиборингизга ҳавола этилмоқда.

Савол: Ҳурматли Президент жаноблари, аввало, қимматли вақтингизни аямай, биз билан учрашишга рози бўлганингиз учун Сизга чукур миннатдорлик изҳор этамиз. Ижозатингиз билан саволларга ўтсак. Шанхай Ҳамкорлик Ташкилоти тузилганига беш йил тўлди. Сиз мазкур тузилманинг бу даврдаги фаолиятини қандай баҳолаган бўлур эдингиз?

Жавоб: Ушбу фурсатдан ҳамда Хитойнинг энг йирик оммавий ахборот воситалари вакиллари билан учрашиб турганимдан фойдаланиб, мамлакатингиз ва буюк хитой ҳалқига ўзимнинг ҳурмат-эҳтиромларимни изҳор этмоқчиман.

ШХТни таъсис этиш тўғрисидаги хужжатлар бундан беш йил муқаддам айнан Шанхайдаги шиддат билан ривожланиб бораётган ҳозирги Хитойнинг ўзига хос тимсоли бўлган шаҳарда имзоланганида чукур рамзий маъно бор, деб ўйлайман.

ШХТ тузилганидан кейин ўтган 5 йил давомида ҳамкорликнинг деярли барча соҳаларида катта муваффақиятларга эришилди, ташкилот умумэътироф этилган ҳалқаро тузилма мақомини олди, унинг аҳамияти ва таъсир кучи эса минтақа доирасидан ташқарида ҳам сезилмоқда.

Ўтган бу тарихан қисқа даврда ШХТ нафақат ўзининг яшовчанлигини кўрсатди, балки сиёсат ва хавфсизликдан иқтисодий ва ижтимоий ҳамкорликкача — барча масалаларни ўз ичига олган минтақавий муаммоларнинг бутун бир мажмуини ҳал этишга қодир ҳалқаро форум сифатида жаҳон сиёсат саҳнасидан мустаҳкам ўрин эгаллади.

Эътиборингизни менинг назаримда ўта муҳим саналган бир жиҳатга қаратмоқчиман. Дунёдаги вазиятнинг ривожланиши ва глобал ўзга-

ришлар, хавфсизлик ва барқарорликка нисбатан таҳдидларнинг кучайиб бораётгани, «оловли нуқталар»нинг сақланиб тургани, турли минтақаларда ва, аввало, барчамизга яқин бўлган Марказий Осиё минтақасидаги мавжуд ҳалқаро террорчилик, экстремизм, айирмачилик ва наркотрафик хавфи ШХТдек ҳалқаро ташкилотни тузиш ва шакллантириш ҳаётий зарурат эканлигини ва бу иш ўз вақтида амалга оширилганини тасдиқлайди.

Савдо-иктисодий ва ижтимоий соҳаларда ҳамкорликни ривожлантиришнинг асосий шартларидан бири ҳам бутун ШХТ маконида хавфсизлик ва барқарорликни мустаҳкамлаш ҳамда барқарор тараққиётни таъминлашдан иборатdir.

Ишончим комилки, келгусида ШХТ доирасида иқтисодий ҳамкорликнинг кўлами кенгайиб бораверади. Ташкилотнинг Ишбилармонлик кенгаши, Саноатчилар ва ишбилармонлар форуми, Банклараро бирлашма каби янги тузилмалиари самарали фаолият бошлагани шундан далолат беради. Айни пайтда янги тузилаётган Тараққиёт жамғармаси ҳам бу ишга салмоқли ҳисса кўшади.

Савол: Ўзбекистон ШХТга аъзо давлат сифатида ушбу Ташкилот доирасидаги ҳамкорликни янада ривожлантириш ва кенгайтириш учун қандай чора-тадбирлар кўрмоқда?

Жавоб: Биз ШХТга аъзо давлатлар ўртасида қарор топган ҳамкорликнинг бугунги даражасиди ҳамда ташкилотнинг фаолиятини умуман юксак баҳолаймиз. Ҳозирги вақтда аъзо мамлакатлар иқтисодиётда, минтақанинг бой минералхом ашё захираларини ўзлаштириш соҳасида йирик лойиҳаларни амалта ошириш учун кенг имкониятларга эга.

Биз сармоявий ҳамкорликни фаоллаштиришда транспорт коммуникацияларини тараққий этириш, минтақанинг бой сув-энергетика захиралидан оқилона фойдаланиш, аҳоли бандлиги каби минтақадаги ечимини кутаётган муаммоларни ҳал қила оладиган ва ҳал қилиши шарт бўлган иқтисодиёт йўналишларини ўз вақтида ривожлантириб бориш, шунингдек, мавжуд ижтимоий муаммолар устуворлик касб этиши зарур, деб ҳисоблаймиз.

Ўзбекистон террорчилик, айирмачилик ва экстремизм каби хавф-хатарларнинг ҳар қандай кўринишларига қарши қурашиб бўйича ташаббусларни илгари суриб, муайян чора-тадбирлар кўрмоқда. Жорий йилнинг март ойи бошида Ўзбекистон ҳудудида ШХТ доирасидаги илк кўшма аксилтеррор машқлар ўтказилди. Юксак касбий маҳорат даражасида ўтган бу машқлар хавфсизлик органлари фаолиятининг яхши мувофиқлаштирилганини, уларнинг террорчиликка қарши

биргаликда курашиш борасидаги азму шижаоти ва қатыягини намойиш этди.

Бу ўринда ШХТ Минтақавий аксилтеррор тузылмасининг аҳамияти ортиб бораётганини таъкидламоқ жоиз. Тузилма қатыият билан аниқ амалий ишларни бажаришга киришди.

Ижтимоий жабҳада биз таълим соҳасидаги ҳамкорликни ривожлантиришга устувор аҳамият қаратамиз. Яхши биласизки, ҳар қандай мамлакатнинг тақдирни ва келажаги таълим даражаси билан белгиланади. Шундан келиб чиқиб, ШХТ-нинг бўлажак саммитида Таълим соҳасида ҳамкорлик тўғрисидаги битим имзоланишини кўллаб-кувватлаймиз.

Савол: Ўзбекистон ШХТни ривожлантириш истиқболини қандай тасаввур этади? Сиз ШХТга аъзо давлатлар раҳбарларининг Шанхайдаги бўлажак навбатдаги учрашувидан қандай натижалар кутмоқдасиз?

Жавоб: ШХТ истиқболи ҳақида гапирганда, ташкилотимиз тузилганига ҳали бор-йўти беш йил тўлганини унумаслик лозим. Бизнингча, шуниси муҳимки, ўтган бу йиллар давомида ШХТ шаклланиб улгурди, тузилмавий жиҳатдан мустаҳкамланиб, нуфузли халқаро ташкилотга айланди.

Биз айни пайтда йўл бошида эканлитигимизни ҳам яхши англаймиз. Ҳали иқтисодий жабҳада

ҳам, хавфсизлик соҳасида ҳам, бошқа кўпдан-кўп йўналишларда ҳам талай иш қилишимиз керак. Ўзбеклар «Юрган — дарё» дейдилар.

Ҳаёт тажрибаси шундайки, йўлдошлар ахил-иноқ бўлса, уларнинг мақсад-муддаолари муштарак бўлса, ҳар қанча узоқ йўл ҳам машаққатли туюлмайди. Босиб ўтган йўлимизга назар ташлайдиган бўлсак, кўп нарсаларга эришдик, деб bemalol айтиш мумкин. Асосийси — биргаликда илгари бориш учун, самарадорлик ва муваффақиятга эришиш учун мустаҳкам замин яратилди.

Бўлажак саммитта келсак, унинг Шанхайда, ушбу ташкилот дунёга келган жойда, ШХТнинг нуфузи ва аҳамиятини мустаҳкамлаш учун кўп иш қилинган ва қилинаётган Хитойда ўтишининг ўзи фоят муҳим эканлигини алоҳида таъкидлаган бўлардим.

Шу вақтга қадар қўлга киритилган натижаларни баҳолагандা, қуйидагиларни қайд этиш мумкин: ташкилотнинг сиёсий нуфузи мустаҳкамланмоқда, унинг фаолиятида иштирок этиш ниятини билдираётган мамлакатлар сони ортмоқда. Биз буларни Шанхай ташкилотининг истиқболи порлоқ эканлигидан, бошқа мамлакатлар назарида жозибадорлигидан далолат сифатида қабул қиласиз.

Роса икки йил муқаддам, ШХТга аъзо давлатлар раҳбарларининг Тошкентдаги учрашуви-

да биз Декларацияга имзо чеккан эдик. Унда савдо-иқтисодий ҳамкорликнинг замонавий шаклшамойил касб этиши, мамлакатларимиз ўртасидағи ўзаро товар айирбошлиш ҳажмининг ошиши, меъёрий-хукуқий асосларимизнинг уйғунлашуви, товарлар, сармоялар, хизматлар ва технологияларнинг эркин ҳаракатланиши учун босқичма-босқич кулай шароит яратишта қаратилған изчил саýй-харакатлар мажмуи белгиланған.

Биз ўринсиз ҳаяжонлардан йироқмиз. Навбатдаги саммит өлдида турган вазифалар мамлакатларимиз ва халқларимизнинг туб манфаатларига асосланған күп қиррали ҳамкорликни қадамбақадам ривожлантириш борасидаги мақсадларимизга мос келади. Айни пайтда олий даражадаги бу учрашувни бутун дунё дикқат билан күзатишини назарда тутган ҳолда, биз унга пухта, астайдыл ҳозирлик күрдик. Шуни унұтmas-лик лозимки, Шанхай саммитида мінтақаның халқаро майдонда кечеётган сиёсий, иқтисодий, маданий жараёнларда тобора мұхим ўрин тутаёттан қатор давлатлари раҳбарлари учрашадылар.

Шу муносабат билан геосиёсий жараёнлар шиддат билан ривожланаётган, иқтисодиёт ва ахборот соҳалари глобаллашиб бораёттан ҳозирги шароитда ШХТ механизмларини ҳамкорликнинг янада юқори даражасига мос погонага күта-

риш табиий вазифа эканини таъкидламоқчиман. Бу — давр талаби. Юбилей саммити, бизнингча, янги очилаётган имкониятлардан биргаликда янада унумли фойдаланиш, ҳозирги замон таҳдид ва хавф-хатарларига қарши биргаликда янада самарали қурашиб жараёнига асос солади.

Савол: Ўзбекистон Республикаси Марказий Осиёning ўртасида жойлашган. Ундаги сиёсий, иқтисодий ва ижтимоий барқарорлик мазкур минтақа ҳаётида катта аҳамиятга эга. Сизнинг мавжуд вазият борасидаги нуқтаи назарингизни билмоқчи эдик.

Жавоб: Ўзбекистон, таъбир жоиз бўлса, Марказий Осиёning юраги саналади, у минтақадаги беш мамлакатнинг барчаси билан, шу жумладан, сўнгги ўғтиз йил давомида уруш домидан чиқа олмаётган Афғонистон билан ҳам чегарадош. Мамлакатимизнинг нафақат жутрофий жойлашуви, балки унинг улкан инсон ресурслари, иқтисодий, маданий ва интеллектуал салоҳияти, цивилизация тарихидаги ўрни, табиий заҳираларга бойлиги ҳам ғоят муҳим аҳамият касб этади.

Айни вақтда Ўзбекистоннинг 1991 йилда, тарихан анчайин мураккаб бир даврда мустақилликка эришганини эслатиб ўтмоқчиман. Ўшанда Афғонистонда узоқ йиллик қуролли тўқнашувлар давом этаётган, бутун минтақада сиёсий ва-

зият қай тарзда ривожланиши мавхум бўлиб турган, иқтисодий ва ижтимоий аҳвол ниҳоятда оғир, иқтисодиётнинг кўплаб соҳалари амалда таназзулга учраган эди. Бундай шароитда мамлакатимизда тинчлик ва барқарорликни, Ўзбекистонда ва бутун минтақада миллатлар ва фуқаролараро тотувликни сақлаб қолиш жуда муҳим Эди.

Жамиятни, унинг иқтисодий асосини ислоҳ қилиш жараёнида давлатимиз сиёсати ана шу омиллардан келиб чиқсан ҳолда белгиланди. Ўзбекистонда ислоҳотлар босқичма-босқич ва изчиллик асосида амалга оширилмоқда. Уларни жорий этишда муайян тарихий шарт-шароит ва бу ерда яшовчи одамларнинг менталитети инобатга олинди. Уларни ижтимоий қўллаб-қувватлашга алоҳида эътибор берилди. Шу билан бирга, биз мамлакатимиз сарҳадларини қўриқлашга, фуқаролар хавфсизлигини таъминлашга қодир бўлган Қуролли Кучлар ва ҳуқуқни ҳимоя қилиш органларини мустаҳкамлаш масалаларига ҳам жиддий эътибор қаратдик. Халқимиз буларнинг барчасини қўллаб-қувватлади ва пировардида саъй-ҳаракатларимиз минтақа миқёсида тинчлик ва барқарорликни мустаҳкамлашга хизмат қилди.

Минтақавий хавфсизликнинг узвийлигини, Марказий Осиёда яшовчи халқларнинг тарихий тақдиди муштарақ эканлигини инобатга олган ҳолда, биз, қўшниларимиз билан биргаликда,

мintaқa мамлакатлари билан ҳам икки томонлама, ҳам кўп томонлама ҳамкорликни кенгайтириш учун шарт-шароит яратиш бўйича узоқни кўзловчи саъй-ҳаракатларни амалга оширмоқдамиз. Ўзбекистоннинг интеграция жараёнларини ривожлантириш борасидаги кўплаб таклифлари шунга қаратилган. Mintaқavий бирлашмалар ва халқаро ташкилотларнинг фаолияти шунга қаратилган. Улар орасида мамлакатларимизнинг қарийб барча соҳалардаги алоқаларини ривожлантириш учун улкан имкониятларга эга бўлган Шанхай Ҳамкорлик Ташкилотининг аҳамияти тобора ортмоқда.

Сўнгги йилларда рўй берган воқеалар mintaқa мамлакатларига кимларнинг ҳақиқий дўстлигини кўрсатди, кўзбўямачиларнинг эса асл қиёфасини очиб берди. Марказий Осиёдаги давлатларнинг қардош халқлари каби Ўзбекистон халқи ҳам ўз уйида, кўшнисининг уйида тинчлик ва барқарорликни сақлашнинг нечоғли муҳим эканлигини яхши англайди. Ўз тақдиримизни ўзимиз мустақил белгилаш ҳуқуқи учун, барқарор, ривожланаётган ва гуллаб-яшнаётган mintaқada ўз келажагимизни барпо этиш ҳуқуқи учун курашда саъй-ҳаракатларимизни самарали бирлаштира олишимизнинг кафолати мана шундадир.

Савол: Хитой билан Ўзбекистон ўртасидаги муносабатларнинг бутунги аҳволи ва ҳамкорлик-

нинг истиқболини қандай баҳолаган бўлур эдингиз?

Жавоб: Бугун комил ишонч билан айтиш мумкинки, сўнгги бир неча йил ичида мамлакатларимиз ўртасидаги муносабатларда ҳамкорликнинг қариб барча йўналишлари бўйича салмоқли ютуқларга эришилди.

Шуни мамнуният билан таъкидламоқчимани, турли даражадаги икки томонлама учрашувлар мунтазам давом этмоқда. Бу учрашувлар ўзаро ишончли сиёсий мулоқотни, Ўзбекистон ва Хитой халқларининг очиқлик, ишонч, ўзаро англашув ва бир-бирининг ички ишларига аралашмаслик тамойилларига таяниб, янада мустаҳкам алоқаларни қарор топтиришга муштарак интилишлари асосига қурилган манфаатли ҳамкорликни ривожлантиришга хизмат қилмоқда.

Ўзбекистон Хитой тимсолида мамлакатимиз мустақиллигининг биринчи кунларидан бизни қўллаб-қувватлаб келаётган ишончли, буюк қўшни ва ҳамкорни кўради.

Ўзбекистон билан Хитой ўртасидаги дўстона алоқаларнинг изчил ривожланишида ХХР Раиси Ху Цзинътаонинг катта хизмати бор. Биз уни ишончли дўст, ўз мамлакатини фаровонлик йўлидан бошқариб бораётган доно ва узоқни кўрувчи раҳбар деб биламиз.

Ўтган йили мамлакатларимиз ўртасида Дўстлик, ҳамкорлик ва шериклик муносабатлари тўғрисидаги давлатлараро шартноманинг имзолангани икки томонлама алоқалар тарихидаги муҳим воқеа бўлди. Биз, мазкур хужжат алоқаларимизда салмоқли ўзгаришлар ясаш ва ҳамкорликни узоқ муддатли асосда ривожлантириш учун мустаҳкам пойdevор бўлиб хизмат қиласи, деб қатъий ишонамиз.

Ўзбекистон ва Хитой террорчилик, айирмачилик ва диний экстремизм балосини бевосита бошидан ўтказган мамлакатлар сифатида минтақавий барқарорлик ва хавфсизликни қўллаб-куватлаш борасида ҳамфирдир. Биз мамлакатларимизга демократлаштириш ва жамиятни ривожлантириш йўлларининг ғарбча андозаларини четдан туриб тиқишишишга оид уринишларга қарши қатъий курашиб борасида ҳам ҳамфирмиз.

Иқтисодий ҳамкорлик изчил, юксак суръатлар билан ривожланмоқда. Масалан, 2000 йилга қиёсан олганда Ўзбекистон билан Хитой ўртасидаги ўзаро товар айирбошлаш ҳажми беш баробардан кўпроқ ортди ва ўтган йили, биздаги маълумотларга кўра, қарийб ярим миллиард АҚШ долларига етди.

Шу билан бирга, биз қатъий аминмизки, икки мамлакатда ҳам савдо-иқтисодий ва молиявий-

сармоявий ҳамкорликни янада юқори поғонага кўтариш учун ишга солинмаган катта имконият ва улкан салоҳият мавжуд.

Мамлакатимиз хитойлик шерикларнинг сармояси ва илфор технологияларини жалб этишдан манфаатдор. Ўзбекистон Хитойнинг бу мамлакат дунёда етакчилик қилаётган соҳалардаги, масалан, телекоммуникация соҳаси, компьютер ва унинг бутловчи қисмларини ишлаб чиқариш, майший техника, машинасозлик, кимё ва нефть кимёси саноатидаги тажрибасига қизиқиш билан қарайди.

Биз Хитой компанияларининг молиявий ва технологик имкониятлари кенгайиб бораётганига гувоҳ бўлмоқдамиз ва улар билан ҳамкорликда мамлакатимизда нафақат ички бозор, балки экспортга, учинчи мамлакатларга мўлжалланган маҳсулотлар ишлаб чиқариш учун қўшма корхоналар тузишга тайёрмиз.

Назаримда, ҳозирги кунда умумий вазифамиз савдо-иктисодий ва сармоявий соҳаларда ўзаро манфаатли ҳамкорликни кенгайтириш ҳамда ривожлантиришнинг йўл ва имкониятларини топишдан иборат.

Фан, техника, таълим, маданият, сайёҳлик соҳаларида ҳамкорлик учун катта салоҳият мавжуд. Бу йўналишлардаги алоқаларни фаоллаштириш учун икки мамлакат ўртасида ахборот ал-

машувини кучайтириш зарур. Ҳали-ҳануз Хитойда ҳам, Ўзбекистонда ҳам мамлакатларимиз иқтисодий салоҳияти, ҳамкорлик имкониятлари, маданияти ва тарихи тўғрисидаги ахборотлар етишмаслиги сир эмас.

Ўзаро хабардорлик ва бир-бирининг маданий-тарихий меросига ҳурмат ҳалқларимиз ўргасидаги ишончни мустаҳкамлашга ва уларнинг яқинлашувига хизмат қилиши, шериклик муносабатларининг ижтимоий асосини мустаҳкамлаши шубҳасиз.

Савол: Тошкентда расман 2004 йилнинг июнида очилган ШХТ Минтақавий аксилтеррор тузилмаси бугун ШХТнинг икки доимий ишловчи органидан бири сифатида фаолият кўрсатмоқда. Террорчилик, айирмачилик ва экстремизмга қарши курашда ҳамда минтақавий хавфсизликни мустаҳкамлашда бу тузилманинг ўрни қандай?

Жавоб: ШХТ Минтақавий аксилтеррор тузилмаси таъсис этилганидан буён ўтган икки йил унинг долзарблиги ва ўз вақтида ташкил этилганини кўрсатди. Бугун ШХТ маконида хавфсизликни таъмиňлаш масалаларида саъй-ҳаракатларни бирлаштиришнинг, шунингдек, ҳуқуқни химоя қилиш тизими мутахассислари амалий ҳамкорлигининг платформаси ва воситаси сифатида унинг аҳамияти ортиб бормоқда.

Ҳозирги кунда мазкур тузилманинг вазифалари фақат террорчилик, айирмачилик ва экстремизмга қарши кураш билан чекланмайди. Одамларниң онгини заҳарлаб, ёшларни йўлдан оздириб, улардан террорчилик ҳаракатларининг сўқир ижрочиларини тайёрлайдиган «конвейер» яратувчи кўплаб радикал ва экстремистик марказларниң қабиҳ ниятли мафкуравий ишларига қарши курашиш ҳам унинг вазифасидир.

Минтақавий аксилтерор тузилма ташкил этилганига кўп вақт бўлмаган эса-да, унинг фаолиятида амалий ишлар кучаяётгани кузатилмоқда. Террорчилик, айирмачилик ва экстремистик ташкилотлар ҳамда уларниң фаолиятига дахлдор шахслар бўйича ягона маълумотлар банкини шакллантириш ишлари якунига етмоқда.

Ушбу тузилма ишида ахборот-таҳлил билан боғлиқ фаолиятни янада такомиллаштиришга, нафақат бевосита террорчиликка қарши кураш, балки унинг эҳтимол тутилган кўринишларининг олдини олиш бўйича ҳам тавсиялар ишлаб чиқишга алоҳида эътибор берилаётгани мақсадга мувофиқдир. Бизнингча, бу тўғри ёндашувдир.

Мухтасар айтганда, бугун Минтақавий аксилтерор тузилма «уч ёвуз куч» — террорчилик, айирмачилик, экстремизмга қатъий ва изчил қарши туришга қодир бўлган тузилмага, XXI асрниң таҳдид ва хавф-хатарларини бартараф

этиш йўлидаги муваффақиятли ҳамкорликнинг амалий ва самарадор механизмига айланиб бормоқда.

Аминманки, миңтақавий хавфсизлик ва барқарорликни таъминлаш, ўз навбатида, ШХТ доирасида кўп қиррали ҳамкорликни ривожлантириш, ҳалқларимиз фаровонлиги йўлида мавжуд улкан иқтисодий ва инсоний салоҳиятни тўлатўкис ва янада самарали ишга солиш учун мустаҳкам замин яратади.

Ушбу фурсатдан фойдаланио, уқувчиларингиз, томошабинларингиз ва тингловчиларингизга ҳамда бутун хитой ҳалкига тинчлик, фаровонлик ва равнақ тилайман.

ХАВФСИЗЛИК ВА БАРҚАРОРЛИКНИ САКЛАШ, ХАЛҚЛАРИМИЗ ФАРОВОНЛИГИНИ ОШИРИШ – ЭНГ МУҲИМ ВА УСТУВОР МАСАЛА

Мамлакатимиз Президенти Ислом Каримов 2006 йил 14 июнь куни Шанхай Ҳамкорлик Ташкилотига аъзо давлатлар раҳбарларининг навбатдаги саммитида иштирок этиш учун Хитой Ҳалқ Республикасининг Шанхай шаҳрига жўнаб кетди. Давлатимиз раҳбари сафар олдидан қуидаги фикрларни баён этди.

Маълумки, Шанхай Ҳамкорлик Ташкилоти бундан беш йил муқаддам айнан мана шу шаҳарда ташкил топган эди. Шу фактни инобатга оладиган бўлсак, мазкур учрашув, таъбир жоиз бўлса, ўзига хос юбилей кенгашининг Шанхай шаҳрида ўтказилиши алоҳида рамзий маънога эга эканини тушуниш қийин эмас, албатта.

Бугунги кунда дунёда ва минтақада катта нуфуз ва салоҳиятга эга бир қатор давлатлар аъзо бўлган ушбу ташкилотнинг навбатдаги саммитига тайёргарлик жараёнигининг ўзи жаҳон жамоатчилигининг қизиқиши ва эътиборини торти-

моқда. Бу эса учрашув давомида халқаро аҳамиятга молик мұхим масалалар мұхокама этилишидан далолат беради, десак, ҳеч қандай хато бўлмайди.

Табиийки, бундай қизиқишнинг муайян сабблари бор. Бу ҳақда гапирганды, авваламбор, Шанхай Ҳамкорлик Ташкилотининг тарихан қисқа бир муддатда нафақат шаклланиш ва тараққиёт жараёнини босиб ўтганини, балки бир ярим миллиарддан ортиқ аҳоли яшайдиган минтақада тинчлик, ҳавфсизлик ва барқарорликни сақлаш, сиёсий, иқтисодий ва социал-гуманитар соҳаларда ҳамкорлик алоқаларини ривожлантиришга ҳар томонлама қодир бўлган халқаро ташкилот сифатида ўзини намоён қилаётганини таъкидлаш лозим. Шунинг учун ҳам ҳозирги пайтда бу ташкилотнинг сиёсий нуфузи тобора мустаҳкамланмоқда, унинг фаолиятида иштирок этиш истагини билдираётган мамлакатлар сони ортиб бормоқда.

Бу галги учрашувда ташкилотга аъзо бўлган Хитой Ҳалқ Республикаси, Россия Федерацияси, Ўзбекистон, Қозогистон, Тожикистон ва Қирғизистон давлатларининг раҳбарлари билан биргаликда тўртта кузатувчи мамлакат — Ҳиндистон, Покистон, Эрон, Мўгулистан вакиллари иштирок этиши кутилаётгани ҳам шуни кўрсатади, деди Ислом Каримов.

Олий даражадаги бу учрашувда 15 та ҳужжат имзоланиши кўзда тутилмоқда. Жумладан, Шанхай Ҳамкорлик Ташкилотининг беш йиллиги муносабати билан декларация, халқаро информацион хавфсизлик тўғрисида баёнот, ташкилотга аъзо давлатлар томонидан халқаро терроризмга қарши биргаликда ўтказиладиган тадбирларни ташкил этиш тартиби ҳақидаги битим, таълим соҳасидаги ҳамкорлик тўғрисида шартнома, Ишбилармөнлик кенгашининг фаолияти, иқтисодий, молиявий ва банк тизимлари фаолияти ҳақидаги ҳужжатларнинг қабул қилиниши мўлжалланмоқда.

Айниқса, бўлиб ўтадиган учрашувда минтақамизда хавфсизлик ва барқарорликни сақлаш, тинч ва осуда ҳаётимизга таҳдид соладиган ҳар қандай хавф-хатарларга йўл қўймаслик, иқтисодий ва молиявий, жумладан, инвестицион ҳамкорликни янада кенгайтириш, транспорт коммуникацияларини ривожлантириш, ташкилотга аъзо давлатлар жойлашган минтақанинг бой сув энергетика захираларидан, ер усти ва ер ости бойликларидан оқилона фойдаланиш билан боғлиқ ўз ечимини кутаётган масалаларни муҳокама қилиш ҳам кўзда тутилмоқда.

Шу билан бирга, ушбу ташкилот иштирокчиси бўлган давлатларнинг иқтисодий тараққиётига бевосита таъсир кўрсатадиган соҳалар — ком-

муниципия ва информация тармоқларини; темир йўл, автомобиль йўлларини барпо этиш бўйича лойиҳаларни муҳокама қилиш, шунингдек, баъзи ташкилий-институционал масалалар ҳам кун тартибига киритилган. Айни пайтда ташкилотнинг Саноатчилар ва ишбилармонлар форуми, Банклараро бирлашма, Таракқиёт фонди каби тузилмалари фаолиятини йўлга қўйиш сингари масалалар ҳам атрофлича муҳокама қилинади.

Ўйлайманки, бу масалалар бўйича қабул қилинадиган қарорлар мінтақамизда жойлашган барча давлатларни ижтимоий жиҳатдан янада ривожлантириш, мавжуд улкан салоҳият ва ресурслардан самараали фойдаланиш йўлида янги имкониятлар очиб беради.

Келгусида Шанхай Ҳамкорлик Ташкилотининг фаолияти самарадорлигини ошириш ҳақида тағириларни, мен қўйидаги масалаларга алоҳида эътибор қаратиш зарур деб биламан, деб фикрини давом эттирди Президентимиз.

Биринчидан, бошқа барча ҳаётий масалаларнинг негизини белгилаб берадиган мінтақамизда тинчлик, хавфсизлик ва барқарорликни сақлаш ва мустаҳкамлаш, халқаро терроризм ва экстремизм, сепаратизм, наркотрафик каби замонавий таҳдидларга қарши кураш масаласи бундан бўён ҳам ШХТнинг ўта муҳим ва устувор вазифаси бўлиб қолиши лозим.

Бу мақсадга эришиш учун, авваламбор, мазкур ташкилотга аъзо бўлган барча давлатларнинг мавжуд хавф-хатарларни ятона принциплар асосида, бир кўз билан қарashi ва баҳолаши талаб этилади.

Иккинчидан, мана шундай таҳдидларнинг олдини олишда минтақамизга, миллионлаб одамларнинг ҳаётига зарар етказиши мумкин бўлган ёвуз кучларнинг фаолиятини нафақат тўғри баҳолаш, балки уларга қарши бир ёқадан бош чиқариб биргаликда курашиш, ташкилотга аъзо бўлган ҳеч бир давлатда қўпорувчилик ҳаракатларига йўл қўймаслиқ, барча куч ва имкониятларни шу мақсадда бирлаштиришни бутун ҳаётнинг ўзи тақозо этмоқда.

Энг муҳими, бундай террорчилик хуружлари, айтайлик, бир давлат ҳудудида содир этилганда, ШХТга аъзо бошқа бир давлатнинг, бу оғат бизни четлаб ўтади, биз фақат транзит мамлакатмиз ёки халифалик тузумини ўрнатиш даъвоси фақат Фарғона водийсига тегишли, деган мазмундаги сохта қарашлар билан ёндашуви мутлақо номақбул бўлиб, бундай позицияни умуман оқлаб ва қабул қилиб бўлмайди.

Ана шундай хавф-хатарларга қарши фақат биргаликда изчиллик ва қатъият билан кураш олиб борилган тақдирдагина бундай ҳамкорлик ижобий натижага бериши мумкин.

Учинчидан, Шанхай Ҳамкорлик Ташкилотига аъзо давлатлар ўртасида ҳамкорликда ҳал этилиши зарур бўлган сиёсий, иқтисодий ва бошқа муаммоларни ечишда мазкур ташкилот ва унга аъзо бўлган¹ давлатлар орасида ўзаро ҳурмат ва ишонч муҳити мавжуд бўлгандагина қабул қилинадиган қарорларнинг самараси ва таъсирини амалда сезиш мумкин.

Шу нуқтаи назардан қараганда, халқимизнинг «Бирлашган — ўзар, бирлашмаган — тўзар», деган мақолида чуқур маъно бор, деб ўйлайман, деди давлатимиз раҳбари.

Тўртинчидан, маълумки, Шанхай Ҳамкорлик Ташкилоти ўз сафида ҳудуди, аҳолиси ва иқтисодий салоҳияти жиҳатидан турлича мавқега эга бўлган давлатларни бирлаштиради. Албатта, ушбу давлатларнинг барчаси ҳам бу ташкилот доирасида ўз миллий манфаатларини кўзлаган ҳолда сиёсат олиб боришга интилади. Мана шундай нозик вазиятда ўзаро манфаатли ҳамкорликни таъминлаш учун аввало нима керак, деган саволга, мен халқаро дипломатия тилида кент кўлланадиган манфаатлар баланси, таъбир жоиз бўлса, манфаатлар мувозанати, деган мезонни доимо сақлаш, унга риоя қилиш ва бу масалани эътибор марказида тутиш керак, деб жавоб берган бўлардим.

Ишончим комилки, Шанхай Ҳамкорлик Ташкилотининг навбатдаги саммити мамлакатлари-

ИСЛОМ КАРИМОВ

миз ўртасидаги конструктивлик ва прагматизм каби асосий тамойилларга асосланган ўзаро ишонч ва ҳурмат мұхитини чуқурлаштиришга хизмат қиласы, хавғызлыкни таъминлаш масалаларини ечиш, тинчлик ва барқарорлыкни сақлаш, халқдаримизнинг фаровонлигини оширишда мустаҳкам пойдевор яратади.

ТИНЧЛИК ВА БАРҚАРОРЛИКНИ САҚЛАШНИНГ ИШОНЧЛИ КАФОЛАТИ

Хурматли давлат раҳбарлари!

Муҳтарам саммит қатнашчилари!

Давлатлар раҳбарлари ва вакиллари — саммит иштирокчиларини кутлаш менга катта мамнуният багишлайди. Хитой Халқ Республикаси раиси жаноб Ху Цзинъяога ва барча хитойлик дўстларимизга меҳмондўстлик ва Шанхай Ҳамкорлик Ташкилоти саммитини ажойиб ташкил этганлиги учун миннатдорлик изҳор этаман.

Ўзбекистон ШҲТнинг ўтган беш йиллик фолиятига бу ерда берилган баҳоларни маъкуллайди.

Ҳақиқатан ҳам, ҳуқуқий базани шакллантириш, асосий ҳужжатларни қабул қилиш, ШҲТнинг ташкилий ва институционал шаклланиши борасида улкан ишлар қилинди, ШҲТ олдида турган энг муҳим вазифаларни амалга ошириш учун самарали ҳамкорлик ва ўзаро алоқани йўлга қўйиш бўйича салмоқли қадамлар ташланди.

ШХТ изчил ривожланиб, ўз фаолияти доирасини хавфсизлик соҳасидан сиёсий, иқтисодий ва ижтимоий-гуманитар соҳалар, щунингдек, халқаро террорчилик, экстремизм, айирмачилик ва наркотрафикка қарши кураш соҳасидаги кўп кўламли ҳамкорликкача кенгайтириди.

Тарихан қисқа даврда ШХТ нафақат нуфузли халқаро тузилмага айланди, балки ҳозирги замон геосиёсатини белгиловчи омиллардан бири бўлиб шаклланди.

Бизнинг фикримизча, ШХТнинг халқаро обрўси ва жозибадорлиги ортиб бораётганини белгилаётган энг муҳим жиҳатлар қуйидагилар:

Биринчидан, Евроосиё ҳудудида ШХТнинг ўз вақтида ташкил этилиши ва бунга эҳтиёж борлиги, унинг олдига қўйилган ва ҳал этилаётган вазифаларнинг долзарблиги. Бунда хавфсизликни таъминлаш масалалари билан бир қаторда ташкилотга аъзо мамлакатлар ижтимоий-иқтисодий жиҳатдан барқарор ривожланиши муаммоларини ҳал қилишга муҳим аҳамият берилаётгани эътиборга моликдир.

Иккинчидан, ШХТ умумий чегаралар, яқин тарихий-маданий, анъанавий сиёсий, иқтисодий ва гуманитар алоқаларга эга давлатларнинг тенг ҳуқуқли бирлашмаси бўлиб, унинг фаолияти бошқа мамлакатларнинг манфаатларига қарши

қаратилмаган ва қарама-қаршилик қиласынан блок хусусиятига эга эмас.

Ниҳоят, учичидан, ҳозирги замонда ШХТ ўзининг асосий тамойилларидан келиб чиқиб, барқарорликни сақлашнинг ишончли кафили, радикал ва экстремист кучлар, турли қўпорувчи ва бузгунчи марказларнинг минтақада вазиятни издан чиқариш, уни қарама-қаршилик ва низо майдонига айлантиришга уринишларига тўсиқ қўювчи омил сифатида майдонга чиқаётгани алоҳида аҳамиятта эга.

Хурматли саммит қатнашчилари!

Халқаро ҳамжамият томонидан амалга оширилаётган саъй-ҳаракатларга қарамай, жаҳон бўйлаб хавф-хатар камаймаяпти.

Бугунги форумда вакиллари иштирок этаждан кенг географик ва геосиёсий ҳудудда ҳали-ҳамон кескинлик ўчоқлари, ҳудудий ва минтақавий низолар, миллий ва диний асосдаги қарама-қаршиликларнинг кескинлашиш хавфи, иқтисодий ва гуманитар хавф-хатарлар сақланиб қолмоқда.

Афғонистонда вазиятнинг бекарорлиги, наркотик ишлаб чиқариш ҳажми ортаётгани, ушбу мамлакатда жойлашган коалиция кучларининг бу иллатга қарши кураш чоралари кутилган натижани бермаётгани жиддий ташвиш уйғотмоқда.

Минтақа мамлакатлари ўртасидаги муносабатларга совуқчилик тушириш, уларни муқобил дав-

латлараро бирлашмаларни шакллантириш бўйича турли геосиёсий комбинацияларга тортишга астойдил уринишлар давом этмоқда. Булардан мақсад ўзининг стратегик манфаатлари йўлида минтақадаги вазиятни издан чиқаришdir.

Минтақадаги давлатларни, сиёсий йўналиши уларнинг узоқ муддатли манфаатларига мос келиши ёки келмаслигига қараб, демократик ёки гайридемократик деб атайди, бундай қарашнинг оқибати ҳам шунга яраша бўлади.

Ўз-ўзидан аёнки, юзага келаётган мураккаб вазиятда узоқ истиқболни ҳисобга олиб бундай комбинацияларнинг рўй бериши мумкин бўлган барча оқибатларини олдиндан кўра билиш ва бартараф этиш лозим.

Ҳар бир мамлакатнинг манфаатлари ва хавфсизликнинг яхлитлиги тамойилидан келиб чиқиб, ҳаммамиз учун умумий бўлган таҳдидларга қарши курашда ягона позицияда туриб иш тутмоқ муҳим аҳамият касб этади. Минтақадаги мавжуд ижтимоий-сиёсий ва ижтимоий-иктисодий муаммоларни баҳолашда келишилган ёндашувлар ҳамда радикализм, экстремизм мафкураси хуружи ва миллатчилик кўринишларига қарши жавоб ҳаракатларини ишлаб чиқиш зарур.

Сув-энергетика ва табиий ресурслардан самарали фойдаланиш, коммуникация масалалари ва бошқа муаммолар ҳар бир мамлакат ва умуман

минтақа манфаатларининг мувозанатини ҳисобга олган ҳолда оқилона ҳал этилиши лозим.

Мамлакатларимизнинг барқарор ва изчил ривожланиши, халқларимизнинг фаровонлиги, кўп жиҳатдан, кўп томонлама иқтисодий ҳамкорлик ва кооперацияни янада чукурлаштиришга, «Шанхай жараёни»нинг барча қатнашчилари манфаатларига бир хилда мос келадиган муҳим трансмиллий лойиҳаларни ҳал этишда биргаликдаги саъй-ҳаракатларимизни кучайтиришга боғлиқ.

Айтилган фикрларни умумлаштириб, шуни таъкидлашни истардимки, имзолаш учун тайёрланган саммит хужжатлари — ШХТда интеграция жараёнларини кенгайтириш ва чукурлаштириш, замон таҳдидларига қарши биргаликда курашиш борасидаги янги қадамдир.

Ишончим комилки, ўзаро ишонч ва ҳурмат, мамлакатларимиз ўртасидаги конструктивизм ва прагматизм, манфаатлар мувозанатини сақлаш каби асосий тамойилларга асосланган ҳамкорлик хавфсизликни таъминлаш, тинчлик ва барқарорликни мустаҳкамлаш, халқларимиз фаровонлигини ошириш масалаларини ҳал қилиш учун мустаҳкам пойdevor яратмоқда.

Эътиборингиз учун ташаккур!

*Шанхай Ҳамкорлик Ташкилоти Давлат
раҳбарлари Кенгашинине Шанхай шаҳрида
бўлиб ўтган мажлисида сўзланган нутқ,
2006 йил 15 июнь*

ОСИЁДА ТИНЧЛИК ВА ҲАМКОРЛИКНИ МУСТАҲКАМЛАШ ЙЎЛИДА

Ҳурматли раис!

Ҳурматли давлат ва ҳукумат раҳбарлари!

Хонимлар ва жаноблар!

Сизларни, ушбу саммитда қатнашаётган давлатлар раҳбарлари ва вакилларини қутлаш ҳамда кўрсатилган меҳмондўстлик ва дўстона қабул учун Қозогистон Президенти Нурсултон Назарбоевга самимий миннатдорлик билдириш менга катта мамнуният бахш этади.

Фурсатдан фойдаланиб, Кенгашда бугун муҳокама этилаётган масалалар бўйича ўзимнинг айrim фикр-мулоҳазаларимни қисқача баён этмоқчиман.

Давлатлараро муносабатлардаги можаро ва қарама-қаршиликларни бартараф этишда ҳам, миллатлараро ва динлараро тотувликни таъминлашда ҳам муваффақиятга эришишнинг энг муҳим шарти бўлган ишонч масалаларига барча замонларда бирдек устувор аҳамият бериб келингани ҳеч кимга сир эмас.

Лекин бизнинг асримизда — глобаллашув ва геосиёсийлашув жараёнлари тоят чукурлашиб бо-

раётган ҳозирги даврда, бизни қуршаб турған дунё мисли кўрилмаган суръатлар билан ўзгариб, унда яшаётган халқлар ва давлатлар тобора бир-бира-га боғлиқ бўлиб ва вазият ўта нозиклашиб бора-ётган бир пайтда ишонч чораларини мустаҳкамлашнинг тизим ва механизмларини ишлаб чи-киш, барқарорликни саклаш ва можароларнинг олдини олиш борасида давлатларнинг саъй-ҳара-катларини янада фаоллаштириш айниқса муҳим аҳамият касб этмоқда.

Барчамизга яхши маълумки, бу масалалар, бу долзарб муаммолар мавзуси кўплаб минтақавий ва субрегионал халқаро тузилмаларнинг, аввало, ну-фузли ташкилот бўлмиш Бирлашган Миллатлар Ташкилотининг доимий дикқат марказида туради.

Шулардан келиб чиқсан ҳолда айтадиган бўлсак, ҳеч шубҳа йўқки, Қозогистон давлати ва унинг Президенти Нурсултон Назарбоевнинг Осиё минтақасида можароли вазиятлар ва қара-ма-қаршиликлар юзага келишининг олдини олиш ва уларни бартараф этиш мақсадида дав-латлар ўртасида ишонч чоралари ва ҳамжиҳат-лик масалаларини муҳокама қилиш учун белги-ланган Форумни шакллантириш бўйича ташаб-буси ҳар томонлама эътибор ва қўллаб-куватлашга сазовордир.

Мен бу ерда ХХР Раиси ва Россия Президен-ти билдирган муҳим таклифларни қўллаб-куват-

лаб, Ўзбекистон делегацияси номидан қуйидаги фикрларни баён этишни истардим.

Биринчидан. Осиё қитъаси ҳақида сўз юритадиган бўлсак, ушбу минтақа давлатлари ўртасидаги интеграция жараёнларининг, уларнинг иқтисодиёти ва ижтимоий ҳаёти билан боғлиқ жабҳаларнинг изчил суръат билан ривожланишини таъминлашда АСЕАН, ШХТ, Осиё-Тинч океани иқтисодий ҳамжамияти, Осиёда ҳамкорлик бўйича мулоқот, Евроосиё иқтисодий ҳамжамияти қаби нуфузли халқаро ташкилотларнинг ўрни ва аҳамияти тобора ортиб бормокда.

Шу боис бугун Форумда муҳокама этилаётган масалалар бўйича тавсиялар ишлаб чиқишида БМТнинг тегишли ҳужжатларида қайд этилган асосий принциплар билан бирга, мазкур ташкилотлар томонидан ишлаб чиқилган ана шу масалаларга доир тамойил ва мулоҳазаларни ҳам иnobatga олиш муҳим аҳамият касб этган бўлур эди.

Бу, ўз навбатида, мазкур нуфузли ташкилотлар билан ҳамкорликдаги фаолиятни мувофиқлаштириш учун зарур асосни яратишга хизмат қиласди.

Иккинчидан. Кенгашнинг ишонч чоралари ва давлатлараро ҳамкорликни кучайтириш бўйича тавсияларини ишлаб чиқишида халқаро амалиётда ва сиёsat майдонида учрайдиган айrim хатти-ҳаракатларга алоҳида эътибор қаратиш ва уларга

тўғри баҳо бериш лозим. Нега деганда, бундай ҳаракатлар халқлар орасида қўшимча кескинлик ва қарама-қаршилик туғдирмоқда, миллионлаб одамларнинг умидсизликка тушиши ва ўз ён-атрофида рўй берадиган воқеаларга ишончсизлик билан қарашига сабаб бўлмоқда.

Бундай воқеаларнинг сабаби тўғрисида, яъни муаллифларнинг маданий савиясининг пастлиги, сиёсий саводсизлиги, бошқа халқларнинг кўп асрлик анъаналари, турмуш тарзи ва менталитетига беписанд муносабатда бўлиши оқибатида вужудга келадиган нохуш фактлар ва турли ксанофобия ҳамда миллатчилик кўринишлари ҳақида кўп гапириш мумкин.

Аммо айрим сиёсатчилар, давлат арбоблари ва колектив нашрларнинг яққол иғвогарлик руҳидаги сурбетларча, мутлақо асоссиз даъво ва чиқишлиари айниқса жиддий ташвиш уйгодади.

Бу борада гап кетганида, мисол тариқасида куйидаги фактларни келтириш мумкин: мусулмонларнинг муқаддас дини бўлмиш ислом динини халқаро терроризм билан боғлашга уринишлар, Фарб матбуотида турли ҳажвий расмлар чоп этиш орқали пайғамбаримиз Мұҳаммад алай-хиссаломнинг шаънини таҳқирлашга қаратилган хатти-ҳаракатлар содир этилмоқда, миллионлаб одамларнинг миллий ғурури ва нафсониятига

тегадиган бирёқлама, асоссиз баҳо ва хулюсалар калтабинларча баён қилинмоқда.

Ўз-ўзидан аёнки, айрим ҳолларда бундай кирдикор ва чиқишлиар халқаро жамоатчиликнинг миллатлар ва элатлар, турли диний конфессиялар вакиллари ўртасидаги ҳамжиҳатликни мустаҳкамлаш борасидаги мураккаб, узоқ ва изчил давом этадиган фаолиятини йўққа чиқармоқда.

Таъбир жоиз бўлса, халқаро майдондаги субъектлар ўртасидаги ишончни одамлар ўртасидаги ишонч сингари янги ўтқазилган ниҳолга қиёслаш мумкин. Бу ниҳол вояга етиши, ҳосилга кириши учун уни доимо, ҳар томонлама меҳр билан озиқлантириш ва парвариш қилиш зарур. Афсуски, баъзан бунинг ўрнига ана шу кўчат униб-ўсадиган муҳитнинг ўзини заҳарлаш ҳолатлари юз бераётганини кузатиш қийин эмас.

Дунёда содир бўлаётган у ёки бу воқеани баҳолашда «икки ёқлама стандарт»ларни кўллаш ҳоллари кўзга ташланаётгани ҳам, табиийки, ўзаро ишонч муҳитини мустаҳкамлашга хизмат қилмайди. Пировард натижада шундай хулоса келиб чиқади: айрим давлат ва мамлакатларга мумкин бўлган барча нарсалар бошқаларга мумкин эмас экан.

Яна бир мулоҳаза.

Ушбу Кенгашда қабул қилинадиган ҳужжатларда ғоят муҳим бир ҳолат ҳисобга олинган тақ-

дирда, унинг фаолият самарадорлиги янада ошади.

Яъни, ишонч чораларини татбиқ этиш бўйича ишлаб чиқилган тавсиялар умумий гаплар билан чегараланмасдан, аниқ йўналишга эга бўлса, бошқача айтганда, бугун халқаро жамоатчиликни ташвишга солаётган муайян можароли вазијатларга, бу можаролар аланга олиб урушга айланниб кетмасидан олдин уларни бартараф этишга қаратилса, ҳар тарафлама мақсадга мувофиқ бўлар эди.

Албатта, бу осон ҳал этиладиган вазифа эмас. Лекин айнан мана шу амалий мақсад — давлатлараро муносабатларни яхшилаш соҳасидаги, кескинлик ва можаролар келтириб чиқарадиган омилларни аниқлаб, уларни бартараф этишга йўналтирилган барча саъй-ҳаракатларимизни оқлаши мумкин.

Сўзимнинг якунида ушбу анжумандада ҳозир бўлганларнинг барчасига яна бир бор самимий хурмат-эҳтиромимни изҳор этишга, саммит ишига муваффақият тилашга ижозат бергайсиз.

Эътиборингиз учун ташаккур.

*Оснёда ҳамкорлик ва ишонч чоралари бўйича
кенгашга аъзо давлатлар раҳбарларининг
саммитида сўзланган нутқ,
2006 йил 17 июнь*

МАТБУОТ ВА ОММАВИЙ АХБОРОТ ВОСИТАЛАРИ ХОДИМЛАРИГА

Қадрли дўстлар!

Авваламбор, сиз, ҳурматли журналистлар, нашриёт ва матбаа соҳаси фидоийларини, оммавий ахборот воситалари ходимларини бугунги касб байрамингиз билан чин қалбимдан самимий муборакбод этаман.

Мана, ўн уч йилдирки, 27 июнь санасини юртимизда миллий матбуот куни сифатида кенг байрам қилиш яхши бир анъянага айланиб қолди. Бу байрам нафақат шу соҳа вакиллари, балки уларнинг ижод ва меҳнат маҳсулидан баҳраманд бўладиган миллионлаб муштариylар, барча зиёлиларимиз орзиқиб кутадиган ва хурсандчилик билан нишонлайдиган кутлуғ айёмдир.

Халқимиз, жамоатчилигимиз матбуот аҳлини Ватанимиз манфаатларининг фаол ҳимоячиси бўлган, давлат ва жамият ўртасида бамисоли холис воситачи ва муҳолиф сифатида фаолият кўрсатадиган, мамлакатимизнинг янгиланиши ва тараққиёти йўлида олиб борилаётган ислоҳотларни кўзланган мақсад ва манзилларга етказишда

доимо изланиб яшайдиган фидойи инсонлар деб билади ва қадрлайди.

Албатта, ҳар қандай байрам тантанасида эришилган ютуқлар беихтиёр сарҳисоб этилади, амалга оширилган ишларга танқидий баҳо берилб, янги-янги режа ва вазифалар белгилаб олилади.

Гўзал пойтахтимиз Тошкент шаҳрида ва жойларда кенг жамоатчилик иштирокида ўтаётган бутунги учрашувлар сизларнинг ўз касбдошларингиз билан дийдор кўришиб, олдингизда турган мақсад ва муаммоларни муҳокама қилиш, касб маҳоратини ошириш, миллий журналистикаизнинг ютуқ ва камчиликлари ҳақида яна бир бор атрофлича фикрлашиб олиш имконини беради, деб ўйлайман.

Халқимизга мансуб бўлган азалий одатга кўра, эл-юртга хизмати сингган, матбуотнинг оғир юкини ўз елкасида кўтариб келган муҳтарам оқсоқолларимизга ҳурмат ва эҳтиром кўрсатиш бундай анжуманларга алоҳида файз бағишлидир. Айни пайтда бу каби тадбирлар шу кунларга етиб келолмаган устоз журналистларнинг номлари ва хотираси ёд этилиши билан ҳам ибратлидир.

Бутунги байрам кунида мен бир масалага алоҳида эътибор беришни истардим. Биз одатда оммавий ахборот воситаларининг ўрни, аҳамияти ва моҳияти ҳақида, замоннинг ўзи уларнинг ол-

дига қўяётган ўткир талаб ва эҳтиёжлар ҳақида кўп гапирамиз. Аммо, очигини айтганда, бу соҳанинг меҳнати нақадар машаққатли экани, журналист касбини танлаган кишилардан наинки истеъдод ва билим, балки қатъият ва жасорат талаб қилиниши, таъбир жоиз бўлса, уларнинг нони қаттиқ экани, улар одамларни тинч қолдирмайдиган ташвиш ва муаммолардан холи бўлмасдан юришлари ҳақида, афсуски, камроқ эслаймиз.

Шу ўринда барчамизниң дилимизда бўлган бир фикри таъкидлаб айтмоқчиман. Ҳозирги кунда ҳалқимиз янги ҳаёт, янги жамият қуриш йўлида қандай юксак мэрраларга эришган бўлса, уларнинг барчасида, ҳеч шубҳасиз, заҳматкаш матбуот аҳлининг ҳам муносиб ҳиссаси борлигини шахсан мен ҳеч қачон унутмайман.

Оммавий ахборот воситаларимизниң истиқлол йилларида босиб ўтган ривожланиш йўлига назар ташлар эканмиз, табиийки, журналистларимизниң бугунги савияси ва даражасини бундан ўн-ўн беш йил аввалги ҳолат билан мутлақо солиштириб бўлмайди.

Кейинги пайтда миллий матбуотимизниң қиёфасини тубдан ўзгартириб юборган компьютер ва ахборот технологиялари, Йнтернет тизими билан бир қаторда, энг аввало, бу воситаларининг барчасини жонлантирадиган, уларга маъ-

но-мазмун берадиган, таъсирчанлиги ва самарасини амалда намоён қиласидиган асосий куч – журналистлар ва матбуот ходимларимизнинг малакаси ва дунёқараши, тафаккури ва маҳорати бошқалардан кам бўлмайдиган даражага ўсиб бораётганини эътироф этиш адолатдан бўлади.

Бугун биз юртимизда ҳуқуқий давлат, демократик жамият қураётган эканмиз, бу масаланинг энг муҳим шарти бўлмиш инсон қадри, инсон ҳуқуқ ва эркинликларини ҳимоялаш, одамларни дунёда содир бўлаётган воқеа-ҳодисалардан ўз вақтида холисона хабардор қилиш, бу жараёнларга нисбатан жамоатчилик фикрини шакллантириш, бир сўз билан айтганда, эл-юрт дарди ва интилишлари билан яшаш, барчамиздан, биринчи галда, оммавий ахборот воситалари вакилларидан бу талаб ва мезонларни кундалик ҳаётимизда изчил жорий этишни тақозо этади.

Матбуотимиз олдида турган мана шундай дол зарб вазифаларни адо этишда бугун бу борада олиб борилаётган ишларни янада такомилластириш, жумладан, оммавий ахборот воситаларининг моддий-техник базасини мустаҳкамлаш, уларни энг замонавий технология ва ускуналар билан жиҳозлаш, соҳа ривожи учун зарур бўлган ислоҳотларни амалга ошириш, матбуот аҳлининг масъулиятли меҳнатини қадрлаш, моддий ва маънавий рағбатлантириш масалалари бундан

буён ҳам давлатимиз, ҳукуматимиз эътибор марказида бўлиши табиий, албатта.

Ўз ҳаётини матбуот соҳасига багишлаган сиз, азизларга менинг эзгу тилагим шуки, аввало, хонадонларингиздан тинчлик-тотувлик, файзу барака аримасин, ижодий ютуқларингиз, мухлис ва муштариylарингиз янада кўпайсин.

Сизларни бугунги қасб байрамингиз билан яна бир бор қутлар эканман, барчангизга сиҳат-саломатлик, баҳт ва омад тилайман.

*Ислом КАРИМОВ,
Ўзбекистон Республикаси Президенти*

ЎЗБЕКИСТОН ҒАЛЛАКОРЛАРИГА

Қадрли дўстлар!

Авваламбор, ризқ-рўзимиз бунёдкори бўлган сиз, азиз деҳқон ва фермерларимизни 6 миллион 100 минг тоннадан зиёд юксак ғалла хирмони бунёд этганингиз билан чин қалбимдан самимий муборакбод этаман.

Бизнинг неча ўн йиллар давомида орзу ва ҳавас қилиб келган ғалла мустақиллигига эришганимизни кейинги етти-саккиз йил мобайнида амалда тасдиқлаб келаётганимизни, бундай улкан ютуқнинг аҳамияти ва моҳиятини ғалла деган, нон деган бебаҳо неъматдан баҳраманд бўладиган ҳар қайси инсон, шу юртда яшайдиган ҳар қайси оила сўзсиз чуқур англайди ва юксак баҳолайди, десак, айни ҳақиқатни айтган бўламиз.

Мамлакатимизда мустақилликнинг дастлабки йилига нисбатан ғаллачиликда ҳосилдорлик 4,5 баробар, ялпи ҳосил миқдори эса 6,5 баробар ошгани бу борада қандай тараққиёт йўлини босиб ўтганимизни, заҳматкаш ўзбек деҳқонининг қандай буюк ишларга қодир эканини яққол кўрсатиб турибди.

Бир пайтлар тасаввур қилиш ҳам қийин бўлган бундай катта мэрралар, авваламбор, Яратганимизнинг ўзи «Сендан — ҳаракат, мендан — барақат» дея мададкор бўлгани, халқимизни балоқазолардан асраб, йўлимизни очиб бергани эвазига қўлга киритилганини ҳеч қачон унутмаслигимизни истардим.

Бундай улкан ютуқ замирида кечани — кеча, кундузни — кундуз демасдан, ўтган йилнинг куз фасли ва жорий йил баҳоридаги сув танқислиги, жазирама иссиқ, жала ва ёмғирлар билан боғлиқ қийинчиликларга қарамасдан, мўл ҳосил етиштирган мард, лафзи ҳалол деҳқонларимиз ва фермерларимизнинг азму шижоати ва фидокорона меҳнати мужассамдир.

Шу борада таъкидлаш жоизки, бугунги кунда одамларимизнинг онгу тафаккурида рўй берраётган ижобий ўзгаришлар, деҳқон ўзини ернинг, мулкнинг ҳақиқий эгаси, қишлоқдаги ҳал қилувчи куч сифатида ҳис этаётгани, унинг меҳнатта, ҳаётга бўлган фаол муносабати, манфаатдорлик ва масъулият туйғуси кучайиб берраётгани иқтисодиётимизда, ҳаётимизнинг барча жабҳаларида ана шундай юксак мэрраларга эришишда асосий мезон ва омил бўлиб хизмат қилмоқда.

Қишлоқ аҳлининг дунёқарашидаги бундай туб ўзгаришлар, ўз навбатида, аграр соҳада кенг

кўламли ислоҳотларни, замонавий бошқарувнинг самарали усул-услубларини, илфор технологияларни жорий этишда, ер билан тиллашиб яшайдиган инсонларда изланувчанлик, ташаббускорлик ва тадбиркорлик фазилатларини уйғотишда намоён бўлмоқда.

Айни пайтда қишлоқ хўжалиги соҳасида ишни мутлақо янгича асосда — бозор иқтисодиёти талабларига мос равишда ташкил этиш, хусусий мулкни изчил ривожлантириш, шу мақсадда фермерлик ҳаракатига кенг йўл очиб бериш, давлат томонидан уни ҳар томонлама қўллаб-куватлаш, фермер хўжаликлари зарур моддий-техник ресурсларни ўз вақтида тўла етказиб бериш, улар етиштирган маҳсулотни реализация қилишда тегишли кўмак ва имтиёзлар яратиб бериш борасидаги амалий ҳаракатлар ҳам муҳим аҳамият касб этмоқда.

Бу йилги етиштирилган ҳосилнинг 81 фоизи фермер хўжаликлари томонидан тайёрлангани ҳам фермерлик ҳаракатининг қишлоқда том маънодаги етакчи ва қудратли кучга айланиб бораётганидан далолат беради.

Азиз дўстларим, биродарларим!

Бугун далаларимизда сизларнинг пешона тेरингиз билан етиштирилган мўл ҳосилни халқимизнинг энг катта ютуғи, десак, ҳеч қандай муболага бўлмайди. Бу юксак ва баракали хирмон

ИСЛОМ КАРИМОВ

нафақат давлат эҳтиёжларини бажариш, шаҳар аҳолисини, ишчи-хизматчиларимиз, ҳарбийларимизни дон маҳсулотлари билан таъминлашга, айни пайтда қишлоқ аҳлининг ертўлалари, омборларини ғалла билан тўлдиришга, энг муҳими, халқимизнинг ризқини бутун, дастурхонини тўкин қилишга, эртанги кундан кўнгли тўқ бўлиб яшашига хизмат қилишини, ўйлайманки, ҳаммамиз яхши тушунамиз.

Эл-юртимиз хирмони донга, кўнгилларимиз қувончга тўлиб турган мана шундай хурсандчилик кунларда барчамиз қўли қадоқ, кўпни кўрган, бошидан не-не синовларни ўтказган заҳматкаш дехқонларимизнинг меҳнат жасорати олдида бош эгиб таъзим қиласиз.

Бундай улкан меҳнат ғалабасига ўзининг фидокорона меҳнати билан муносиб ҳисса қўшган барча-барча касб эгаларига чин қалбимдан савимий миннатдорлик билдираман.

Ҳорманг, меҳнатингизнинг роҳатини кўринг, азизларим, топганингиз яхши кунларга буюрсин! Хонадонингиздан тинчлик-хотиржамлик, файзу барака, баҳту саодат аrimасин!

Ҳеч қачон кам бўлманг, қадрдонларим!

Ислом КАРИМОВ,
Ўзбекистон Республикаси Президенти

МУНДАРИЖА

КЎҲНА САМАРҚАНДНИНГ БОҚИЙ ОВОЗИ. «Шарқ тароналари» бешинчи ҳалқаро мусиқа фестивалининг очилиш маросимидағи нутқ, 2005 йил 28 август	3
ОЗОД ҲАЛҚНИНГ УЛУФ БАЙРАМИ. Ўзбекистон Республикаси мустақиллигининг 14 йиллигига бағишиланган тантанали маросимидаги сўз, 2005 йил 31 август	8
ЎЗБЕКИСТОН ПАХТАКОРЛАРИ ВА БАРЧА МЕҲНАТКАШЛАРИГА: 2005 йил 13 октябрь	14
МАВЖУД САЛОҲИЯТ ВА ИМКОНИЯТЛАРДАН ОҚИЛОНА ФОЙДАЛАНИШ — МУВАФФАҚИЯТ ГАРОВИ. Ҳалқ депутатлари Тошкент вилояти кенгашининг навбатдан ташқари сессиясидаги нутқ, 2005 йил 7 ноябрь	20
СПОРТ — БАРКАМОЛ АВЛОДНИ ТАРБИЯЛАШНИНГ МУҲИМ ВОСИТАСИ. 2005 йил 8 ноябрь	47
ТОШКЕНТ АХБОРОТ ТЕХНОЛОГИЯЛАРИ УНИВЕРСИТЕТИНИНГ ПРОФЕССОР- ЎҚИТУВЧИЛАРИ ВА ТАЛАБАЛАРИГА, БУТУН ЖАМОАСИГА. 2005 йил 8 ноябрь	52
ЎЗБЕКИСТОН ВА РОССИЯ — ИТТИФОҚЧИ ДАВЛАТЛАР. 2005 йил 14 ноябрь	56

ИНСОН, УНИНГ ҲУҚУҚ ВА ЭРКИНЛИКЛАРИ ҲАМДА МАНФААТЛАРИ – ЭНГОЛИЙ ҚАДРИЯТ.	
<i>Ўзбекистон Республикаси Конституциясининг 13 йиллигига бағишиланган тантанали маросимдаги маъруза, 2005 йил 7 декабрь</i>	61
ЁШЛАРГА ИШОНЧ БИЛДИРИШ, УЛАРНИНГ ТАШАББУС ВА САЛОҲИЯТИНИ РҮЁБГА ЧИҚАРИШ – БУГУНГИ КУННИНГ УСТУВОР ВАЗИФАСИДИР. 2005 йил 28 декабрь	98
ЎЗБЕКИСТОН ХАЛҚИГА ЯНГИ ЙИЛ ТАБРИГИ. 2005 йил 31 декабрь	124
ВАТАН ҲИМОЯЧИЛАРИГА БАЙРАМ ТАБРИГИ. 2006 йил 13 январь	130
МÂМЛАКАТИМИЗ ТАРАҚҚИЁТИНИНГ ҚОНУНИЙ АСОСЛАРИНИ МУСТАҲКАМЛАШ ФАОЛИЯТИМИЗ МЕЗОНИ БЎЛИШИ ДАРКОР.	
<i>Ўзбекистон Республикаси Олий Маъжлиси Сенатининг бешинчи ялпи маъжлисидаги нутқ, 2006 йил 24 февраль ...</i>	139
ЭРИШИЛГАН ЮТУҚЛАРНИ МУСТАҲКАМЛАБ, ЯНГИ МАРРАЛАР САРИ ИЗЧИЛ ҲАРАКАТ ҚИЛИШИМИЗ ЛОЗИМ. 2005 йилда мамлакатни ижтимоий-иктисодий ривожлантириш якунлари ва 2006 йилда иқтисодий ислоҳотларни чуқурлаштиришининг энг муҳим устувор йўналишларига бағишиланган Вазирлар Маҳкамаси маъжлисидаги маъруза, 2006 йил 10 февраль	154
НАВРЎЗ БАЙРАМИГА БАҒИШЛАНГАН ТАНТА- НАЛИ МАРОСИМДАГИ СЎЗ. 2006 йил 19 марта	200
БАРҚАРОРЛИК ВА БУНЁДКОРЛИК – ТАРАҚҚИЁТИНИНГ ҚЎШ ҚАНОТИ.	
<i>2006 йил 4 апрель</i>	205

ИНСОН ХОТИРАСИ – МУҚАДДАС, ИНСОН ҚАДРИ – УЛУФ. 2006 йил 9 май	213
МАКТАБ ЎҚУВЧИЛАРИНИНГ «УМИД НИҲОЛЛАРИ» СПОРТ ЎЙИНЛАРИ ҚАТНАШЧИЛАРИГА. 2006 йил 5 май	222
«ПАХТАКОР» ФУТБОЛ ЖАМОАСИ АЪЗОЛАРИ ВА ФАХРИЙЛАРИГА. 2006 йил 25 май	227
ШХТ ҲАМКОРЛИКНИНГ УЛКАН САЛОҲИЯТИНИ НАМОЙИШ ЭТМОКДА. Шанхай Ҳамкорлик Ташкилотининг саммити арафасида Ҳитой Ҳалқ Республикаси оммавий аҳборот воситалари вакилларига берилган интервью, 2006 йил 13 июнь	232
ҲАВФСИЗЛИК ВА БАРҚАРОРЛИКНИ САҚЛАШ, ҲАЛҚЛАРИМИЗ ФАРОВОНЛИГИНИ ОШИРИШ – ЭНГ МУҲИМ ВА УСТУВОР МАСАЛА. 2006 йил 14 июнь	248
ТИНЧЛИК ВА БАРҚАРОРЛИКНИ САҚЛАШНИНГ ИШОНЧЛИ КАФОЛАТИ. Шанхай Ҳамкорлик Ташкилоти Давлат раҳбарлари Кенгашининг Шанхай шахрида бўлиб ўтган мажлисига сўзланган нутқ, 2006 йил 15 июнь	255
ОСИЁДА ТИНЧЛИК ВА ҲАМКОРЛИКНИ МУСТАҲКАМЛАШ ЙЎЛИДА. Осиёда ҳамкорлик ва ишонч чоралари бўйича кенгашга аъзо давлатлар раҳбарларининг саммитига сўзланган нутқ, 2006 йил 17 июнь	260
МАТБУОТ ВА ОММАВИЙ АҲБОРОТ ВОСИТА- ЛАРИ ХОДИМЛАРИГА. 2006 йил 27 июнь	266
ЎЗБЕКИСТОН ФАЛЛАКОРЛАРИГА. 2006 йил 19 июль	271

Ислам Абдуганиевич Каримов
**ЧЕЛОВЕК, ЕГО ПРАВА И СВОБОДЫ –
ВЫСШАЯ ЦЕННОСТЬ**

Том 14

На узбекском языке

Нашр учун масъул К. БЎРОНОВ
Бадний муҳаррир Ҳ. МЕҲМОНОВ
Техник муҳаррир У. КИМ
Мусаҳҳиҳлар Ш. МАҚСУДОВА, Н. УМАРОВА
Компьютерда тайёрловчи Л. АБКЕРИМОВА

Босишга руҳсат этилди 11.08.2006. Қоғоз формати 84×108^{1/2}.
Таймс гарнитурада оғсет усулида босилди. Шартли б.т. 14,7.
Нашр т. 8,65. Тиражи 10 000. Буюртма № 06-115.

Ўзбекистон Матбуот ва ахборот агентлитининг
«Ўзбекистон» нашриёт-матбаа ижодий уйида босилди.
700129, Тошкент, Навоий кўчаси, 30.

66.3(5Y)

K 23

Каримов, Ислом Абдуганиевич

Инсон, унинг ҳуқуқ ва эркинликлари — олий қадрият/
Ислом Абдуғаниевич Каримов.— Т.14 — Т.: «Ўзбекистон»,
2006. — 280 б.

ББК 66.3·(5Y)+66.3(5Y)6